

萬 有 文 庫

第一集一千種

王雲五 主編

清 詩 別 裁

(一)

沈德潛 選

商務印書館發行

清 詩 別 裁

(一)

沈德潛選

國 學 基 本 叢 書

萬有文庫

第一集一千種

總編纂者

王雲五

商務印書館發行

## 凡例

詩之爲道。不外孔子教小子教伯魚數言。而其立言一歸於溫柔敦厚。無古今一也。自陸士衡有緣情綺靡之語。後人奉以爲宗。波流滔滔。去而日遠矣。選中體製各殊。要惟恐失溫柔敦厚之旨。本朝御製詩。如日月經天。江河行地。千百世當奉全集爲準繩。非臣子所敢選也。錢牧齋選明高帝以下諸帝詩。失尊君之體矣。茲編不敢采入三聖御詩。別於牧齋選本。

黃崑圃侍郎。多藏北方學者詩。王遴汝上舍。多藏南方學者詩。余從兩處租載而來。選中所收。幾有十分之三。餘皆逐漸徵取。鱗次投贈。積久成多。以供采擇。然四方萬國。其邊徼之遠。不能遍收也。挂漏實繁。無遺憾。

國朝選本詩。或尊重名位。或藉爲交遊結納。不專論詩也。陳檢討篋衍集。較諸本爲善。然祇及康熙癸丑。以下闕如。茲補癸丑後八十餘年詩。而名位交遊之念。不擾於中。此差可自信者。

是選以詩存人。不以人存詩。蓋建豎功業者。重功業。昌明理學者。重理學。詩特其餘事也。故有功業理學可傳。而兼工韻語者。急采之。否則人已不朽。不復登其緒餘矣。觀者諒之。

人必論定於身後。蓋其人已爲古人。則品量與學殖俱定。否則或行或藏。或醇或駁。未能遽定也。集中采

取雖前後不同均屬已往之人。

詩必原本性情。關乎人倫日用。及古今成敗興壞之故者。方爲可存。所謂其言有物也。若一無關係。徒辨浮華。又或叫號撞搗以出之。非風人之指矣。尤有甚者。動作溫柔鄉語。如王次回疑雨集之類。最足害人。心術一概不存。

詩不能離理。然貴有理趣。不貴下理語。陶淵明汲汲魯中叟。彌縫使其淳。聖人表章六經。二語足以盡之。杜少陵江山如有待。花柳自無私。天地化育萬物。二語足以形之。邵康節詩。直頭說盡。有何興會。至明儒太極圈兒大。先生帽子高。眞使人笑來也。選中近此類者。俱從芟蕪。

唐詩蘊蓄。宋詩發露。蘊蓄則韻流言出。發露則意盡言中。愚未嘗貶斥宋詩。而趣向舊在唐詩。故所選風調音節。俱近唐賢。從所尚也。若樂府及四言。有越唐人。而竊攀六代漢魏者。所云雖不能至。心嚮往之。詩人名下。未詳生平者。祇載其表字。省分郡邑。與夫科目官位之有無。若傳志可考。軼事可傳。詩話可引。或詳或略。輒綴評論。使讀者得其詩品。并如遇其爲人。

卷中有科目者。一以科目之先後爲次。無科目者。約以輩行之先後爲次。世祖十八年。俱先科目而後詞人。聖祖六十一年。若準此例。恐輩行之先後。太相懸矣。故三分二十年。科目詞人。相間次第之。世宗朝。及今上二十五年以前。仍準世祖朝之例。

人之無名位者。一生無他嗜好。惟孳孳矻矻於五字七字之中。而忽焉徂謝。苟無人焉表而章之。人與詩歸。無何有之鄉矣。予與同人。遠近徵求。志其生平。聊存發潛闡幽之意。

閨閣詩。前人諸選中。多取風雲月露之詞。故青樓失行婦女。每津津道之。非所以垂教也。選本所錄。罔非賢媛。有貞靜博洽。可上追班大家。韋逞母之遺風者。宜發言爲詩。均可維名教倫常之大。而風格之高。又其餘事也。以尊詩品。以端壺範。誰曰不宜。

國初詩僧。有棄儒而逃入禪學者。詩自激昂頓挫。錚錚有聲。其後多習口頭禪說。以偈爲詩。卽有稍知向學者。亦祇奉弘秀集一類爲金針。於源流升降。茫然於中也。廣爲蒐羅。共得四十三人。中有能讀儒書通禪理者。格外賞之。

詩中有相沿誤用者。如孤負之誤辜負。李陵答蘇武書。孤負陵心。陵雖孤恩。杜詩。孤負滄洲。願韓詩。孤負平生志。皆是也。辜與負不協。疑丞之誤疑丞。左輔右弼。前疑後丞。疑謂有疑而問也。疑字何解。蒼黃之誤倉皇。北山移文。蒼黃反覆。杜詩。形勢反蒼黃。昌黎文。值吾南逐蒼黃。分散柳州。文數州之犬。蒼黃吠噬。宋人以後始有倉皇。閨閣之誤閨閣之婦人。又相臣遵尊居閣。故文翁傳。使教令出入閨閣。注謂唐以前宜閣。宋以後宜闈。爛漫之誤爛熳。爛熳見魯靈光殿賦。說文。玉篇。並無熳字。匡襄之誤劬勤。匡襄猶贊襄也。劬勤急遽貌。楚辭。達此世之動勤。杜牧詩。誤認濫觴爲末流。家語。孔子曰。江始出於岷山。其源始於濫觴。濫泛也。觴。酒杯。清和爲四月。仲春之月。時和氣清。謝靈運詩。首夏猶清和。言四月猶大也。近人多以濫爲爛。以觴爲傷矣。清和爲四月。仲春之月。時草亦未歇也。後人有四月清和。兩乍晴。句失卻猶字義矣。此類不可枚舉。他如委靡靡聲。上字。百揆揆。上字。

之類。無平聲者。誤讀平聲。漕字。雍字。丈人行行字。冗長長字之類。有兩音者。總讀平聲。衛有漕邑。平聲。運

辟雍。平聲。雍州之雍。去聲。行列之行。平聲。輩朝請之請。非上聲。宜讀去聲。漢律。春朝曰朝。寧馨之寧。非平

行之行。去聲。長短之長。平聲。冗長之長。去聲。朝請之請。非上聲。宜讀去聲。秋曰請。同覲音。寧馨之寧。非平

聲。宜讀去聲。張謂詩家無阿堵物門有寧馨亦不可枚舉。集中一校正。恐外間溺於俗本。轉以為謬。故

一論列之。

清詩別裁目錄

第一冊

卷一

慎郡王	蘊端	德普
弘曠	恆仁	博爾都
塞爾赫	李澄	楊思聖
魏裔介	魏象樞	趙賓
李蔚	王紫綬	馮溥
宋琬	蔣超	王熙
宋徵輿	鄧旭	李敬
繆慧遠	曹垂燦	沈永令

卷二

清詩別裁目錄

卷三

施閏章	季開生	董文驥
王廣心	王庭	周體觀
盧紘	周茂源	許纘曾
沈荃	湯斌	程可則
曹爾堪	顧大申	王士祿
金漸皋	李來泰	黎士弘
王士正	馮雲驤	邱象升
嚴沆	汪琬	
卷四		
曹申吉	劉體仁	秦松齡
閔鉞	王揆	丁澎
王日藻	董舍	彭襄
沈自南	王澤弘	陸鳴珂

一



方兆及 錢陸燦 計東

田茂遇 曾 晫 章在茲

陳廷敬 鄒祇謨 高 嘒

李念茲 徐文烜 張一鶴

卷五

李天馥 孫一致 錢中諧

許 虬 王又旦 嚴允肇

顧 岱 徐元文 葉方藹

彭孫遜 黃與堅 田 雯

董 俞 曹貞吉 崔 華

卷六

馬世俊 張玉書 葉映榴

孫 蕙 吳 光 王維坤

徐延壽 褚 篆 趙士喆

劉獻廷 徐振芳 沈道映

陸元輔 陸宗維 陸元泓

徐 波 侯 涵 劉逢源

吳兆寬 閔麟嗣 吳嘉紀

沈 磐 蔣平階 李 鄴嗣

王猷定 戴本孝

卷七

曾傳燦 蕭 詩 毛會建

董以寧 陳子升 何嘉延

張可度 沈欽圻 梁 逸

阮旻錫 陶 澂 趙與榘

董 闈 郁 植 徐 柯

文 點 陳 珏 陸 進

卷八

朱爾邁	韓純玉	魏際瑞
王遵坦	朱徽	舒忠讜
陳恭尹	董道權	任元祥
柳文	夏熙臣	蔣洸
吳祖命		
姚文焱	吳綺	黃雲
宗元鼎	潘高	惲日初
方膏茂	張宸	路鶴徵
范超	柴紹炳	沈謙
虞黃昊	陸圻	毛先舒
張丹	陸嘉淑	郭襄圖
顧萬祺	盧元昌	胡渭生
吳爻	譚吉瑄	朱克生

清詩別裁 目錄

第二冊

卷九

俞南史	黃九河	王孫晉
韓昌	王邦畿	梅磊
錢曾	吳物榮	卓爾堪
黃埴	嚴我斯	周弘
曹禾	勞之辨	趙士麟
盛符升	劉梁嵩	
方殿元	吳元龍	繆彤
張英	張玉裁	魏麀徵
汪懋麟	顏光敏	喬萊
方象瑛	陳玉璠	傅昂霄
徐乾學	王揆	王士禎

三

孟亮揆 李振裕 許孫荃

葉燮 盧道悅 顧貞觀

卷十

韓 茨 王鴻緒 徐 倬

李基和 徐元夢 成 德

邵 瓊 彭定求 胡會恩

翁叔元 陳錫嘏 王頊齡

張榕端 王吉武 高層寰

葉舒崇

卷十一

毛奇齡 李因篤 尤 侗

陳維崧 嚴繩孫 龐 埴

汪 楫 朱彝尊

卷十二

潘 耒 徐 鉉 李澄中

徐嘉炎 陸 棻 邱象隨

倪 燾 袁 佑 高 詠

馮 勗 王 昊 鄧漢儀

孫枝蔚 盛 楓 陳王猷

趙執信 李孚青 王材任

沈朝初

卷十三

梅 庚 彭寧求 金德嘉

許汝霖 史 夔 馮廷樞

周金然 王九齡 尤 珍

吳 苑 宋 榮 高士奇

吳興祚 謝重輝 孔傳鐸

孔尙任 丁 煒 吳秉謙

卷十四

孫元恆  
孫寶侗  
江閻  
戴梓

周箕  
俞瑒  
顧有孝

顧樵  
周肇  
顧湄

許旭  
王撰  
王抃

王據  
王曜升  
王曾斌

袁啓旭  
李良年  
黃始

葉世佺  
輝格  
佟世臨

陳維岳  
鍾映淵  
馬世傑

金侃  
徐夜  
丁耀亢

張實居  
張篤慶  
錢柏齡

吳麀

卷十五

吳雯  
馮樾  
楊岱

劉淑頤  
邵長蘅  
張宮

陸次雲  
章靜宜  
顧景星

汪徵遠  
汪洪度  
汪洋度

卷十六

彭始奮  
陶嶽  
查容

潘鏐  
彭桂  
彭極

吳之振  
崔岱齊  
龐鳴

周穉廉  
洪昇  
毛師柱

陳學洙  
李國宋  
李馥

史駢生  
藍啓肅  
馬之鵬

徐元正  
汪灝  
施何牧

黃庭  
梁佩蘭  
湯右曾

卷十七

第三冊

卷十八

唐孫華	田從典	趙俞
陶元淳	史中義	吳暉
徐賓	董思凝	孫致彌
張尙瑗	查昇	陳大章
陸寅	沈名孫	惠周惕
陳鵬年	黃叔琳	高孝本
姚弘緒	程文正	姚士陞
顧圖河	呂履恆	陳璋
張逸少	高其倬	修法海
周起渭	焦袁熹	謝方琦
何梅	沈育	王焜

卷十九

許遂	周士彬	嚴虞惇
姜宸英		
汪士鋐	徐發	陳蓑
宋聚業	鄂爾泰	張遠
魏坤	汪繹	張廷玉
楊汝穀	陸師	許迎年
楊守知	徐昂發	查嗣璫
徐永宣	蔡壘	陳沂震
許涓	費洪學	劉師恕
秦文超	黃任	陳睿思
王氏丹	蔣廷錫	張自超
何焯	吳廷楨	吳瞻淇

卷二十一

章藻功	查慎行	陳至言
喻成龍	曹寅	揆敍
鈕琇	于養志	管掄
陶孚尹	張養重	沈受宏
陸韜	方登嶧	濮淙
楊賓	王戩	顧希喆
許潤	毛世楷	楊模
沈峻	沈鍾彥	沈紹姬
張衍懿	孫中岳	謝志發
姜實節	吳祖修	陳炳
文揆	李必恆	孫元衡
蔣景祁	朱載震	陳于王
王丹林	顧嗣協	李寅

清詩別裁目錄

卷二十二

王錫	俞焜	劉石齡
黃中堅	沈廉	翁荃
卜煥		
劉青藜	王萃	吳士玉
嵇曾筠	俞兆晟	蔣綱
鄭任鑰	喬崇烈	徐用錫
張麟書	繆沅	張大受
惠士奇	張照	秦道然
李紱	方式濟	呂謙恆
方覲	吳翊	
卷二十三		
張景崧	蔣仁錫	王時憲
黎志遠	王世琛	沈樹本

七

徐葆光 顧嗣立 杜詔

王圖炳 程夢星 舒大成

林佶 虞景星 任蘭枝

吳襄 唐建中 張梁

謝遵王 顧陳墉 尤秉元

張弘敏 吳廷華

卷二十四

徐陶璋 凌如煥 余敏紳

楊士凝 潘其燦 翁志琦

張廷璠 鄭江 鄭升恆

宋照 王恪 王懋竑

吳家駢 萬邦榮 鄭世元

厲鶚 方正璣 葉士寬

許廷鑣

卷二十五

黃之雋 儲大文 謝道承

陸奎勳 柯煜 蔣恭棊

馬維翰 沈懋華 魯曾煜

李鍼 甘曰懋 王恕

邵泰 儲雄文 蔣深

魏荔彤 王濤 李蓮

計默 湯準 徐善建

王汝驥 陳奕禧 郭元鈺

顧文淵 嚴啓煜 汪文桂

汪文柏 費錫琮 費錫璜

陳玉齊 徐蘭

第四冊

卷二十六

沈用濟 毛張健 毛序

陳培脈 張錫祚 蔣廷鏞

殷譽慶 李嶠端 張元昇

夏弘 廖燕 劉祖啓

王文潛 黃河激 翁誥

吳之麟 先著 李崧

周龍藻 周在延 錢良擇

陸彥 陳鍊 朱經

徐恪 顧紹敏

卷二十七

金志章 姚湘 邵錦潮

曹庭樞 陳祖范 繆曰芑

潘果 尹會一 陶正中

徐以升 金鳳綸 王峻

李重華 俞荔 張鵬獅

曹鑾 劉青芝 吳履秦

曹一士 馬樸臣 張映斗

張一鳴 王時翔 饒音布

劉廷璣 蔣錫震 徐夔

鄭鈺 劉震 吳承泰

張安絃 徐洪鈞

朱奕恂 王景琦 侯銓

葉舒璠 宋樂 鄭玉珩

葉永年 方還 方朝

程鳴 顧我錡 周遠

朱厚章 謝芳連 孫宏



吳學濂 劉正誼 曹煜曾

曹炳曾 曹煥曾 秦時昌

周瓚 劉宗需 沈源

趙關曉 周振采 王應奎

湯懋統 趙虹 王泌

陳倫 沈炯 程簡

蔡書升 余京 秦應陽

徐翔鷗 葉肇梓 汪紹焄

邵錫榮 錢錦城 安期

卷二十九

錢之青 張若需 包彬

倪承茂 鈕汝駢 舒瞻

張進 夢麟 孫貽武

吳槃 林明倫 張畹

張鈺 金義植 尤怡

江聲 周天藻 陳燦霖

陸文銘 李璧 馬長海

金縉 周京 方肇夔

繆宗儼 洪嘉植 朱瑄

周杭 俞玉局 翁格

陸蒼培 殷再巡 華龍翔

劉瞻榕 馮嗣京 宋匡業

陳葉筠 張瑄 張嵩齡

程之鵠 席鎬 周孝學

李果 韓騏 高日新

馬位 程樊 蕭趙琰

汪天興 吳瞻泰 計元坊

徐志巖

卷三十

高述明

高斌

鮑鈇

柴靜儀

王慧

徐氏

李鏜

陳景元

高岑

張氏

龐晚

吳永和

姚世鈺

姚世鈞

邵岷

丁瑜

張令儀

徐昭華

謝淞洲

吳定璋

黃子雲

孫淑

金氏

彭氏

翁照

錢源來

楊澹

王煒

王瑤湘

朱柔則

李進

過春山

周永餘

張學典

張凌仙

顧英

周準

盛錦

汪俊

周淑媛

張葵

沈樹榮

朱受新

王大椿

李勣

瑯琊女子

葉榜

侯承恩

卷三十一  
以下閩  
秀詩

紀映淮

錢鳳綸

畢著

林以寧

張氏

倪瑞璿

章有湘

錢敬淑

吳琪

方京

陳珮

蔡琬

吳綰

侯懷風

吳氏

楊珊瑚

吳雯華

沈蕙玉

倪仁吉

范姝

熊湄

周淑履

姚世鑑

姚益敬

清詩別裁  
目錄

毛秀惠

許飛雲

許孟昭

許楚畹 陳奇芳 周巽

汪瑤 吳若華 宋凌雲

許權 尹瓊華 韓韞玉

楊克恭 金順 袁機

卷三十二 以下僧詩

戒顯 止崑 南潛

實訥 顯謨 海遐

同揆 大燈 大瓠

函可 本源 大寧

成鸞 大成 海岳

天定 僧殘 超遠

曉音 性休 德元

通岸 古芸 智朴

宗渭 願光 溥畹

元龍 大寧 元璟

容 然修 岑霽

德亮 佛暢 德暉

超源 妙復 律然

元祚 明印

# 清詩別裁

## 卷一

慎郡王

紫瓊主人。著有花間堂詩鈔。○王勤政之暇。禮賢下士。靈宗元人。詩宗唐人。品近河間。東平而多能游藝。又間平所未聞也。

灌花

階砌羅羣芳。宛然如藻績。照日相鮮新。臨風各向背。肝睢忘憂子。淡焉此靜對。榮謝寄流轉。采色看迭代。體茲造化心。澤物恐不逮。園丁汲井欄。時時自灌溉。題雖灌花。意在澤及庶物。胸次正大。於觸物處抒寫之。

樵歌

不聞人聲。但聞斧聲。寂寂巖響。答丁丁。飛鳥驚。得柴換酒。醉歸踏月山歌清。友木石。無衰榮。白雲流水自朝暮。萬山漠漠煙光青。起手八字寫盡空山伐木神理。

月夜臺上聽友人彈琴

高臺夜色深。月下聞清琴。能使座中客。俱生塵外心。石泉瀉寒碧。霜竹折孤音。曲罷長天靜。忘言一整襟。只寫琴理。不形容琴聲。與常建江上琴興同一清絕。

村夜

旅舍燈猶在。村人語漸稀。山兼寒月靜。葉帶暗霜飛。廐馬嚙槽櫪。鄰雞唱翠微。煙霞愁殘夢。幽思滿柴扉。

圓明園召看煙火恭紀

銀漢星橋不動塵。斜飛火鳳入勾陳。一聲雷起地中蟄。萬樹花開天上春。太乙高樓燈似晝。未央前殿月移輪。君王行樂新年盛。先使恩光逼近臣。

雙徑

客去自掩關。林深鳥聲靜。徘徊夕陽中。秋烟澹孤影。秋烟五字。如出賈長江手。

邦均野寺

僧罷夕陽鐘。客懷正孤絕。山鳥下空林。白啄茅簷雪。五言絕。唐人以古淡勝。此又以清瘦見長。

七夕

銀河脈脈渡雲駢。未擬穿針倚畫屏。獨向閒階風露下。夜深無語拜雙星。

蘊 初名岳端。字兼山。號紅蘭主人。安和親王子。著有玉池生稿。○主人禮賢下士。端士。鄰校之列。時來座下。嘗選郊島詩。以示不棄寒瘦之意。其志趣可知矣。

春郊晚眺次韻

長隄一望夕暉斜。芳樹枝枝待暮鴉。西嶺生雲將作雨。東風無力不飛花。嬌鶯細囀留清晝。孤鶩徐飛帶晚霞。野客獨扶藜杖遠。柳陰深處覓漁家。清揚圓轉。元人中在。陸照磨宋子虛之間。

題閨秀朱柔則寄外沈用濟畫卷

柳下柴門傍水隈。天桃樹樹又花開。應憐夫婿無歸信。翻畫家山遠寄來。

德

普字修菴號香松室主人封  
鎮國公任宗人府右宗正

中秋無月

誰道秋雲薄。中宵掩桂輪。姮娥開鏡懶。愁殺倚樓人。於無情處寫情  
得唐人三昧

弘

嚙號思敬主人  
任右宗人

值宿開烏夜啼

值宿霜寒夜。蟾光瓦欲流。啞啞聽鳥語。歷歷數更籌。已傍龍樓穩。能銷弩矢憂。雞竿應有兆。計日下皇州。

樂府解題。聞烏夜啼。明當有赦。  
指宋元嘉時事也。末一句本此。

恆

仁字月山原封輔國公。以父失職。并月山亦去公爵。○乾隆甲子歲。月山以韻語來學。授以唐詩。正聲造詣日進。吐屬皆山水清音。北方之詩人也。丙寅冬。予請假歸里。送至江干。明年還

朝。月山已沒矣。詩卷零  
落。存此二章。志共大概。

玉泉禪院

道人種松罷。傍水開禪關。春風吹不到。白雲相與閒。偶尋林外約。引我過前山。倚杖看奇石。徘徊殊未還。

孟山人  
風格

南西門外卽目

澄潭初月影微微。雨過涼生透葛衣。十里亂蟬風兩岸。藕花香送釣船歸。

博爾都字問亭。號東皇主人。封輔國將軍。著有問亭詩稿。

送友之粵東

相送粵東去。深憐客舍寒。秋風摧木葉。憶爾下南安。馬首五千里。猿聲十八灘。扶胥海口過。眼界倍教寬。

雁

零露冷汀洲。歸鴻度小樓。秋心齊喚起。不止動邊愁。

寒爾赫字曉亭。封奉國將軍。任官兵部侍郎。○曉亭遇能詩人。雖樵夫牧豎。必屈已下之。固以詩爲性命者也。辨唐宋之分如灑澗。然身後詩爲夫已氏所編。不免以中駟爲上駟矣。知詩者惜之。○有佳句云。一水別殘照。孤村入暮烟。宋朝南渡君稱姪。周室東遷帝是侯。忘其全篇。附錄於此。

荆卿墓

身入虎狼國。心空百二州。壯懷生死外。易水古今流。白日淡將夕。行人去不留。墓傍誰擊筑。寂寞野花秋。

有如此筆。方許作荆卿墓詩。

白芍藥

珠簾入夜捲瓊鈎。謝女懷香倚玉樓。風暖月明嬌欲墮。依稀殘夢在揚州。

與無情有恨何人見。月曉風清欲墮時。同一取題之神。

李 溼字鏡月江南興化人順治乙酉舉人著有敦好堂詩鈔

望羅浮歌

我聞博羅一山拔地起。邈絕霄漢橫蒼煙。何年蓬萊卷石浮海至。丹梯翠棧相鉤連。自注南越志山本蓬萊一合而爲一。僊靈窟宅萬古在。是爲朱明耀真之洞天。其間琪花瑤草蔽崖谷。碎訇鉦鼓鳴層巔。石樓玲瓏員嶠見。鐵橋翠窺青冥懸。五嶺迢遞不得到。梅花村畔魂夢牽。竭來道上聞玉女。指點金支璇闕虛無間。豐隆列缺手劈坤維。水簾千丈海風倒吹。葱蘢見怪竹。呀啞聽碧雞。更有蛺蝶大於斗。五色絢爛雌雄飛。下與三茅通洞壑。上與列宿爭光輝。吁嗟乎。羅浮之勝有如此。只今相望疑尺咫。我欲移短筇。裹糧偕諸子。手弄羅浮之青霞。口饜羅浮之石髓。伏虎巖前天樂鳴。飛雲塢外狂歌起。三更峰頂見海日。滄溟一片浮紅紫。李白平生最好奇。浪傳失足墮蒼耳。何似青鞵布襪萬里遊。矯首扶桑接弱水。望羅浮。情無已。羅浮本仙人宮闕寫此題自應有飛仙之氣。

登五老峰

灑霍岩巒漫比倫。自注黃帝以灑霍二山爲南岳副漢武帝以衡山遐遠乃徙南岳之祭於廬山灑山。五峰拔起劈崑崙。泉流峭壁虹蜺挂。石壓枯藤虎豹蹲。下界鴻濛疑未闢。太空星漢欲高捫。讀書頭白匡山後。怪爾青蒼萬古存。

楊思聖字猶龍直隸鉅鹿人順治丙戌進士官四川布政使著有且亭集



入棧紀行

極望峰巒稠。雲飛常沒頂。空翠霑衣裳。墮作澗溪影。花鳥亂聽聞。心眼細細領。晞陽射碧潭。石粼碎光炯。蒙籠草成陰。樹老身戴屨。山鬼時一嘯。蕭蕭毛髮冷。前行隔後行。後嶺迷前嶺。

暮投黃牛宿。荒垣洩炊煙。樹柵防虎過。昏黑燈火連。旅食敢求餘。菽麥性所便。屋角枕巨壑。水石聲潺湲。勞生驚物役。憂心中夜煎。起坐當語誰。仗劍淚漣然。

棧雲易爲雨。朝行蒙霧露。崖樹架連橋。奔流澗石怒。攀緣爭一隙。時防馬足誤。山禽鳴翠屏。幽陰衆壑赴。始知所歷高。下見夜來路。壯懷在馳驅。漫自賦感遇。

客子悲遠道。旅途未遑安。整裝凌晨發。帶雨度柴關。灘石相春激。雲生暗峯巒。步滑屢欷仄。衣濕何時乾。強顏慰僮僕。談笑輕波瀾。中情默自傷。何能駕羽翰。胎原少陵入蜀諸詩而不襲其面目。

魏裔介字石生。直隸柏鄉人。順治丙戌進士。官至大學士。補謚文毅。著有兼濟堂集。○國朝諸大典。牛風文毅奏議所定學宗朱子。著有約言錄。知統錄。諸書風節。侃侃時稱。二魏。謂公及敏果也。

薤露歌

波流湯湯。逝不竭兮。出日入月。景不滅兮。人命無常。遞相閱兮。用意高於原辭。

將歸操

河之水分波洋洋。我不濟兮非無梁。迴車東望涕沾裳。

送宮紫玄歸廣陵

秋盡寒山出。羈人不可留。劍光衝暮雨。霜氣冷征裘。薊北黃金貴。淮南桂樹幽。送君從此去。濯足大江流。

魏象樞字環極山西蔚州人順治丙戌進士官至刑部尙書謚敏果○公爲本朝直臣第一彈劾必

任都御史時特命巡察畿輔擢除尤見風力歸田後書數千卷外無長物嘗笑曰尙書門第秀才家風又可想其清節矣。

哭友

昔年乍去身猶健。昨夜空傷萬里魂。海上鱷魚驕白日。庭前鵬鳥下黃昏。遺書暗灑孤臣血。垂死仍銜故

國恩。最是聖朝容直諫。許君骸骨葬平原。此貶官海南發於戌所者。

趙賓字錦帆河南陽武人順治丙戌進士著有學易菴詩。

海口柬李芳洲

積水流天外。茫茫萬里秋。估船經島國。潮響到城樓。浩蕩乾坤小。奔騰日月浮。蓬萊君咫尺。果否有滄洲。

長安喜逢彭禹峯

湖海元龍氣未除。雄心寂寞付樵漁。鱗開北海新桑落。膝抱南陽舊草廬。倜儻指揮天下事。才華驅使古

今書。合香朝罷門庭冷。掃逕同君賦子虛。

送孫九畹僉憲蜀中

畫省人空鳥晝啼。使君持節漢江西。驛亭虎鬪驚鄉夢。棧道蛇盤怯馬蹄。荒服舊傳鹽井遠。烽烟近報雪山低。蠻方萬里歸王會。漫向甘泉說碧雞。虎鬪蛇盤十四字。初撰寫之。而一歸於穆。

贈巢梅峯候調旋里

此日纔聽故國鐘。風吹石岸冷芙蓉。河魚曉進高堂膳。蠟屐晴登少室峯。十載還鄉人老大。三春伏枕夢從容。草堂暫臥仍須出。未許香醪醉菊松。十載還鄉。巢之旋里也。三春伏枕。己之懷巢也。

李

雷字坦園。直隸高陽人。順治丙戌進士。官至大學士。謚文勤。

舟發浦城

地形下東南。灘溜如箭疾。客行衝霧雨。扁舟僅容膝。鄰鄰沙痕高。齒齒石鋒密。礧礧中流。鉅細狀非一。狹逼驚濤飛。深沸漩渦溢。舟楫巧紆避。簸盪神先怵。篙師一失手。勢與洪流汨。眩眼雜卉稠。送客奔崖翠。駭奇豫初覽。過險怕縷述。乘流怪浮生。坎止私願畢。

初發都門

六年束吏舍。所向困局迫。出郊茲晨始。豁若樊籠釋。望山懷故棲。遵途感新陌。回首魏闕高。塵沙黯將夕。微軀墮世罟。拮据事行役。豈無四方志。悲與親愛隔。曠寂均苦樂。浮生安所擇。起滅情無端。沉思莫能擲。

宗法澆體不流入於  
駒輟猶得謝公遺意

### 楓嶺

楓嶺與梨嶺南北相拱揖。石脈固潛通。蟠峙各獨立。林木互糾紛。亂峯森巖巖。其巔判閩浙。風土隔邦邑。躋崖俯絕谷。轉道僅微級。凌空危橋滑。束澗鳴溜急。負擔盡游估。攀緣如蟻集。傷哉營微利。走險詎夙習。下見稻畦人。驚客舉篋笠。馳驚違所性。邁迥增憂色。

### 喜晤孫星衡社丈述贈

昔判長安袂。烽烟障薊邱。窮交惟我在。遠道爲君愁。豈意三年別。同爲萬里遊。晤言如夢寐。於邑豈能酬。  
一體  
一氣

### 送楊賢甫副憲祀華嶽江濱

聖代懷柔秩典章。首嚴岳瀆奠金方。中丞暫假祠官節。宗伯親頒御府香。挺秀三峯連漢峙。安瀾萬里下瞿塘。新秋莫訝無殘暑。驛路風清白簡霜。

王紫綬字馨航河南祥符人順治丙戌進士官翰林出爲浙江糧儲道著有知咫堂詩集

### 送潘世衡內陟少宗伯

從龍仗策自關東。江上頻行御史驄。錢穀暫煩蕭相國。儀文終藉叔孫通。百年禮樂方開闢。一代車書欲

混同。天子垂裳問民事。入朝應奏未央宮。

馮

薄字孔傳山東臨朐人順治丁亥進士官至大學士謚文毅○文毅力薦魏環極為名臣在閣不說隨不矯激詩以雅正為主不爭長於字句之間

漢文帝幸代國

漢帝當年歌大風。歡留父老樂融融。誰知將和調後。更有君王賞讌同。每飯未嘗忘鉅鹿。故居猶是念新豐。旌旗十萬雲中駕。休擬登臺出塞雄。從高帝歌風一氣直下第六語又復回環結意見異於武帝之鑿武此種篇法惟少陵有此變化入神

宋

琬字玉叔山東萊陽人順治丁亥進士官浙江按察使著有安雅堂集

先大夫諱日

墜葉豈更榮。流波無重回。哀哀古孝子。痛哭嗟瓶罍。喟余少薄祜。賦無凌雲才。側聞過庭訓。愛惜如瓊瑰。弱齡把鉛槧。慈顏為之開。乾坤當百六。梁木忽然摧。譬彼玄鳥雛。巢傾雕梁災。譬彼松下草。霜落成枯荄。自我歌鮮民。星紀凡屢該。況乃忝符節。隴山崔以巍。松阡渺何處。莫翦蒿與萊。飄蕭生素髮。膝下無嬰孩。緬想夜臺內。惻惻傷其懷。誓言守遺教。敢令官方乖。庶以清白風。稍酬罔極哀。敘述生平而誓守庭訓以肅官方是能遺親以令名者知循吏即是孝子

贈蜀中李鵬海進士

昔君射策明光宮。騰驥燕市驂臨空。誰遣妖星逼天闕。鼎湖竟墜烏號弓。小臣攀髯死未得。重繭萬里還

鄉國劍閣嗟戰血腥。豺狼竊據昏巴夔。八口淒涼何所歸。窮途卹免寒與飢。長鑱作伴拾橡栗。短褐不完歌采薇。清渭灘頭釣魴鯉。誅茆結屋將已矣。亭邊呵止故將軍。驢背誰知前進士。青鞵竹笠秦川來。登高懷古義皇臺。酒酣拔劍鸚鵡舞。夢回巫峽秋猿哀。達人自古嗟飄蕩。鼓刀而屠太公望。天子宵衣問隱淪。徵書旦夕礮溪上。

鵬海歸於蜀亂之後於其行也作詩以憐憫而慰勞之

### 從軍行送王玉門之大梁

有客有客髯而紫。左挾秦弓右吳矢。自言家本關中豪。黃金散盡來江沚。年來倦上仲宣樓。裹糧且訪侯嬴里。腰間匕首徐夫人。河畔荒邱魏公子。懸知弔古有深愁。慷慨登車不可止。自從盜決黃河奔。大梁未有千家村。烽火但增新戰壘。塵沙非復古夷門。短衣聊向將軍幕。長劍終酬國士恩。落日驅車臨廣武。春風試馬出轅轅。丈夫佩印乃恆事。安能鬱鬱老邱樊。王郎顧我深歎息。一見歡喜如舊識。此行不但爲封侯。人生貴在抒胸臆。江上楊花白雪飛。梁園芳草青袍色。盾鼻猶堪試彩毫。鶯聲聊爲停珠勒。醉後狂歌氣若雲。軍中教戰容如墨。春風拂地車斑斑。起看明月攬刀環。平臺賓客久零落。至今汴水空潺湲。憐予偃蹇風塵際。年來磬折凋朱顏。已知苦被雕蟲誤。強弩欲挽不可關。待爾他年分虎竹。相從射獵終南山。

### 棧道平歌爲賈膠侯尙書作

君不見梁州之谷斜與褒。中有棧道干雲霄。仰手可以捫東井。下臨長江浩汗洶波濤。大禹胼胝恐未到。

帝遣五丁開神臯。巨靈運斧地維圻。然後南通巴蜀西羌鬃。蛇盤縈紆六百里。千迴萬曲緣秋毫。懸車束馬弗可以徑度。飛騰絕壁愁猿狖。漢家留侯真婦女。烈火一炬嗟徒勞。噫嘻乎。三秦之人困征戍。軍書蠶午如蝟毛。銜枚荷戈戟。轉粟窮脂膏。估客爾何來。萬里競錐刀。須臾失足幾千仞。猛虎蝮蛇恣貪饕。出險灑酒始相賀。燐燐鬼火聞呼號。秦運開。尚書來。恩如雨露威風雷。一呼集舂鍤。再呼伐薪柴。醇醴澆山萬夫發。坐看巉巖削盡爲平埃。噫嘻乎。益烈山澤四千歲。火攻莫救蒼生災。昔也商旅魚貫行。今也不爰狼與豺。昔也單車不得上。今也康莊之途足以走連轡。焚童巴舞貢天府。桃笙寶布輸邛峽。歌豳風。擊土鼓。賈父之來何晚哉。豐功奕奕垂萬禩。經濟不數韋臯才。中朝袞衣待公補。璿璣在手平泰階。西望劍閣高崔巍。側身欲往空徘徊。大書深刻告來世。蛟龍岌巖磨青崖。金穿石。澗陵谷。徒我公之功不與伏波銅柱同塵埋。賈中丞名漢復。平險爲夷。因作歌以頌之。歌勒於觀音彌崖石上。

喜表弟董樵書至

數枉山中信。江湖問逐臣。憐予常作客。知爾尙依人。刀俎驚前夢。漁簑老此身。故園風俗薄。猶有葛天民。  
馮唐墓

馮公昔未遇。執戟歎淹留。一薦雲中守。能寬漢主憂。古碑荒薜合。高柳暮鴉秋。自笑爲郎拙。蕭蕭欲白頭。  
送傅介侯督餉寧夏

賀蘭西望鬱嵯峨。使者乘春攬轡過。三輔征輸何日盡。二陵風雨至今多。邊城楊柳樓中笛。羌女葡萄塞下歌。君到坐傳青海箭。不妨草檄倚瑯戈。七子遺賢尤近滄溟。

夏瑗公先生廿載淺土門人盛珍示卜地葬之以其夫人耐焉詩以誌美

幾年松檟缺經營。負土荒原賴友生。曾賦國殤哀翟義。竟無傭保付王成。月明大鳥來華表。劍合雙龍捲素旌。二陸冤魂應共語。雲車風馬笑相迎。使事典切。六語見夫人耐葬。結但取冤魂及同爲雲間人意。機雲身分地位不必同也。

賀會庭聞舉孝廉庭聞江右人。易名中秦榜。

誰言才子竟蹉跎。天馬西來萬里過。名姓在秦張祿貴。文章入洛陸機多。漢廷佇奏凌雲筆。羌笛爭傳出塞歌。隴上梅花憑驛使。好將雙鯉下黃河。

同東雲雛王心古諸君登華山雲臺峯

丹梯千仞倚嵯峨。萬轉盤紆出薜蘿。少華西來朝白帝。太行東望走黃河。欲從玉女窺蓮井。須向仙人借斧柯。樸被同君星漢外。方知天上白榆多。

華嶽

遙遙青黛削芙蓉。此日登臨落雁峯。霄漢何人騎白鹿。天門有路跨蒼龍。流沙弱水眞杯勺。太白終南盡附庸。卻憶巨靈開闢日。神功臺籥費陶鎔。



松風謾謾步虛聲。杖策高尋衛叔卿。星近祠壇光欲墮。月臨仙掌夜偏明。扶桑萬里天雞曙。箭括三更石馬鳴。誰信揚雄擅詞賦。不將綵筆記層城。舉頭天外幾許落墨。不愧五岳起方寸語。

報唐采臣戶部時自寧夏還朝

使君書札勸加菑。又報征車發賀蘭。秦地關山留庾信。漢家鹽鐵問桓寬。飛鴻夜度朱弦冷。邊馬晨嘶白草寒。遷客隴頭憔悴甚。故人傳語到長安。

登西嶽廟萬壽閣

崔嵬傑閣玉爲寮。白帝離宮倚絳霄。檻外河山三輔小。嶠前觴豆百靈朝。明星環佩雲來濕。仙掌芙蓉雨欲搖。會御長風凌絕巘。青鸞背上夜吹簫。

鸚鵡

雕籠萬里托征鞍。辛苦何辭行路難。幽閣恰添嬌女伴。方音猶作部民看。且分薄俸供秬稻。莫遣春風瘁羽翰。流水隴頭相憶否。朔雲邊月不勝寒。

送張蔚生明府之任劍州

棧閣崔嵬涪水西。芙蓉十二與雲齊。幾年漢使迷金馬。萬里江流見石犀。講學文翁今再覲。勒銘張載有新題。相思愁殺峨眉月。山木蒼蒼杜宇啼。

九日同姜如農王西樵程穆倩諸君登慧光閣

塞鴻猶未到蕪城。載酒登樓雨乍晴。山色淺深隨夕照。江流日夜變秋聲。上方鐘磬疎林滿。十里笙歌畫舫明。空負黃花羞短髮。寒衣三澗客心驚。悲壯沉鬱。

刀魚

銀花爛漫委筠筐。錦帶吳鉤總擅長。千載專諸留俠骨。至今七箸尙飛霜。

舟中見獵犬有感

秋水蘆花一片明。難同鷹隼共功名。檣邊飽飯垂頭睡。也似英雄髀肉生。

蔣

超字虎臣。江南金壇人。順治丁亥。賜進士。第三人。官翰林院編修。著有綬菴集。

金陵舊院

錦繡歌殘翠黛塵。樓臺已盡曲池涇。荒園一種瓢兒菜。獨占秦淮舊日春。極瀟灑地。偏寫得荒涼如許。感慨係之。

文殊院

紫玉屏風敞佛筵。諸峯如笏上青天。偶來山寺空無主。驚起白猿松際眠。

王

熙字子雍。直隸宛平人。順治丁亥。進士。官至大學士。謚文靖。

春日扈從南海子觀大蒐

上苑回春馭。傳呼夜漏催。六龍雲裏下。八陣日邊開。細草鳴鸞地。雄風買駿臺。應知宸算遠。不為詰戎來。

宋徵輿字轅文江南華亭人順治辛亥進士官至副都御史

參軍行

檀州軍敗涉南陷。鐵騎西山逼雲棧。九門辛苦坐公卿。按兵不動有高監。玉堂美人胡不平。上書北闕苦論兵。參軍新命一朝下。單騎夜出長安城。是時主將盧司馬。獨將西兵兵力寡。不教國士死黃沙。別遣參軍向城下。參軍不行司馬噴。參軍既行軍伍陳。北向再拜謝至尊。曰臣象昇死國恩。鼓聲闐闐軍出壘。司馬一呼創者起。三萬邊兵夜合圍。孤軍雖勝終鬪死。朝廷頗輕死事功。翻疑訟疏多雷同。司馬幾受斷棺慘。參軍一官成轉蓬。嗚呼權臣報復有如此。疆場誰肯據孤忠。此紀賈莊之敗也。高監名起。潛參軍楊廷兵。高起潛擁兵坐視。忠烈與大軍戰。重創死。嗣昌誣以降。又誣以遁。幾至斲棺。廷麟力辯其寃。得免。忠佞顛倒如此。明社所以屋也。後參軍亦以守城死。

下灘

孤舟瀉石灘。雙槳下雲端。浪湧分花落。濤驚濺雪寒。亂山皆曲向。飛渡卻迴看。千里無諸國。天南自鬱盤。

一起如觀巴船出峽圖

古意

碧玉堂西紅粉樓。樓中思婦憶涼州。咸陽橋上三年夢。回樂峯前萬里愁。秦地烟花明月夜。胡天沙草白

雲秋離魂不識金微路。願逐交河水北流。酷似楊升菴  
塞垣鷓鴣詞

冬閨夜怨

落盡飛雲暮色寒。黃昏北斗照闌干。可憐一片如霜月。惟有深閨獨自看。

鄧

旭字元照江西南壽州人順治丁亥進士官翰林院檢討著有林屋詩集

錢塘看潮

夜發富春江。午纜錢塘岸。不見當時射潮者。天際煙波空浩瀚。須臾海門走正練。白虹蜿蜿吐長線。漸看鯨背負山來。洶湧頓令天地變。龍吹笛。鼉擊鼓。馮夷天吳江上舞。萬斛舳艫如敗葉。怒濤一捲送平浦。伊昔惟聞東流之水無盡期。沃焦瀕洞爲漏卮。云何已逝壑。而有還源時。應是伍胥文種恨不滅。無路叩天氣填咽。故教雪浪排長空。古今噓吸無時絕。

贈鳳凰山咸菴禪丈菴名鳳巢

萬綠藏深壑。苔竈路幾層。側身同蟻進。牽臂學猿騰。累重緣留髮。栖幽欲妬僧。半生遲引退。應悔鑿春冰。

李

敬字聖一江南六合人順治丁亥進士官刑部侍郎

清明泊瓜步阻雨

愁思如芳草。春程不斷生。停雲連野色。過雨挾江聲。瓜步新添水。清明遠送行。強從吳客語。歸計羨朱櫻。

停雲十字，流洋賞之，謂其不減古人。

讀水經注懷洞庭

坐倚巴丘俯洞庭，君山一十二峯青。不聞修竹來仙吹，但有孤鴻送客舲。欲辨水天惟北斗，若當風雨即南溟。舊遊浩渺如春夢，兀看酈元注水經。

繆慧遠

字子長，江南吳縣人。順治丁亥進士，官壽陽知縣。○經義推巨手，韻語亦復雅健雄深。

雉子斑

雉子斑兮其羽煌煌，雄雌朝飛阡陌相將。十步一啄，載飛載藏。誰爲甌樞，體負文章。南山媒翳，北山羅張。樊籠旣入，形容無光。恭承嘉惠，食以稻粱。爾雖小物，耿介莫當。局促一世，生不如亡。微命旣釋，感恩未央。遲遲春日，膏澤徜徉。願同黃雀，銜環君旁。

友人過訪

茸城愁絕各風煙，傾倒今朝倍黯然。坐上清歌聞子夜，人生行樂及丁年。三春會面常多阻，百罰深杯且共傳。舊事淒涼言未盡，簷花落久雨纒綿。

曹垂燦

字天祺，江南上海人。順治丁亥進士，官遂安知縣。

插秧詞

桔槔未動商羊舞。老農出社迎貓虎。薰風靈雨及時來。秧水齊添土膏腴。針苗翦翦綠初齊。如卦行行立。畛畦隴畔柳斜斜。挂笠農歌聲裏鵝鳩啼。自辰至午不停手。廚下炊羹并翦韭。老翁提甕餉田間。甕中更有新窺酒。日晚水田聚糾笠。移時火耨農功急。寄語食租衣稅家。莫忘辛苦盤中粒。如卦句所謂立苗欲疏也。

沈永令

字開人。江南吳江人。順治戊子副榜官高陵知縣。初知韓城縣時湯文正爲潼關道以循良重之其政治可知也。詩亦宗仰唐人。不染竟陵習氣。

### 再次淮上對月

半年沙塞月。今夜映長淮。砧杵深閨夢。關山旅客懷。遙知燈下卜。敲斷鬢邊釵。何日花前影。清光共玉階。  
今夜鄜州月。念閨中之懷遠。此爲客中之念家。境地相同。深情宛合。

### 咸陽寓中

老應甘棄世。壯已不如人。楚越燕秦路。東西南北身。鏡中俱是雪。塞外不知春。何日滄江返。磯頭穩釣綸。

### 秦中

深秋沙草馬長嘶。塞柳千條覆曲隄。水落渭河諸派合。天圍華嶽萬峯低。舊遊金谷雲烟散。故國銅駝石棘迷。紫氣近來東望滿。函關何用一丸泥。  
顧茂倫稱此詩沉雄瑰麗可追盛唐其氣象然也。下章亦然。

### 登華

歷歷星辰尺五懸。泚雲隴樹望相連。天高西北長空盡。勢控燕秦大地偏。烟杪一丸關。百二河流如線路。

三千此身托足知何處。仙掌擎來霄漢邊。

分水龍王廟

南爲吳水北燕雲。結伴登臨喜得羣。七十二泉從此合。三千餘路恰平分。安瀾已下褻封詔。沉璧無煩草檄文。惟有仲宣行役苦。登樓久已悔從軍。引汶水合七十二泉之水。注於南旺。平分南北。以利轉漕。此宋禮從白堊之議也。三四語真寫得盡。

贈葉菴禪師

師爲楚嘉魚人。天啓乙丑進士。筮仕吳令。晉吏垣。崇禎壬癸間。建言廷杖詔獄。滄桑後遂爲僧。康熙乙卯。駐錫江城。距作令時。閱五十寒暑矣。永令以昔年童子。受知門下。感賦是詩。

浮生閱盡幾滄桑。獨臥寒雲擁竹牀。百鍊身猶餘鐵石。萬言字尙挾風霜。列朝文獻徵遺史。一代天龍護法王。士女爭來瞻瑞相。使君故是宰河陽。葉菴卽熊開元也。以彈周延儒。廷杖。後爲僧。門下士感慨賦之。如讀本傳。

卷二

施閩章字尙白。江南宣城人。順治己丑進士。官江西參議。康熙己未。召試博學宏詞。官翰林院侍講。著有愚山詩集。○南施北宋。故應抗行。今就兩家論之。宋以雄健磊落勝施。以溫柔敦厚勝。  
又各自擅場。○王漁洋云。門人洪昉思問詩法於愚山。愚山曰。子師言詩。如華嚴樓閣。彈指即現。又如五城十二樓。縹緲俱在天際。余則譬作室者。飯爨木石。一一俱就平地築起。洪曰。此禪宗頓漸義也。今觀兩家詩。此論確不可易。

警志詩

洋洋景運六轡徂流。爾征爾邁。不我眷留。維帝賚予。靡德不具。既具既完。逝不我顧。拾穗雖利。不如躬耕。東炬夜馳。不如早行。鷓爭腐鼠。鳳餐竹食。翔視千仞。下罕雛匹。懿我祖考。爭道策驥。腹我目我。遑敢隕墜。昔遊東魯。攝衣孔庭。俯仰瞻聽。實邇儀型。匪哀匪慕。泣涕如雨。愴如亡子。初見父母。軌臻回賜。文企姬秦。不慚燭火。持照千春。隕霜警木。世難厲德。懷璧負途。智士不惑。獲則穴果。獺則祭魚。誰爲令人。不勤是圖。皇皇朝夕。望暑心慄。如岸斯崩。如虎將啣。再苦抱疴。顏不待耆。敬爾良時。并宵作晝。步步實踐歸重下學。不落宋人塵腐是曰品詩。

升天行

丹鳳一雙。垂雲上翔。俯視八極。中路徬徨。解一下土小臣。心思太古。言叩天門。手擊天鼓。雷雨晝迷。噤不得語。二天閭高高。高不可即。但見羣仙。玉女侍側。貨財千億。自注黃金既成。貨財千億。役使鬼神。玉女侍側。見陰長生仙詩。小臣昧死。頓首言天。闕清虛。安用貨財千萬億。願丐下土小民。作衣食。三仙人持節。問汝何所求。小臣不願富貴。願假赤螭。遊戲十洲。山無崩徙。河海安流。天子萬年。兵革罷。小臣魯鈍。但當貧賤。長優游。四

浮萍兔絲篇

李將軍言部曲嘗掠人妻。既數年。攜之南征。值其故夫。一見慟絕。問其夫。已納新婦。則兵之故



妻也。四人皆大哭。各反其妻而去。子爲作浮萍兔絲篇。

浮萍寄洪波。飄飄東復西。兔絲附喬柯。裊裊復離披。兔絲斷有日。浮萍合有時。浮萍語兔絲。離合安可知。健兒東南征。馬上傾城姿。輕羅作障面。顧盼生光儀。故夫從旁窺。拭目驚且疑。長跪問健兒。母乃賤子妻。賤子分已斷。買婦商山陲。但願一相見。永訣從此辭。相見肝腸絕。健兒心乍悲。自言亦有婦。商山生別離。我戍十餘載。不知從阿誰。爾婦旣我鄉。便可會路岐。寧知商山婦。復向健兒啼。本執君箕帚。棄我忽如遺。黃雀從鳥飛。比翼長參差。雄飛占新巢。雌伏思舊枝。兩雄相顧詫。各自還其雌。雌雄一時合。雙淚沾裳衣。狀古來未有情事。以比興體出之。作漢人樂府讀可也。無書無筆人。不敢道一字。

過鞏嶺

崇岡陟嵯嶒。鳥道繞山腹。仰探白日短。俯瞰陰霞伏。魚貫度行人。疲馬躑躅。春晴多好風。吹我巖壑綠。農畊嶺上雲。婦飯溪中饋。羈心曠登陟。瘠土見風俗。華陽靈蹟闕。杖策尋石屋。

早春三天洞至仙人巖

寒巖斂衆妙。惠風蕩疎木。洞穴無人居。玲瓏闢華屋。春陰香乳流。谷溫瑤草綠。出戶見前峰。重雲無斷續。乘興復杖藜。行歌散煩促。古樹含丹葩。餘雪長靈瀑。僧扉鑿陽崖。茶臼入深竹。采真客安往。悵望空山曲。

臨江憫旱

瘠土嗟薄稷，歲豐長忍飢。或馬況疊跡，田園成路蹊。荷鋤代牛力，播種良苦疲。朱火肆燎原，禾稗同一萎。民亂如恐後，況乃驅策爲。徒跌呼百神，嗚咽致我辭。政拙未敢苛，召災今則誰。雲漢何皎潔，箕斗正參差。心知閭闔遠，側向高天啼。明日急芻餉，吞聲重涕洟。歲豐長忍飢，即所云樂歲終身苦也。防民亂，懼召災呼天而訴，如讀雲漢正月諸變雅。

### 悲野雀

行經沂州，有餉鶴鴿者，哀其義，不忍食。或曰：州人捕雀爲業，嗟乎！蕪田不耕，羅及野雀。作詩示州人。

枌榆繁羽族，瑣細無定名。所謀非稻粱，不與雞鶩爭。張羅始何日，遂使風俗成。機發盡掩覆，一羅殲羣生。持此飲啄具，充君鼎俎烹。苦慚託體微，不足一杯羹。同類爲啾啾，失侶長哀鳴。君輟筵上箸，請聽簷外聲。讀末二語，雖老饕亦應動心。

### 祀蠶娘

華燈白粥陳椒漿，田家女兒祀蠶娘。願刺繡裙與娘着，使我紅蠶堆滿箔。他家織縑裁羅襦，妾家賣絲充官租。餘作郎衣及兒襖，家貧租重還有無。蠶時桑遠行多露，好傍門前種桑樹。比張王樂府轉，見性情之正。

### 牽船夫行

十八灘頭石齒齒，百丈青繩可憐子。赤腳短衣半在腰，裹飯寒吞掬江水。北來鐵騎盡乘船，灘峻船從石

窟穿雞豬牛酒不論數。連橋動索千夫牽。縣官懼罪急如火。預點民夫向江坐。拘留古廟等羈囚。兵來不來飢殺我。沿江沙石多崩峭。引臂如猿爭叫嘯。秋冬水澀春漲湍。洑穴蛟龍岸虎豹。伐鼓鳴鑼畫艦飛。陽侯起立江娥笑。不辭辛苦爲君行。挺促鞭驅半死生。君看死者仆江側。火伴何人敢哭聲。自從伏波下南粵。蠻江多少人流血。繩牽不斷腸斷絕。流水無情亦嗚咽。未歸歸咎新息。眞無可奈何之辭。

劣崗峯

危峯矗立鼓山頂。目盡閩天萬山影。崖上有紫陽書。光芒倒射扶桑冷。雙江會合蛟龍遊。三山滅沒人煙浮。島嶼東看入海氣。空青一髮指琉球。洪濤忽起天地動。羲和返駕寒雲愁。吁嗟乎。白日苦短。青鬢已斑。天風何泠泠。吹我骨珊珊。念欲乘風揮手去。八表萬里何常還。鸞驂鶴馭良不遠。鯨吞蟻鬪誰能閒。回首大笑哀人間。

射烏樓行白注爲周樸先生紀事

越王城邊烏啞啞。射烏樓頭烏不下。周侯破寇此城頭。到今殺氣城烏愁。先皇丙申歲七月。寇來海畔盈山邱。疾如長鯨吞巨舟。城中號哭聲啾啾。侯方解官聽吏議。推守要害來烏樓。抗言立功須宿將。使貪使過皆保障。中有健手王老虎。陷陣摧鋒氣偏壯。羣凶爭踞豹頭山。咫尺烏樓正相向。蟻附蜂屯頃刻間。何人敢立女牆上。周侯清嘯決戎機。誓師慷慨裹鐵衣。指顧中堅發大礮。須臾萬骨黃塵飛。紫袍戎首正糜

爛一軍氣盡與尸歸。總戎援兵適繼至。三山是日解重圍。當途方略固多有。功成乃出閒官手。烽煙既息烏樓空。烏樓壯績在人口。他年再集頭白鳥。射鳥還有周侯無。記事詩不嫌詳盡此覺勃勃有生氣以防亂作結慮事尤爲周詳。

亂後和劉文伯郊行

斜日照荒野。亂山橫白雲。到家成遠客。訪舊指新墳。戰地冤魂語。空村畫角聞。相看皆墮淚。風葉自紛紛。

慈仁寺松

直欲凌風去。翻從拂地看。摧殘經百折。偃仰鬱千盤。老閱山河變。陰兼日月寒。支離爾何意。不厭臥長安。

谿漲

谿漲全無岸。沙田又可哀。舟航浮郡郭。荇藻冒樓臺。過雨重雲黑。奔雷動地迴。蛟龍橫得意。白日向人來。

懷侯韓振藍山

貧苦日相共。宦遊天一涯。有官真似水。無夢不還家。五嶺來山瘴。孤城接塞笳。別離春已暮。多恐鬢將華。

舟中立秋

垂老畏聞秋。年光逐水流。陰雲沈岸草。急雨亂灘舟。時事詩書拙。軍儲嶺海愁。滄飢今有歲。倚棹望西疇。

叔父同弟阮遲子蕪關次日予北發

小泊聚江干。帆開淚未乾。路長催老易。家近恨歸難。長大看吾弟。浮沉付一官。今宵渾不寐。倍覺夜漫漫。

家近難歸。老於宦途者知之。神明杜陵。乃有此種。

錢塘觀潮

海色雨中開。濤飛江上臺。聲驅千騎疾。氣捲萬山來。  
氣捲萬山來。五字千古。

顧寧人關中書至

舊蹟滿西京。高談就友生。書曾搜孔壁。詩已變秦聲。多難餘身健。新編計日成。別來頭並白。望遠不勝情。

過湖北山家

路回臨石岸。樹老出牆根。野水合諸澗。桃花成一村。呼雞過籬柵。行酒盡兒孫。老矣吾將隱。前峯恰對門。  
野水十字。令機松年亦不能盡。唐人時有落花至。遠隨流水香。同一自然。

雨後

歸田復多病。寒雨送三春。高柳不藏閣。流鶯解就人。道心看物變。時論薄官貧。無限扁舟意。澄江滿綠蘋。  
三四不讓劉隨州漁洋取愚山五言近體。爲摘句。爲學。爲式也。

淳湖尋邢景之

四海倦遊後。始知泛愛非。寸心如落木。逢爾復春暉。移榻連蔬圃。烹魚出釣磯。清歡成信宿。不是醉忘歸。

江行雜詠

鼓枻隨漁父，乘槎老客星。鶯聲花嶼暖，龍氣雨潭腥。波綠澄湘浦，天青合洞庭。誰知漁子飯，絕勝五侯鯖。

望衡嶽

衡山絕頂祝融峯，獨峙天南抗岱宗。水國風雷虛岫出，炎方冰雪半巖封。斜陽欲辨煙中樹，昨夜遙聞岳麓鐘。好駐星軺看日出，臥翻雲海盪心胸。

登岱

日觀晴光傍午開，茫茫東見海爲杯。九州積氣峯前合，萬里浮雲杖底來。鄒魯山靈真莽蕩，吳閭練影漫徘徊。崑崙不到終遺憾，欲駕蒼龍首重回。

見宋荔裳遺詩，凄然有作。

白注：君按察四川，會滇蜀，反道梗，憂憤死。

好客生平酒不空，高歌零落痛無窮。西川終古流殘淚，東海從今少大風。國士魂銷多難後，離人望斷九原中。張堪妻子應誰託，巢卵長拋虎豹叢。西川句，謂蜀人懷其政教。東海句，謂山左失一雅宗也。○王漁洋此篇結語亦復云然，猶見古交道焉。○張堪卒於官，無託妻孥事，此約略語。

至南旺

客倦南來路，河分向北流。明朝望鄉淚，流不到江頭。過南旺分水，水俱向北。淚滴水，中不復到江也。宛似唐人聲口。

送李萬安罷官歸里

歲暮歸舟一葉輕，歌殘酒罷淚雙傾。灘聲不是無情思，嗚咽隨君爲送行。

季開生

字天中，江南泰興人。順治己丑進士，官給事中，著有出關草。

尙陽堡卽事口號

新燒懸崖淨積莎，遠隨甲騎渡柴河。虎頭在客休投筆，雞肋從軍漫荷戈。骨肉書傳遼塞少，林泉話入故園多。邊城老將秋霜下，夜半聞笳起自歌。

五雲長繞舊皇畿，萬里孤臣寄翠微。極塞有山皆北向，重邊無水不西歸。雞鳴夢訝參朝晚，烏哺心傷進膳遲。寧惜榮榮沙雁影，陽回未得入關飛。忠孝之人，其言藹如。

送左大來先生葬

重關不禁旅魂過，夢裏看君渡塞河。白日總悲生事少，黃泉翻羨故人多。荒臺啼鳥圍松柏，廢苑寒雲鎖薜蘿。未遂首丘須淺葬，好留枯骨待恩波。宋韓文時異靈均死亦難以死爲幸，此云黃泉翻羨故人多以死爲樂，皆刻骨入髓語。

董文驥

字玉虬，江南武進人。順治己丑進士，官侍御，著有微泉閣集。

眞定客舍對雪

窮陰滿太虛，積雪凍庭除。鴉點埋雲樹，童依宿火廚。君恩狐白厚，老病酒杯疎。江國寒梅早，垂垂已待予。

紙上俱  
有寒意。

復過井陘口淮陰侯廟

背水千年廟。登壇百戰功。至今思赤幟。何處弔藏弓。春雨王孫草。靈風古木叢。淮陰年少子。終自笑英雄。

漁洋極稱五  
六語自然。

庚戌元日移家惠山舟中作

東風自信片帆斜。百里鄉園路豈賒。愛聽山泉因煮薺。並驅雞犬是移家。未聞春鳥來檣燕。已見寒梅笑岸花。萬國朝正看北極。十年拂霧馬歎沙。

去年元日棄孤臣。趙北燕南滯病身。八口一舟遷易散。自注：家先歸。吳山楚水信難真。卽看妻子還疑夢。高臥江湖又早春。只恐鶯花饒笑我。拂衣斑鬢已如銀。

十月初六發榆中夜抵魚河驛

振野涼沙撲馬飛。孟冬絕塞已風威。王程中夜魚河宿。客路衝寒虎節歸。邊月黑時防失道。胡霜白處欲侵衣。南州此夕微暄暖。滅燭聽鴻坐竹扉。

王廣心字伊人。江南華亭人。順治己丑進士。○先生經義。雖纖襪。時作駢體。而韻語疎暢。條達不以一律拘賢者。故不可測也。

送董蒼水遊楚粵



先朝直節董侍郎。鋤奸拜杖投南荒。百粵山川恣唵嘯。至今巖壑垂光芒。康樂登臨千載絕。蒼梧黯澹離江咽。鐵城桐柱漫崔嵬。木客山猿自清切。侍郎之後君也才。文章早壓黃金臺。時無孔融不薦士。天人三策空歸來。丈夫壯志凌八極。越水吳山傷徧仄。瀟湘萬頃九疑煙。我有愁心蕩空碧。興來還看鬱林山。八桂堂深客思閒。苒惹曉風啼翠羽。枕椰殘照落烏蠻。其間仕宦都賢者。酌酒論詩袖堪把。銅鼓峯前意慨慷。綠珠渡口人瀟灑。勸君莫過柳侯祠。少年失足良可悲。勸君勿謁伏波廟。七十據鞍達者謂。人生功何必勒昆吾鼎。貴何必入中書堂。淋漓翰墨飛夜郎。如君侍郎名亦章。采罷丹砂好歸隱。與君谷口話農桑。  
非貶柳州。伏波勸其勿躁進。勿戀助名也。前輩立言。每不以頌而以規。

大梁行送林平子

燕山四月槐雨涼。酒徒擊筑官道旁。驪駒欲鳴慘將發。爲君慷慨歌大梁。大梁昔當全盛日。裂土苴茅建宗室。魏殿旌旗北斗翻。汴宮花石城東密。定王憲王皆好才。樊樓窈窕東堂開。誠齋舊帖龍文寫。樂府新題鳳管催。黃河如帶縈天闕。舞榭歌鐘幾時歇。兔苑賓朋白雪樽。鷓絃士女金梁月。中原千里接神京。叔父勤王更勒銘。雞犬願隨淮桂老。魚龍忽厭蔡河平。一朝風雨金隄決。殺氣蒼茫鼓聲絕。龍章十葉赤帝孫。卻並銅人水中沒。滄桑變易八九年。我來欲渡愁無船。宮闕崩頽半深澤。狐狸跟跳空荒烟。偶逢遺老驅豚出。端禮門中招共入。銀樓藻井荇帶穿。玉殿螭頭土花澀。因言此殿西北隅。飛廉九仞凌清虛。濁河

波浪埋不得，依稀繡楫臨椒除。我登蘭雪軒，更倚端清閣。空梁天矯墜盤龍，古柏陰森少調鶴。下尋石洞風脩然，黃塵不到秋光先。雲英既死梵燈滅，誰從此地求神仙。嗚呼此景當年識，近日傳聞更蕭瑟。華棟都輸少府錢，碧甍盡入空王宅。河山君到莫重論，良嶽吹臺總不存。但得晴天看少室，短衣落日過夷門。  
大梁自流寇決河灌城後，王孫俱爲波臣，臣民可知矣。登高眺覽，百感茫茫，而以看少室，俟羸作結，想見作者胸次。

懷友

昔日燕臺側，相爲踏雪歌。君恩移白日，鄉信斷黃河。蘭蕙秋偏歇，風霜晚較多。短衣吹笳築，獨奈歲寒何。  
夏日邀陳昌箕魏惟度許九日周釜山小集依韻酬陳昌箕

偶與仙翁草閣期，清尊碧簞晝棲遲。才名不忝三君後，人物能談萬歷時。綺季行藏巖桂老，少陵家國杜鵑知。可堪日暮山陽笛，淚落江城自詠詩。

送向西崑使蜀

廿年不到西川路，捧詔今看使者行。亂後草堂江燕在，春來劍閣杜鵑鳴。橋邊舊蹟懷司馬，山下新祠弔孔明。尚有焚香諸父老，相持杯酒話消兵。  
中兩聯俱憑弔古人，前用虛寫，後用實寫，不覺其犯。

直方夜過憶臥子談詩

偶逢宋玉過西鄰，把酒重論故國春。一榻早懸陳仲舉，九歌親授屈靈均。衣冠白社沉秋草，賓客黃初散

洛塵醉裏寒星空自數。天門騎尾竟何人。直方即宋轅文。見談詩之旨。同而立。身立名各行其志也。當於言外思之。

王庭

字言遠。浙江嘉興人。順治己丑進士。官山西布政使。○五言清絕如草蘇州。不欲以學問才力勝人。

棧道中作

人行山上高。天在山中小。圓暉易沉夜。初陽遲報曉。馬走山樹巔。飛鳥出其下。雲連深洞迷。石缺危橋架。七盤非險途。三秋足清景。日夕留泉聲。誰能辨喧靜。

雨後

落日殘雨餘。林樹半昏黑。南山白雲閒。澹然見秋色。冷風何淒淒。微微野烟息。歸巢鳥更鳴。當戶蟲還織。惆悵獨坐時。悠悠思何極。妙在淡然。不着痕迹。

潼關

關門高鎖處。飛鳥不能過。雉堞連羣嶂。風慄俯大河。代更千戰少。勢在一夫多。入夜聞刁斗。軍聲壯若何。

曉雨

獨鳥鳴南園。曉來雨初息。空庭生秋陰。莓苔長寒色。只此已足。

周體觀

字伯衡。直隸遵化人。順治己丑進士。由翰林歷官參議。道著有晴鶴集。

秋燈和韻

振羽知無力。疎狂亂客扉。低空不礙暝。違候亦能飛。  
違候亦能飛。五字可味。

大報恩寺逢友蒼言別

正爾未能別。相逢暮景斜。久疎因在客。多病欲辭家。夜雨洗山骨。殘春落澗花。祖衣休早付。待我過棲霞。

人日次徐州

泗上逢人日。長亭許更過。春雲回白首。客夢度黃河。舊俗淮南異。前賢沛國多。至今小兒女。猶唱大風歌。

撥棹雜咏

不見當年劉克猷。西風吹淚過黃州。舊時江路能來否。落日招魂古驛樓。  
讀此使人增交誼之重。

盧

絃字元度。湖廣蘄州人。順治己丑進士。著有四照堂集。

望遠曲

明知人不歸。日日樓頭望。人尙在天涯。只疑行陌上。陌上紅塵逐日飛。何曾塵裏見人歸。經春歷夏無消息。檢點秋風又寄衣。

周茂源

字宿來。江南華亭人。順治己丑進士。官處州知府。○池北偶談。宿來以刑部。卹刑駐節雪苑。有山人得罪別駕。欲加以刑。山人聽言秋部執友。冀緩其責。實未嘗謀面也。別駕謁周問之。答曰。此余好友。山人得無恙。一時推爲長者。

過張文忠故第

賜第松臺麓。元臣主眷優。天章懸廢閣。相印沒荒邱。議奪千官氣。身無十世謀。立談工巷遇。何似富民侯。  
此弔張江陵相也。江陵交馮保逐新鄭是其罪。鎮服九邊名實不混是其功。神廟始則尊如父師。過於寵後至削籍破家。又過於薄。詩中江陵之氣。饒神廟之回惑。一一傳出。未以張禹之柔媚得君作襯。江陵功罪俱見矣。

雨中諸子集子機山別業

樵採閑時學苦吟。身如越鳥戀平林。偶然花月春江夜。共此蒹葭秋水心。山市酒鎗兵後少。草堂詩句雨中深。沈沈鐘梵聲俱寂。橫笛還吹激楚音。

許纘曾字鶴沙。江南華亭人。順治己丑進士。官瀋中按察。著有寶繪堂集。

遊峨眉山歌

伊昔披山經。峨眉冠五嶽。傑然鎮坤維。蒼翠萬仞削。初疑宇內無此奇。今日所見更過之。乃知天地靈怪不可測。生平遊覽快意無如斯。既躡飛龍嶺。還登歌鳳臺。狂客已長逝。真人不復來。丹鑪火冷鶴駕遠。譚經石榻生莓苔。一步一驚詫。十步一徘徊。上有排空疊嶂翠欲滴。下有飛泉百尺聲如雷。巉巖鳥道崎嶇入。天門一隙雲光白。八十四盤最上頭。婆娑萬樹清陰碧。探帝座。凌丹邱。白雲飛揚。長風颺颺。積雪如嚴冬。凜冽披重裘。俯視岷江萬里蜿蜒僅一線。蜀山千點參差羅列兒孫儔。花爲優曇色。鳥作迦陵聲。天香

夜不散。法鼓晝長鳴。金輪忍土震。且推第一。赤髀白足靈機妙道真難名。須臾報道佛光現。蒼茫雲海蒸  
奇變。爛似慶雲暈。若虹。林巖五色增葱蒨。金橋突兀駕虛空。彷彿珠眉紺髮容。忽然雲散光亦滅。惟有朝  
曦蕩漾倒掛金芙蓉。瞻此靈異境。神魂欲飛越。遠勝赤城梁。何數蓬萊窟。吁嗟蜀道之難難。於上青天。幾  
人能到峨眉巔。仙都佛國盡在此。請君莫惜多留連。飛騰滅沒後半尤爲荒  
幻凌空可云善學太白。

### 睢陽行

大江之南多木客。古樹深篁叢窟宅。禹鼎銷沈老魅驕。野火游光兆形魄。譁譁出出逞神奸。空梁夜嘯霜  
天碧。年年里巷攘魚腥。逡巡社公常避席。有時幻作美丈夫。烏帽猩袍服御都。山魃按拍斑狸舞。桂棹蘭  
橈泛五湖。采蓮女兒焚素口。木下三郎求配偶。寶馬雲駢天際迎。傾城顰笑供箕帚。從此民間勤報賽。爐  
火村村凝鬢鬣。豪門娶婦亦危疑。先奏神絃羞沆瀣。楞伽廟貌更崔嵬。繡幕珠簾霄漢開。蘭堂處處笙歌  
競。綵鷁朝朝鼓吹來。畫屏廣列夫人坐。清揚妙相垂倭墮。祝史乘機壘斷張。阿母新來口侈侈。三吳今古  
如長夜。狐鳴篝火騰欺詐。蚩蚩不復畏三章。豚蹄斗酒求神赦。更有紅裙白面郎。踏青拾翠遊芳塘。長吏  
催科百不應。賣得新絲往上方。數百年來尚奸宄。江河日下誰能止。淫昏牲醴埒烝嘗。跛覘妖巫壓羊豕。  
龍虎真人道行高。檢校功曹山鬼號。頻年尺一到江左。擲揄玩愒如弁髦。睢陽學士金閨彥。夜深常侍明  
光殿。金符大旆挾風霆。冰心苦節綏南甸。長空朗月照江濤。於菟出走蒼狼逃。木石之怪夔罔兩。猶向人

間索五牢中丞飛檄榜通衢。沉其土偶廬其居。故鬼不于新鬼竄。陰蠶掃蕩天清虛。君不見狄梁公西門豹。水沈三老焚祆廟。又不見旌陽尹昌黎伯。斬蛟驅鱷服以德。從來忠信孚豚魚。千秋敦史銘金石。公今入朝帶劍履。前席殷勤報天子。璽書赫濯神祇驚。日麗中天民受祉。有道之時鬼不靈。當今海內長如此。

敘睢州湯文正公除五通神事。淋漓暢快言之。末歸到有道之世。其鬼不靈。尤極正大。○龍虎真人以法驅之。轉受擲。掄得此一觀。接入湯公倍覺有力。此文章烘襯法也。

沈荃字真蕤。江南華亭人。順治壬辰。賜進士第。三人。官至禮部侍郎。謚文恪。著有充齋集。○明宣

法見重於聖祖。

送雪龕兄任保寧

最憶閩中勝。雲山到眼迷。地從巴水折。天入劍門低。夜月桐花豔。春風杜宇啼。池塘應有夢。鄉思更淒淒。

折字低字。捶鍊得之。

送張簣山學士歸廬陵

襍被蕭蕭出鳳城。觚稜回首重含情。片言豈詔回天力。三宿仍辭去國名。聖德優容逾格外。臣心忠盡本

生平。曲江風度應相憶。莫戀空山猿鶴盟。三四語傳出直臣去國心事。此風。

湯斌

斌字孔伯。河南睢州人。順治壬辰。進士。康熙己未。召試博學鴻詞。官至工部尚書。乾隆中。補監國朝第一流人。而韻語葩流。溫溫。溫。為國朝第一流人。而韻語葩流。溫溫。

夏日詠懷

初夏朝氣清。綠陰映竹閣。好鳥時來集。微風散林薄。養疴豐暇日。坐臥對雲壑。圖書紛几席。茗椀常間錯。偶爾屬篇章。怡情志簡略。採藥支短筇。尋泉踏芒屨。豈曰謝浮榮。明志貴澹泊。抗心懷古人。蕭然有真樂。

贈李映碧先生

蚤年登朝宇。端笏拜彤闈。抗疏表孤忠。旭日麗黃扉。維時甘陵部。南北勢相違。正色兩不阿。嶽嶽世所希。元祐盛名賢。黨論多是非。玄黃未息戰。國是將安歸。唯有哲人在。秉道還識幾。石室留諫草。夢回尙依稀。魯國遺經火。口傳賴伏生。九十秦博士。典謨賴以明。文獻歸靈光。斗杓示景行。著述藏名嶽。大義何崢嶸。虎觀待鴻儒。丹詔下江城。老年難走趨。豈敢抗弓旌。抽書授使者。卷軸滿巨籟。白雲封巖谷。時聞鸞鳳聲。  
此徵召而未出者。不言秉高節。而云老年難走趨。即杜陵聖朝無棄物。老病已成翁。意須如此立言。

送李子德奉旨歸養

薊門疎雨淡秋陰。惟爾斯行重古今。賦就上林纔賜第。表陳東掖早抽簪。關河落照照鄉山。迥驛路鳴蟬野樹深。到日高堂應戲綵。御香未散繞衣襟。

飲張爾成少參署中

高齋竹柏漏聲殘。促席停盃興未闌。千里風塵驚短鬢。十年供奉憶同官。霜深衛水雲帆壯。雪滿天雄玉



塵塞北斗共瞻新氣象。故人幾許在長安。

贈吳湖州

仙郎起草最知名。幾載拳帷書上行。按部雨餘香稻晚。課農花發曉雲輕。南宮書畫添新譜。李相亭臺續舊盟。聞道賓朋常滿座。清尊真見古人情。

程可則

字周量。廣東南海人。順治壬辰會試第一。官兵部職方郎中。終桂林知府。著有海日堂集。○

後之選。嶽南詩者。祇取風梁陳。而不及程。何也。

送家立菴太常歸皖山

好爵洵可貴。不貪良獨難。道德五千言。止足爲真詮。漢時二疏志。千載稱大賢。豈不念蒼生。身遂名亦全。象齒何爲焚。膏明將自煎。因君振遙策。懷古心悠然。

昔登白玉堂。文彩何郁郁。胄子承風規。諸儒稟芳躅。出持絕域節。入奉齋宮錄。一身爲千秋。此事亦已足。浩然思故鄉。懸車返初服。浮山七十峯。依稀作湯沐。辭達意足。五言正始。

送邵橫菴之秦中

五月火雲燒幽州。大風驅之雲不流。昨夜雨來不盈掌。山鬼叫嘯農爲愁。遠聞秦中黑霜下。花作蠅蠹飛滿野。秦人瘠畏越人視。君今西去胡爲者。道是終南山色佳。四時衆壑鳴風雷。蓮花百丈青到眼。騎龍直

上昇仙臺。君家昔人東陵老。種瓜卻解塵纓早。我欲隨君問故侯。何由共踏青門道。

送楊鄂州職方使安南

皇帝在位閱七載。九州四海歌太平。烏弋黃皮粟漢朔。旅葵越雉來周京。安南君長處炎徼。北面久已輸忠誠。前年璽書予封爵。吾宗學士會南征。立蕓歸來陳風對宣室。爲言此地無兵爭。鸚鵡魚遊浪泊水。菴羅果熟安陽城。今年羽書忽馳至。族類不合仇相傾。蠻王更制略下邑。都尉偏強投昆明。憑陵三郡勢莫敵。女無繅繭男無耕。觸蠻之鬪豈足計。祇憐蹂躪憂蒼生。相如諭蜀有往事。詔旨特簡才臣行。職方亭亭起三楚。鬚眉如戟雙瞳晶。昔年執法昆彌道。近襄九伐尤崢嶸。大臣推轂立召見。至尊御殿親書名。天語殷勤勞四牡。一時餞送來公卿。雙旌翹翹出北闕。八座赫赫過南荆。乘秋直入交州郡。雕題負弩遙相迎。憑君片言諭大義。調和二氏無佳兵。功成上書報天子。不用京觀封長鯨。伏波銅柱邈予歲。壯哉爾與同英聲。嗚呼男兒萬里遠遊志亦足。不爾蝸廬踟躕虛吾生。以天語調和兩氏自應煒煌煌蠻觸之鬪豈足計祇憐蹂躪憂蒼生是尊崇國體仁覆無外語

送紀載之備兵肅州

萬古焉支路。迢迢欲上天。送君持漢節。吹角去防邊。問俗清西海。題詩賚酒泉。羌戎羣下拜。不敢向居延。  
不必奇嘯。白是唐音。

送家立菴學士册封安南

自昔南交地，蠻煙萬里餘。地經和仲宅，人習素王書。秬鬯分藩舊，苴茅錫命初。須令知漢大，不必問金車。

送徐庾清錢相園歸越

良會竟難永，歲寒人盡歸。誰憐故鄉子，獨采南山薇。把酒不終夕，浩歌徒攪衣。無能挽舟楫，惻惻拜斜暉。

此種風格最近徐昌谷不在語句之工。

登虔州城樓

鬱孤臺畔暮煙空，與客登臨起大風。馬耳羣山歸睥睨，虎頭全郡覽崆峒。江通閩楚三千里，地誇東南百二雄。十載樓船紛下瀨，兵戈今喜罷虔中。

送魏子存司李成都

誰說蠶叢不易行，春風三月馬蹄輕。銅梁舊枕秦山險，玉壘新連楚塞平。芳草綠齊過漢水，杜鵑紅盡到緜城。知君篋底多詞賦，諭蜀文應似長卿。

花朝同林坦菴諸子集王蔗菴誰園餞談遽懷之京口次留別韻

宿雨連雲擁去舟，送君還典鷓鴣裘。酒香滿座難成醉，柳色依人欲上樓。偏與花時繫遠夢，豈知蓮社得新愁。東風萬里憐芳草，一路題詩到潤州。晚唐佳句。

贈衛醇谷

弱冠登壇已策勛。門多揖客重將軍。高秋賭射盤生馬。靜夜焚香檢篆文。一日君臣真異遇。五陵兄弟自同羣。揮毫試擬鄱陽帖。四座爭傳白練裙。

卷三

曹爾堪

字子顯。浙江嘉善人。順治壬辰進士。官侍講學士。○學士性英敏。所過山川阨塞。無不指掌。文頃刻成。同館無與爭捷者。

金魚池歌仿杜樂遊園體

池邊風日足留賞。曲水平隄暗菰蔣。且駐巾車臥綺疏。啓扇拂簾楸枰響。皎月樓開雲母屏。商飈簾動珊瑚網。紺殿凌空青靄間。步虛聲在青雲上。飛汞烟沈道士鑪。落霞閃映仙人掌。晝明金闕翠華臨。馳道清塵畏來往。玳瑁魚斑日應長。恍在江湖盪蘭漿。名園豈似金谷奢。福地真如輞川爽。喜與諸公同賦詩。讀騷痛飲良可師。今朝美酒注深爵。明日殘花辭故枝。仕宦京華得高會。追歡勝景皆恩私。別後星河望渺渺。將離贈遠遙相思。更餘千載悲秋淚。漆髮丹顏非曩時。

宿州

城破空濠在。郊寒木葉稀。數家非土著。一雁向雲飛。曉月疎楊柳。清風老薔薇。年來新戰鬼。汗血幾時歸。

送宋荔裳少參之任秦州

臘雪街亭滿。何時到鞏昌。關山樽底月。斧鉞帳前霜。閣暖調鸚鵡。花濃隱麝香。出門憐舊伴。白首尙爲郎。

顧大中字震雉。江南華亭人。順治壬辰進士。官工部侍郎。著有鶴巢詩存。

西洲曲

東風吹五兩。憶郎西洲去。門宿武昌船。帆開岳陽樹。去年下西洲。遲日獨登樓。今年桃李花。紅白浮巴丘。花開得結子。作客何窮已。春斷鶯啼中。妝成明鏡裏。朝上望夫山。纖手得紅蘭。盛以茱萸囊。結以翡翠盤。鏤刻刀環形。鴛鴦雙偃仰。寄懸腰間帶。銅鞮莫輕上。

飲太白酒樓醉後走筆成篇

嗚呼太白爾何遊。應在飄飄碧落之倒景。芙蓉白玉之仙樓。乘雲抱氣躡箕斗。驂螭過漢騎長蚪。世人卽之香難求。但見朱軒繡栢環城頭。岱宗歷歷青撲面。黃河西來淨如練。七十二君等飛電。地老天荒出酒人。狂歌直與天爲鄰。上殿捉筆力士噴。背負鹽鼎誰相存。就中賞音賀季真。獨抱麴蘖看浮雲。登樓日醉忘其身。西風野火衰草死。由來豪貴盡如此。我今把盞揖君起。相與酌酒問濟水。古今醉醒那終始。何不高步窮紫煙。摘取列星當酒錢。斟酌海水常不乾。開襟痛飲樓之巔。醉呼黃鶴迴青天。凌虛縹緲。筆有仙氣。

雪後登歌風臺示沛令

一劍收秦鹿。秋風萬里心。悲歌誰掩泣。壯士已成禽。井邑新豐舊。龍蛇大澤深。殘碑埋野戍。雪後此登臨。  
盛唐氣魄。雪後只於末句點出。作法一變。

送沈釋堂編修遷大梁道

鼓角北風涼。雙旌入大梁。十年悲瓠子。萬馬散敖倉。少府新沉璧。中原古戰場。君行能臥治。未許薄淮陽。  
大梁。漢淮陽國。卽汲長孺所治也。不同泛然比例。

故關

盡日常山道。雄關此鬱盤。萬山爭一險。絕壁鳥飛難。馬度黃雲合。旗翻白日寒。論兵空有地。誰得更登壇。  
白注。井陘縣有淮陰。談兵處石碣。

出平定州

忽爾危關豁。羣然衆嶺低。山連鴈門外。地出井陘西。亂石淹人跡。層冰怯馬蹄。相逢故鄉客。燈下手重攜。  
自注。壽陽。岳吳。秦賦。令君故云。

始發良鄉

上馬頻傾惜別杯。薊門西去亦悠哉。地隨督亢依山盡。河控桑乾入塞來。老去尙能持漢節。時清應不重邊才。冰霜漸邇君門遠。東望長安首重回。

秋雨移酌櫟園舟中

雲滿東山急雨霏。移觴對酌兩依依。荒城野戍鳴秋柝。海嶼孤臣冷葛衣。醉後玄黃燈半燼。尊前風雨鴈初飛。君看豐沛笙歌地。昔日高臺今日非。

王士禛

字子底。山東新城人。順治壬辰進士。官吏部考功員外郎。著有西樵集。○西樵。阮亭長兄。阮公詩說。并偽書。李維正序行津逮秘書。收之。皆誤也。詩以才情擅長。運古而不見使事之迹。一時名家。故應敵手。

長平坑歌

虎狼之秦胡不仁。銳頭小兒服振振。劫灰更促括也將。一戰趙壘成埃塵。白骨嶽積四十萬。至今此地無青春。丹塢水邊發鳩麓。指點當年趙兵衄。土人往往坑旁耕。拾得殘戈或斷鏃。鏃頭長以寸。戈頭長以尺。持將磨向丹河沙。古血猶腥土花赤。省冤谷接武安臺。南來遺蹟仍崔嵬。應共嚮骸山下月。夜深同對鬼燐哀。視陶中立長平戈頭歌較有魄力。

顧云美八分書歌

斯翁變體古文逸。斯翁。李陽冰語。斟酌其間八分作。中郎以還攻者稀。直數開元顧文學。於今苗裔仍東吳。短簿祠邊舊棲託。我從筆陣推波瀾。遠繩乃祖真無忤。爲言向來大有人。躡漢追唐歸宋郭。自注。宋比玉郭聖僕。妙蹟鄙人惜少見。餘子紛紛資力薄。乞君迴筆書堂顏。鵠峙龍擎腕中落。當年海內無干戈。留都文物尤峨峨。不

獨槐市盛絃誦，兼復桃葉繁笙歌。入看祭酒解散髻，出醉美人金叵羅。雅負辨眼工小字，詩成自寫無偏頗。爾時負販重風雅，人傳片楮兼金多。仙人昨過蔡經宅，清淺茫茫不堪索。蟲刻居然非壯夫，蕭條誰問韓陵石。儒衣僧帽顧阿瑛，老向江湖作逋客。醉書自署頭陀峇，擲筆時時念今昔。此書珍重感君深，歸來高揭南榮陰。臥看渴驥奔泉勢，如見冥鴻避弋心。云美名者吳中遺考志高節堅不獨分隸黎刻上追古人也一結如見其人并如寫其心

詔罷高麗貢鷹歌

真人御極臨八荒，百蠻九譯皆享王。西旅之獒越裳雉，貢物各各因其方。海東俊鳥好毛質，鐵爪金眸猛無匹。九都作貢來天家，特受韓鑣佐罟罟。晾鷹臺上秋天高，乘時驅獸行蒐苗。羽騎騰驪翠華至，星旂雲罕紛周遭。蒙鵠射熊未足羨，跋犀殪兕徒遮邀。是時摘條試一縱，萬人昂首瞻青霄。飛鳥狡兔失巢窟，委身灑血填君庖。至尊往往動顏色，玉虬迴轡鳴蕭蕭。柔遠傳聞勤睿旨，詔罷奇毛自今始。行葦兼存踐履慈，苗葭漫賦春田美。聖神舉動殊尋常，此事悠悠古誰比。君不見虬鬚天子真英雄，受諫鶴死藏懷中。推盛德語特沉鬱末二句從國雅本首節似勝原作

裁衣曲

初罷清砧響，還勞素腕舒。殘燈金粟尺，遠道玉關書。白紵縫仍澀，紅綿怨有餘。流黃明月路，何處逐輕車。  
可入升菴  
五言律祖



憶萊雜詩

時復尋春郭，煙光縱目寬。山姿濃大澤，潮勢汨三韓。小立拋藤杖，微吟側籜冠。醉歸還倒載，未厭海風寒。

或疑第四語汨字所出汪鈍翁曰吳楚東南  
拆字汨字正以獨造爲奇見漁洋詩話

晚晴

鳴雨作還止，蕭然開晚晴。雄風涼大壑，雌霓貫秋城。臺送遙山碧，窗添夕照明。長空聞雁語，悵悵故園聲。

四語貫字與潮勢汨  
三韓汨字同一生造

上黨

雄藩上黨古今名，形勝居然未易京。南睨河山俱在下，宵看星漢只疑平。義陽千載仍祠廟，夾寨當年劇戰爭。足底黑雲天下脊，幾朝車馬赤霄行。

程崑崙招集萬歲樓

千尋江閣引諸峯，多景登臨策短筇。參佐風流如謝朓，樓臺瀟灑似王恭。三年夢裏西津雨，半夜燈前北固鐘。明日芒屨別君去，城中遙望白雲重。

賦得丹鳳城南秋夜長

丹鳳城南秋夜長，關河寒近落微霜。不須錦字論長恨，自有清砧教斷腸。破衲沙頭鴻欲去，拂雲堆上草

初黃傷心卻羨城邊月。猶照深閨玳瑁梁。

末麗詞

冰雪爲容玉作胎。柔情合傍瑣窗隈。香從清夢迴時覺。花向美人頭上開。

金漸皋

字夢費浙江仁和人順治壬辰進士官漢陽知縣著有怡安堂集○怡安勝任剡邑大吏方以才能薦而翩然乞身其風高矣論詩謂泥古而拘趨今而襲總期抒寫性情今披其集果

如其言

冬日雜詠

日日愁仍攬鏡看。楚人憔悴尙南冠。力微不任施橫草。論定終當待闕棺。元亮晚途甘石隱。孔明早歲本龍蟠。救時事業須經術。莫遣蒼生笑謝安。一生行藏已見此章

邗江

畫舸南遊錦纜移。垂楊空有萬條垂。二分明月仍今夕。十里珠簾異昔時。回望鄉關迷咫尺。頻年踪跡媿支離。可憐楊子橋邊水。只與征人照鬢絲。此述兵燹後之邗江故語多哀風

李來泰

字石臺江西南川人順治壬辰進士康熙己未召試博學鴻詞官翰林院侍講著有石壺集○先生文不肯一語猶人詩獨以平正通達行之能者不拘一格

中山貢使入朝紀事

卻貢趨朝禮遇殊。碧矚魑魅語烏烏。已聞聖主方焚玉。何用鮫人更泣珠。環海近添新郡縣。中山已屬舊

疆隅謹將域外名王表添入天家職貢圖。輕貢獻而重朝服立言有體。

荆公故宅

十年高臥此東峯。出處無端覆已叢。洛蜀黨成疑誤國。熙豐法敝竟緣公。爭墩已賦三山石。記里猶傳九曜宮。漫向春風尋舊澤。生平功過史書中。由言利而變法。由變法而紹述。由紹述而召亂。則宋家南渡。荆公有以致之也。臨川人每多諱言。作者自存直道。

覺塵余故人子也以僧來謁書以贈之

昔年曾訪王官谷。故苑飄零事已非。為問故人誰白髮。忽驚孺子變緇衣。江湖遠道難通問。邱壑終身不療飢。太息廿年塵土夢。鈍根未解箭鋒機。

黎士弘 字媿曾。福建汀人。順治甲午舉人。官寧夏副使道。

至西昌知周櫟園先生無恙且得手書

他鄉驚喜君還在。痛定開函淚更流。萬死才回明主顧。孤兒猶屬故人收。衆中薄命誰能惜。意外微生荷獨留。誤盡閩南碑下客。無端北望哭西州。一氣赴題。少陵有此章法。

王士正 字瞻上。山東新城人。順治乙未進士。由李入為曹郎。改翰林官。至刑部尚書。著有帶經堂集。○漁洋少歲即見重於牧齋。尚書後學。春日富聲望。日高宇內。尊為詩壇圭臬。突過黃初。

終其身無異辭。身後多毛舉。其失互相彈射。而趙秋谷宮贊著談龍錄。以詆謀之。恐未足以服漁洋心也。或謂漁洋癩祭之工太多。性靈反為書卷所掩。故爾雅有餘。而莽蒼之氣。道折之力。往往不及古人。老杜之悲壯沉鬱。每在亂頭粗服中也。應之曰。是則然矣。然獨不曰。權娛難工。愁苦易好。安能使處太平之盛者。強作無病呻吟乎。愚未嘗隨衆譽。亦非敢隨衆毀也。平心以求。錄其最

佳者其有當衆心與否不及計焉。○全集以明麗博雅勝者居多。然恐收之不盡。茲特取其高華渾厚。有法度神韻者。覺漁洋面目爲之改觀。

定軍山諸葛公墓下作

高密起南陽。文終從高祖。暴繫本見疑。數趾亦非武。堂堂諸葛公。魚水託心膂。二表匹謨訓。一德追伊呂。視操但如鬼。畏蜀還如虎。嗟彼巾幗徒。與公豈儔伍。紫色復蛙聲。抵隙各爲主。火井方三炎。赤伏更平聲典。午志士恥帝秦。祭器猶存魯。陰平一失險。面縛忘奔莒。知公抱遺憾。龍臥成千古。峨峨定軍山。悠悠沔陽。潏鬱鬱冬青林。哀哀號杜宇。耕餘拾遺鏃。月黑聞軍鼓。譙侯寧足誅。激昂淚如雨。起四語以蕭何之下廷。櫻形武侯之一德一心。未嘗挫衄也。火井三炎。謂高祖光武昭烈也。敘述忠義武烈。及天命興衰。後激昂。惡邪。如有神助。此等詩典。重高朗。即欲使之無傳。其可得乎。

朝天峽

朝登嘉陵舟。日出羌水赤。履險倦鞍馬。卽次亦稱適。黠黠雙峽來。突見巨靈跣。嶄巖無寸膚。青冥厲雙翻。陰崖積龍蛻。跳波畏鯨擲。往往壓人頂。駭此欲崩石。洞穴峽半開。兵氣尙狼藉。蛇豕據成都。置戍當險厄。至今三十年。白骨滿梓益。流民近稍歸。天意厭兵革。會見竇盧人。燒畚開确磻。慷慨一扣舷。浩歌感今昔。風便黎州城。茫茫波濤白。漁洋五言。俱近所選。唐賢三昧一格。以不着圈點爲主。所謂羚羊挂角。無迹可求。是也。然不善學之。易開平庸之漸。獨入蜀五言。俱宗仰少陵。發秦州後諸詩。能狀山川奇險。愚故舍彼取此。

龍門閣

衆山如連翥，突兀上龍背。鱗鬣中怒張，風雨晝晦昧。出爪作之而，神奇始何代。亂水趨嘉陵，波濤勢交匯。萬壑爭一門，雷霆走其內。直跨背上行，四顧氣什倍。夕陽下岷峨，天彭光破碎。咫尺劍門關，益州此絕塞。子陽昔躍馬，妖夢成怡懣。音懣區區王與孟，泥首終一概。李特亦雄兒，僭竊竟何在。王謂王建子衍，降於郭從韜，孟謂孟知祥。

子景降於宋

五丁峽

南窮石牛道，崑崙下雲棧。三日招我魂，足踣目獨眩。豈知東蒼州，耳目益奇變。始過金牛驛，膠鬲已凌亂。漾水從北來，劣足泛鳧雁。舉頭蟠冢山，峨冠倚天半。大哉神禹功，從此導江漢。漸入五丁峽，譎詭駭聞見。斗壁何獐豸，十萬磨大劍。攢羅列交戟，茫昧通一線。亂水殷峽中，蛟蜃喜瀾汗。仰眺絕圭景，俯聆競雷抃。九鼎鑄神姦，到此百憂患。東方牧犢兒，竟使蠶叢判。我行忽萬里，風土異鄉縣。身落大荒西，終賴皇天眷。咄咄復何言，艱虞一身賤。仰眺絕圭景，見峽高斷日，非圭景所能測也。俯聆競雷抃，音俯聽濤聲如奔雷也。孫樵蜀賦云：臨千仞之驚流兮，波瀾洞而雷抃。

天柱山

朝出元武門，雲垂雨忽凍。登登天柱山，千盤墮瀕洞。崢嶸逾巴閬，槎牙過秦鳳。陟嶺如累棋，下谷疑入甕。心俯尻益高，足縮目先送。敢嗟鳥獸羣，稍喜徒旅衆。我有大羽箭，麗龜輒命中。於菟昂其首，飲羽乃不動。道旁松合抱，巨可任梁棟。惜哉野蔓纏，不蒙匠石用。絕頂見岷山，青城亦伯仲。一氣連諸蕃，三州實西控。

太平幸無事。左髻時入貢。念彼松姚戍。坐甲苦飢凍。俯臨陸海雄。仰視天宇空。長嘯千仞岡。出險忽如夢。

海門歌

岷岷東下江水長。遠從井絡來吳鄉。奔濤萬里始一曲。古之天塹維朱方。北界中原壯南紀。魚龍日月相迴翔。中流一島號浮玉。登高眺遠何茫茫。長空飛鳥去不盡。江海一氣同青蒼。山外兩峯遠奇絕。雙闕屹立天中央。左江右海辨雲氣。如爲八裔分紀疆。江流到此一縛束。早潮晚汐無披猖。燭龍曉日出雲海。山光照耀運扶桑。年來海戍未停罷。峨舸大艦來汪洋。胡豆洲前起烽火。徒兒浦上披襦裳。古聞京口兵可用。寄奴一去天蒼涼。我願此山障江海。七閩百粵爲隄防。作歌大醉臥巖石。起看江月流清光。魚山東北。縛二語得此境與詩俱見關鎖矣。以下皆感時弔古。

丹徒行弔宋武帝

曲阿之北京口東。寄奴王者真英雄。新州伐荻殺龍子。大業遂建丹徒宮。桓家小兒亂天紀。投袂勤王夜中起。擣痛百萬皆人豪。龍行虎步非凡理。從茲大運屬彭城。中原趙魏歸經營。破口千軍五龍涸。藍田一戰二嶠平。南北推移幾千載。太息雄圖竟何在。宿麥寒原少昔人。神鴉社鼓成空塞。王氣銷殘帝宅荒。悠悠江水不勝長。忠臣徒歎袁開府。天命還歸蕭建康。從魏建及亡國言以簡勝末路。匪徒苦心搜索而得是曰神來。

故明景帝陵懷古

景陵在天壽山東峯之下。

金山南臨裂帛湖。荒陵十里鶴鷗呼。奪門事往二百載。行人過此猶歎歎。紅牆剝盡古瓦落。莓苔溜雨生銅鋪。老松離立色枯槁。但穴蟲蟻餘根株。葦塗龍輻禮本殺。矧乃劫火經樵蘇。咫尺天壽雲氣接。坏土猶葬西山隅。洪宣老臣稍凋喪。國成一旦歸刑餘。勃鞞之間史所貶。詎有宦寺千征誅。黃沙慘澹鼓聲死。萬乘一擲成纍俘。國有君矣社稷重。孫申謀鄭無差殊。白登城南翠華返。錢塘司馬功難誣。紛紛南渡議和戰。乃知計左非良圖。同寅之占信奇中。朝衣束市嗟何辜。劍南歸來西內閉。唐家父子輸廐奴。處人骨肉事非易。子臧季札今則無。功罪千秋有特筆。九鼎一髮須人扶。諡同泉鳩理太酷。紀年猶幸無革除。裁令流水良亦足。寧論王匣還珠襦。欲落不落夕陽下。弔古且復留斯須。殘碑滅沒牛礪角。石攬橫臥蒼髯鬚。君臣一代盡宿草。雍門太息當何如。詩凡敷陳其事。易於率直。不如引古人事以代之。中引公孫申之另劫遷西內以證之。又引子臧季札之相讓以反證之。則論有本而不傷於直矣。然惟多讀書者始能。○金山即玉泉山也。漾沙金色。故名。○北狩後。徐理主南遷之議。子臧痛哭止之。○景泰初。監曰。戾。泉鳩。漢戾太子潛匿地也。

戴嵩牛圖

一川莎草煙濛濛。曉來雨過開牛宮。三尺短篋兩殼腴。午陰掉尾嬉涼風。一頭摩角一頭齧。寢說有態何其工。江干笛材老烟竹。橫吹髣髴穿林叢。絹素慘澹神理在。是耶非耶傳戴嵩。田家風物宛在眼。但有耕作無兵戎。我行峨下踰萬里。青衣江上平羌東。翠藤紅樹亂煙雨。風景略與圖中同。一從羽書急滇海。甌

越秦楚交傳烽，益都迢遙隔天末。舊遊有夢尋巴寶，旄牛徼外阻王會。萬蹄驕馬高纏駿，千村萬落長荆棘。何時金甲銷春農，童牛不牯可三歎。卷圖風雨來長松，以畫牛引起太平時田家風物。至吳歌尙三逆叛而此景不復見矣。末以童牛不牯意作結層層收束。是

秦鏡詞爲袁松籬作

熒熒古鏡雙盤龍，流傳本出咸陽宮。秦時明月至今在，剝落泥沙露光彩。當年秦并六國時，後宮閉置千雙眉。守宮注臂鏡照膽，三十六年君不知。華陰道上逢山鬼，輜輶東來祖龍死。美人鐘鼓散如煙，此鏡蒼涼閱朝市。憶昔大收天下兵，十二金人初鑄成。還令餘事作奩鑑，太乙下視蛟龍驚。劉興羸蹶何倉卒，金鑑千秋如一髮。秦鏡虛懸照膽寒，不照長城多白骨。自注漢祖入咸陽宮得方鏡廣四尺九寸照見五藏見西京雜記。○只未語另換一意通體似不平直。

漫興

潯潯荆襄地，當年割據州。營連九節度，星動五諸侯。已共長江險，應關上將憂。郭門傳息壤，不障洞庭流。九節度指郡王見勅及諸將。○時長沙守臣奔逸賊途有湖南六郡勞燭諸蠻。

嗚咽秦川水，秋風入鼓鼙。妖星躔隴右，大將出安西。陸陸將誰附，蒼蒼迥不迷。似聞寬大詔，不忍戮鯨鯢。大將指圖海也。

烽火傳花馬，將軍發賀蘭。天心誅叛亟，國法受降寬。衙帳青唐入，沙場白骨寒。亂臣誰貫死，史筆後人看。



青唐地在黃河之曲

不見離支熟。闐州驛騎來。大農師漸老。使者節難迴。五嶺烽相照。三山瘴未開。冥冥炎海外。目極釣龍臺。西北和親國。王姬禮數殊。一朝忘甥舅。萬里送頭顱。露布明駝足。軍鋒落雁都。六師信神武。羣盜敢枝梧。時囑爾囑亦叛道。端郡王平之。故云。

海內兵塵滿。乾坤正氣孤。數公明大義。一死激頑夫。關塞青楓晚。英靈白日徂。他年看秉筆。得慰鬼雄無。此指守土死節。如陳丹赤。楊三知。劉欽。鄒徐。譚劉士英。諸臣。○新城五言律。俱追琢工穩。此特取其蒼莽雄傑者。

苻離弔潁川侯傅公

躍馬千山外。呼鷹百戰場。自注古百戰道在宿境。平蕪何莽蒼。雲氣忽飛揚。寂寂通侯里。沉沉大澤鄉。潁川湯沐盡。空羨夥頤王。自注陳涉亦州人。漢高祖為置守冢。○漢高於陳涉猶置守冢。況潁公之平蜀。平瀉為功最鉅。而卒以猜忌不免。明祖之待功臣。可云厚乎。用意全在反觀。

潼關

潼津直上勢嵯峨。天險初從百二過。兩戒中分蟠太華。孤城北折走黃河。復隍幾見熊羆守。棄甲空傳犀兕多。漢闕唐陵盡禾黍。雁門司馬恨如何。雁門司馬。謂孫傳庭。孫因天雨催戰而敗。孫敗。賊遂長驅入關。而明亡矣。故結意及之。

雨度柴關嶺

棧中新漲未歸槽。百丈柴關水怒號。鳥語不聞深箐黑。馬蹄直上亂雲高。天垂洞壑蛟龍蟄。秋老牙鬚虎

豹豪誰識熏香束省客。戎衣斜壓赫連刀。

沔縣謁諸葛忠武侯祠

天漢遙遙指劍關。逢人先問定軍山。惠陵草木冰霜裏。丞相祠堂檜柏間。八陣風雲通指顧。一江波浪急潺湲。遺民衢路還私祭。不獨英雄血淚斑。

晚登夔府東城樓望八陣圖

永安宮殿莽榛蕪。炎漢存亡六尺孤。城上風雲猶護蜀。江間波浪失吞吳。魚龍夜偃三巴路。蛇鳥秋懸八陣圖。搔首桓公憑弔處。猿聲落日滿夔巫。議論格律聲響無一不合。在北地信陽詩中定推上乘。○八陣圖有三。在夔州者六十有四。爲方陣法。

渡河西望有感

使者河源復卻迴。杖藜曾記到雲臺。高秋華岳三峯出。曉日潼關四扇開。星宿海從天上落。崑崙槎自斗邊來。何時更訪茅龍去。東望滄溟水一杯。華嶽東北有雲臺峯。峯上望中原。見黃河從塞外來。○通體是渡河後西望故皆作追憶語。未思他日更往有餘情焉。

寄李鄴園尙書二首

聞天烽火達錢塘。太乙靈旗指越疆。文武共推周吉甫。功名誰並郭汾陽。椎牛五夜千夫膳。射虎三秋百戰場。今日羅平妖鳥盡。早聞憂國鬢如霜。

爛柯山上陣雲低。太末城南月暈齊。飛檄直臨彭島外。纖塵不動浙江西。戰袍血濺盤鷓鴣。雄劍霜寒淬

鷓鴣半壁東南功不細。天書頻下武都泥。鄴國名之芳。吹逆叛時。總督浙江。聞變即移鎮衢州。掘仙霞關。使賊不得踰。竄覓江浙三四省。實錄也。彭門島連福建興漳。公連海寇。

和徐健菴宮贊喜吳漢槎入關之作

丁零絕塞鬢毛斑。雪窖招魂再入關。萬古窮荒生馬角。幾人樂府唱刀環。天邊魍魅愁遷客。江上尊鱸話故山。太息梅村今宿草。不留老眼待君還。徐健菴時為宮贊。為納鏃放還。此古道交也。梅村有送吳季子出塞詩。故云。

皖城懷古

清水塘邊余闕祠。雲霄浩氣凜鬚眉。英姿颯爽猶橫槩。古砌荒涼只斷碑。鶴化千年非故國。雞鳴十廟不同時。皖江便是田橫島。義士悲歌為涕洟。忠宣死於陳友諒。不死於明。然存此忠憤之心。則化鶴歸來。必不與十廟功臣並馨祠祀者也。辭令挾議論以行。方是知人論世。

趙承旨畫羊

三百羣中見兩頭。依然秃筆掃擘臠。搗來清遠吳興地。忽憶蒼茫勅勒秋。南渡銅駝猶戀洛。西歸玉馬已朝周。牧羝落盡蘇卿節。五字河梁萬古愁。三四已見命意矣。復以銅駝玉馬一聯作韻。詞則凌空。意則鋒刃。而更以蘇子卿之不失臣節。足之趙王孫何處生活耶。人云詩中有史。此則詩有春秋。

余澹心寄金陵詠懷古跡卻寄

千古秦淮水。東流繞舊京。江南戎馬後。愁殺庾蘭成。

國士橋

國士橋邊水。千秋恨未窮。如聞柱厲叔。死報莒敖公。  
公不以國士遇叔。及公被難。叔以死報之。讓之不  
死於范中行。而獨死於知伯。未得為完人矣。此種詩  
有補名教。

石城橋示倪鴈園太史

昔作秦淮客。朱樓賦洞簫。白頭故人盡。重上石城橋。  
不言神傷。盛唐風味。

再過露筋祠

翠羽明璫尚儼然。湖雲祠樹碧於煙。行人繫纜月初墮。門外野風開白蓮。  
闌揚貞烈。易入於腐。故以題外  
着意。法行之高。郵遠近。俱種白

蓮。二語得陸天隨月  
曉風清。欲墮時意。

秦淮雜詩十四首

新歌細字寫冰紈。小部君王帶笑看。千載秦淮嗚咽水。不應仍恨孔都官。  
自注。弘光時。阮司馬以吳綾作  
朱絲闌。書燕子箋。諸劇進宮中。

○諸咏皆瑣屑。不  
甚關係。故獨取此。

題尤展成新樂府

南苑西風御水流。殿前無復按梁州。飄零法曲人間遍。誰付當年菊部頭。  
自注。展成樂府。順  
治中曾進御覽。

猿臂丁年出塞行。灞陵醉尉莫相輕。旗亭被酒何人識。射虎將軍右北平。  
千金七首土花斑。兒女恩讎事等閒。他日與君論劍術。要離塚畔買青山。  
自注。題黑  
白衛傳奇。

灞橋寄內

太華終南萬里遙。西來無處不魂銷。閨中若問金錢卜。秋雨秋風過灞橋。

馬嵬懷古

巴山夜雨卻歸秦。金粟堆邊草不春。一種傾城好顏色。茂陵終傍李夫人。  
傷其不得傍金粟堆也。以李  
夫人形之。便曲而有餘味。

秦中凱歌

新開麟閣賞元功。頗牧重看出禁中。此去西人須破膽。將軍昨日下午遼東。  
天上黃河萬里來。巨靈高掌抱雲臺。遙看丞相行營去。日射潼關四扇開。  
涇原西北駐王師。尺一無煩介馬馳。共道皇恩天浩蕩。不教京觀築鯨鯢。  
袞衣照路有輝光。班劍威儀出尙方。大將囊鞬迎道左。萬人鼓吹入平涼。

河西三將氣如虹。百戰功名次上公。詔下一時齊虎拜。漢朝爭羨寶安豐。  
自注。將軍張勇。進爵靖逆侯。提  
督王進寶。進奮威將軍。總兵孫  
州提督。進涼。

三月軍鋒次渭橋。旋看飲至紫宸朝。空言韓范威名大。五路何曾制曩霄。  
此爲王輔臣卽馬鶴子之叛。秦  
隴震動。大學士圖海靖逆侯張

勇奮威將軍王進寶提督孫思克討平之因作凱歌也前明徐文長沈嘉則諸凱歌非不鋒利然皆書生之習未除對此知爲廟堂之作

蟻磯靈澤夫人祠

霜氣江東久寂寥永安宮殿蒼蕭蕭都將家國無窮恨分付潯陽上下潮此昭烈孫夫人祠也潯陽以上爲劉潯陽以下爲孫夫人之恨

真無窮矣

謁文忠烈公祠

精神如破貝州時晚節猶能動四夷天遣不同韓富沒姓名留重黨人碑如此作詩後許不廢議論○黨人碑以司馬光第一文彥博次

之原本留冠黨人碑擬易重字諒漁洋亦不以爲妄也

馮雲驤字訥生山西振武衛人順治乙未進士

雲棧

山腰萬仞露下臨不測淵俯身窺棲鶴舉手接飛鸞山頭舊冰雪閃閃挂飛泉溪中萬古石跳珠濺潺湲忽驚仄路絕空行駕危椽峯峯自迴合藤蔓束荒煙盤盤緣石壁磴磴擱青天遙看來往人縹緲訝飛仙更聞猛虎嘯當我踞層巔勞臣有定限豈敢憚艱難四馬千山外迢迢夕照前

鳳嶺

鳳嶺行來欲上天此行無異作飛仙紅霞白日回頭近鳥道虵盤獨馬穿未斷崩崖愁瀑水半欹懸徑仗

危椽側身萬仞峯巔過。秦蜀遙看兩點煙。得鳥道地盤句上句亦覺不平作詩者宜知此法。

邱象升字曙戒江南山陽人順治乙未進士。

清遠峽

委折江如線。鋒稜勢益增。曉昏雲氣變。雷雨石痕崩。洞古空猿跡。菴荒暗佛燈。客心愁入暮。高峽尙層層。

苦竹渡

夕陽殘影沒。衰眼翳長空。樹暗驚人語。溪寒避虎風。戒心齊擊柝。野火亂燒叢。前路津門是。星華望未通。

連上章能狀奇險之境。

嚴沈字子餐浙江餘杭人順治乙未進士官戶部侍郎○司農敏退謙抑雖踐九列不殊寒素有譏彈其詩者應時改定遠近稱為德人。

送吳謹侯同館誦廣文還里作歌

擊筑且斟燕市酒。浮雲富貴吾何有。巖前碧樹吐朱華。天上白衣幻蒼狗。風翻易水橫素波。送別聊爲暇。豫歌松皮屈鐵老山雪。鵬翮擊浪凌溟河。鸞龍吐鳳留華省。授經博士官偏冷。夢迴輦道記鳴珂。坐聽轆轤初轉井。西風冥冥吹白沙。尊前細雨開簷花。杜老乍簪青瑣筆。鄭虔本愛赤城霞。奪我鳳凰池。未妨彭澤醉。興來拄笏西山翠。自有哀吟動鬼神。長將詩卷留天地。不知壁水況金門。見說移官亦主恩。但看臥坦邊韶腹。有日槎迴博望源。夢迴輦道二語寫其玉堂天上之感未并望主恩之賜環而出以徽婉不傷直致得立言之體。

田凝只索畫久不得報歌以代柬

我昔平湖弄秋水。酒酣最愛羣峯青。興來落筆寫山色。泉石出沒雲冥冥。一日十紙不厭速。貴取繪意非傳形。三春索米長安陌。馬足泥濘滯行跡。西山玉河在眼前。神昏甯強真意隔。案頭細素委零亂。貴遊尺一相催迫。必逢好友情性諧。吮墨含毫始光澤。首秋暑退風簾開。疎雲細雨滋綠苔。玉盃烹茗泛香雪。十指拂拂神初來。故舒直幹筆一放。試疊層嶺煙齊迴。須臾脫手天宵森。此事原堪一朝了。不噴濡滯嗜我真。相遲霜前看雲嶠。意得寫神。人力不與。速則片刻。遲積歲時。不以日月計也。作詩作文亦然。然可與言者蓋罕。

春日漫興

吏隱淹微尚。棲遲帝里春。虛名慙諫草。薄祿慰慈親。馬度垣松直。鶯啼苑柳勻。主恩殊未報。不敢慕垂綸。補衰瞻天近。斑衣愛日長。生成看燕雀。戰伐剩豺狼。紙筆兒誰好。柴桑婦不忘。閉門焚草畢。歸夢五湖傍。三語翼物各得所。四語愛干戈。未靖報國空懷養。親除願直覺百端交集矣。

懷季天中遼左

萬里邊城問謫居。躬耕遼海意何如。龍沙更作投湘賦。鳳闕長懸諫獵書。鴨綠流澌春水下。醫閭積雪暮寒餘。柳條漸識陽和近。未必君恩雨露疎。

汪

琬字苦文。江南長洲人。順治乙未進士。授戶部主事。康熙己未。召試博學鴻詞。官翰林院編修。著有堯峯詩鈔。○鈍翁官部曹後。與王西樵昆弟諸人稱詩都下。風格原近唐人。中年後。以



劍南石湖爲宗，後則類然降格矣。茲擇其矜貴有餘者著於卷中，不使掃括字面者以鈍翁爲藉口也。生平穿穴經史，議論俱有根柢，雖被其齟齬者，終稱許焉。

泊石湖有懷

江風逗餘涼，輟棹自成賞。谷口霞已開，洲心月初上。遙聞欸乃曲，知是漁人唱。獨樹影蕭條，孤鴻色惆悵。不見故人來，時向煙中望。此章近孟山人，是鈍翁中年作。描摹晚景，令讀者如置身其間。

遊鄧尉山遇徐生

夙齡睠名山，抗志事遊衍。葛弱容屢捫，梁危許孤踐。風泉渺難尋，空翠紛莫辨。去美惜已遙，來奇望猶緬。餘霞互明滅，微雲忽舒卷。裊裊薜蘿衣，之子來何晚。道與寂冥會，志向崇深展。倘秉偕隱心，結廬詎在遠。去美來奇二語，深於尋山者領之。○作者五言古過於直白，二章猶有言外者。

玉鈎斜

月觀淒涼罷歌舞，三千豔質窳荒楚。寶鈿羅帳半隨身，踢作吳公臺下土。春江如故錦帆非，露葉風條積漸稀。蕭孃行雨知何處，惟見橫塘蛺蝶飛。

有客言黃魚事紀之

三吳五月炎蒸初，棟樹著雨花扶疎。自注：吳諺云：棟樹花開黃魚來。此時黃魚最稱美，風味絕勝長橋鱸。憶昔東南全盛餘，海舶銜尾張網，飄公然滿載返吳市。市中雜選謹擔夫，柳條貫鯉冰貯腹。數尾僅直千青蚨，豪門膳宰

善烹治。劑以醯醬芼筍蔬。芳鮮頓覺溢几案。主賓下箸爭歡噉。自從洲島阻兵燹。鯨鯢竄逸稽天誅。詔書尺一禁航海。漁師安敢颿揚蒲。蛤蜊海母尙難致。況望此魚供客需。老饕雖患食指動。畏觸禁令生他虞。吳儂日夕歡且吁。有司東溟嚴鑼銖。何常小醜就拘執。舳艫往返如通衢。趕趁風中販鱸至。此魚復得登庖廚。吾儕口腹詎足投。但願海晏波濤除。廟堂日竢羽書捷。戈船諸將令何如。此海氣未靖時作也。食物羽書之捷望之。纖小題覺大有關係。

送再從姪處默

又向長安別。淒然動客愁。秋風吹遠道。落日在孤舟。雁逐江烟下。潮衝楚樹流。何時復相見。與續竹林遊。賈長江詩以古戍落黃葉。浩然離故關爲上。以其格高也。篇中三四語亦然。

計甫草至寓齋

門巷何蕭索。惟君步履頻。青雲幾故舊。白首尙風塵。身受才名誤。文從患難真。耦耕知未遂。相顧倍傷神。十字爲千古文人道之。

送人南遊

長路應難問。君行況及秋。不知葭葦外。何處泊孤舟。遠嶼連雲起。殘潮漾月流。可憐南去雁。并作客中愁。

寄贈吳門故人

遙羨風流顧愷之。愛翻新曲覆殘碁。家臨綠水長洲苑。人在青山短簿祠。芳草漸逢歸燕後。落花已過浴蠶時。一春不得陪遊賞。苦恨蹉跎滿鬢絲。三四工絕秀絕如此何礙宋詩他如白蛺蝶飛芳草畔紅蜻蜓立藕花中柳條細似千行線荷葉圓於半兩錢景盡句中不敢

同聲  
附和

賦得宮人入道

翻因薄命愛長生。羽斨雲冠再拜行。曾被玉皇教按曲。忽隨金母學吹笙。顏逢鍊液重疑豔。身爲持齋轉

覺輕。從此幽棲如野鶴。萬年枝上月空明。五六語妙於雙關

自乞天恩下玉墀。宮中女伴鎖相思。羞題紅葉傳塵世。願守丹爐事本師。垂手只攜禳斗訣。點脣初習步虛詞。此生無復昭陽夢。猶爲君王夜祝釐。結意傳出忠愛。合溫柔敦厚之旨。

送魏子存之成都同西樵周量貽上

鳳城垂柳爲君攀。西去高軒指散關。望帝愁魂春樹外。臥龍故壘夕陽間。天懸鳥道連三峽。地入蠶叢控百蠻。到日不妨頻弔古。訟庭草長簿書閒。此猶近唐人體魄

和李退翁侍郎讀水經注憶洞庭之作

會持使節遠揚舲。落木層波共杳冥。澤畔有人哀郢客。雲中何處降湘靈。雨過斑竹千叢綠。潮落芳蘭兩岸青。回首舊遊今阻絕。不堪寂寞對遺經。

阻風

獨臥孤篷底。長途此夜窮。殷勤解留客。惟有石尤風。

姑蘇楊柳枝詞

臘盡寒威尚未消。淺黃輕碧影迢迢。費他煙雨知何限。只替東風染柳條。

白玉堂前發數枝。粧成每自下階墀。中庭不是無花看。獨爲清陰立少時。全以韻勝。

過石塢

主賓無語似相忘。淨掃青苔坐夕陽。乳燕飛飛蛙閣閣。楚萍謝絮滿池塘。分甘錄話中。新城獨取此詩。豈風神氣味與之相近耶。

卷四

曹申吉字澹餘。山東安邱人。順治乙未進士。官貴州巡撫。兄升六。長於詩。二曹齊名。時爲安邱增重。○吳逆反。公陷賊中。庚申夏。蠟書赴闕。密陳機宜。爲賊所覺。劫歸遇害。

武昌雜詩

隔岸晴川影。帆檣觸浪奔。禹功江漢大。楚俗鬼神尊。地濕陰常盛。天低日易昏。荒洲猶寂寞。詞賦擬招魂。

禹功二句。已盡楚中之天。

人日貴陽作

故里今年別。殊鄉昨日春。看雲遙愛日。紀歲乍逢人。澤國湘沅外。山城魍魎鄰。野梅初應候。寒雨幾經旬。赤帖千門換。雕題百帳馴。綵幡迎楚雁。銅鼓賽苗神。瘴癘崎嶇地。艱危老大身。已甘淪井鬼。無復繪麒麟。萋莢重開子。椒盤屢薦辛。牂牁天更遠。屈賈弔何頻。暖律迴窮谷。浮生託大鈞。友朋借楚道。詞賦動芳辰。鬢好觀青鏡。心期理白蘋。鳳樓歌舞處。望斷屬車塵。懷鄉戀主。句烹字鍊。出之體源。應在老杜。

楚南

偶向瀟湘聽斷猿。斑斑千載泣龍孫。楚南近日蒼生淚。不是當年帝子痕。

劉體仁

字公猷。河南潁川衛人。順治乙未進士。官吏部考功郎。著有蒲菴集。○公猷詩出以生新。每近於灑。嗜好應在東野。王漁洋屢稱之。池北偶談載公猷友某素喜琴。沒數年。公猷一日挾

姬過其墓。停車酌酒。使姬各操一曲。其風致如此。

送戴務旂遊華山

夜談太華奇。朝來理輕策。似子獨往意。自然生羽翮。我無濟勝具。心懸神仙宅。椽壁聞蟻緣。索度或猿擲。卽至玉女盆。蓮花豈堪摘。頗窮造化由。能識巨靈擘。一身出天地。笑看培塿積。歸來毛髓異。定跨茅龍脊。

起十字寫探奇之勇。通體刻削不肯猶人。

寄阮亭司理

離居才幾日。蘭葉春風生。門外卽流水。片帆東下輕。野處寡新友。良辰多遠情。思君如草色。迢遞向蕪城。

卽事

西湖小閣多延月，好友同舟半是僧。寄語江南老桑苧，秋山紫蕨憶行滕。顧華玉訪孫太初時，湖中所見景象如是。

秦松齡字留仙，江南無錫人。順治乙未進士，入翰林，罷歸。康熙己未召試博學鴻詞，官諭德。先生初入翰林，賦白鶴詩，應制中云：高鳴常向月，善舞不迎人。上重其有品。

金陵司馬行

宿遷旅次，何子曰鴻述其先世遺事，請作是詩兼送之別。

汝祖金陵小司馬，移家始傍梁溪居。不事毛雖好說劍，男兒塞上當捐軀。襄陽法曹年少日，貂璫盡屈諸司膝。唯公偏強殺其奴，脫走京師歸請室。請室朝朝復暮暮，手把陰符自箋注。百年興廢摠瞭如，九邊阨塞能指數。溫旨重寬直節臣，芙蓉湖上幾垂綸。援邊忽奉勤王檄，應詔還留報主身。萬金散盡酌死士，死士曾無一人死。偏師纔出復回旋，西風淚落桑乾水。破耗軍需罪不宥，權奸在路天無晝。鍛鍊誰當楊魏先，覆車幾作熊王後。信郎龍飛再赦還，還家常憶玉門關。壯心未展英雄死，孫子飄零衣食艱。送君東行在岐路，努力功名莫返顧。濁酒今朝贈一觴，宿遷城外瀟瀟雨。權奸在路，天無晝，廟之時，何時耶？小司誅奸談發潛德者，我有取焉。

上熊雪堂先生

正繫蒼生望，先生未合閒。累朝看赤鳥，兩疏乞青山。直道安危後，深心去就間。盈盈章貢水，爲照老臣顏。

潞河寒食

浮雲北望悵何依。寒食餘威未減衣。柳色獨隨行騎沒。桃花仍見釣人歸。青烟禁燭誰家散。紫燕春泥到處飛。自別帝城多歲月。西山朝爽尙暉暉。此罷官出長安詩。子心猶速言下可思。

和吳弘人見贈之作

頻年蹤跡混樵漁。舊友還過慰索居。白首更逢多難後。青山重憶定交初。詩篇寂寞茆齋雨。懷袖蒼涼絕

塞書。自注：弘人出示令弟洪棧塞上書。尊酒共君秋夜醉。滿庭清露濕芙蓉。

于忠肅公墓

定策當年奠帝京。墓門遙見半湖明。傷殘松柏啼新鬼。寂寞祠堂臥老兵。宗廟有靈存社稷。英皇無意殺先生。古來遺恨錢塘水。又繞台山氣不平。英皇無意殺先生殺之者徐石也。天順異日之悔可見。

雜感

烽火章江警急多。滕王樓閣轉嵯峨。雕鞍曉日明珠玉。列帳秋風泣綺羅。坐算幾聞黃石略。戰酣誰奮魯陽戈。司農日夜憂財匱。擊鼓椎牛氣若何。授鉞親賢廟算強。旌旗萬里作巖疆。周家同姓盟爲長。漢制非劉爵不王。當日酌助原異數。至今除患屢分防。堪嗟諸將功成後。不肯歌鐘會未央。

關隴車書此日同。相公拜命領元戎。屯邊戍久推充國。納土功寧比寶融。詔出中朝心獨厚。恩頒西土慶何窮。聖人威德原兼用。干羽虞廷舞未終。時三逆連結而鄭寇亦復出沒徵兵轉餉紛紛未定故作者壓形於言

荆南春日感懷

聖主崇文雅化新。天書初下訪儒臣。漢廷有意尊經術。宣室何妨對鬼神。喜說圖中求駿馬。還看席上得奇珍。上林春色應如舊。憔悴當年獻賦人。此爲詔求鴻博而言

把酒臨江感慨多。西南天地正橫戈。登樓有客依劉表。使粵何人下趙佗。浪接三巴聲激壯。觀名一柱勢嵯峨。偶逢春晝無烽火。聽得琵琶幾曲歌。時南粵猶未平故屯懷有憂

滿目

滿目紅旗載米船。西南何日罷戈鋌。輸軍未盡蕭何策。憂國空思卜式賢。薄海偏供兵革費。羣公莫濫水衡錢。焦勞尙體君王意。救亂無如儉德先。

閱

敍字鶴驪江南江都人順治乙未進士官廣西提學

輯廣西志略漫述

莫擬浮湘續楚歌。雲山渺渺意如何。三唐遷客南中盛。兩宋移官嶺外多。人萃英華承雨露。天留碑碣寵巖阿。卽今有士能耽隱。猶自青山臥薜蘿。



捲甲曾聞捷若風。軍威久鎮百蠻中。如何債帥皆徵貨。多事中涓獨總戎。經術籌邊原理學。權謀制勝亦膚功。呼庚誰復蒐軍實。府海司倉自變通。

王 揆字端士。江南太倉人。順治已未進士。有芝廬集。

送嬾雲道人還滇中

干戈未定欲何之。萬里還家一柄隨。湖海班荆無姓氏。風塵面壁有鬚眉。身當持鉢飄零日。魂憶投詩慟哭時。故國魚龍秋寂寞。不堪憑吊向昆池。

偕伯氏周臣過織簾先生故居同顧伊人訪陳確菴夜宿

草堂人去薜蘿存。洒淚空招未返魂。猶見康成遺故籍。忽思元亮老孤村。青浮稻色秋間路。白照蘆花月裏門。感舊愈難今夜別。追維生死對黃昏。  
織簾先生。顧麟士也。康成故籍。指麟士言。元亮孤村。指確菴言。確菴名。兩先生皆志節士。末句追維生死。死謂麟士。生謂確菴。一語總收二人。

丁 澎字飛濤。浙江仁和人。順治乙未進士。官禮部郎中。有扶荔堂詩。○嚴灝亭云。祠部少有白燕樓。爲時白燕樓。爲時傾倒如此。

題曾青藜尊人傳後

莫爲信陵士。寧作韓陵石。子昇碑記存荒烟。杯酒不澆公子宅。不見曾公古俠者。十歲能文兼躍馬。賦就

欲奪雲夢田，劍擊長凌武。安瓦灌夫弟，畜朱家奴。乾坤何處容腐儒，豎子成名何足齒。天下英雄君與孤，干戈鼎沸若飛電。江南黃犢如席捲，慷慨談兵尊俎前。草檄特膺公府薦，片紙能勝十萬師。一身恥爲三語掾，登牀自許捉刀人。帳中莫使孫郎見，此時樓船橫楚州。朝議不敢申同讐，指揮泣下袁開府。信誓直折寧南侯，功成不賞蹈滄海。魯連遺風至今在，歲月俱因戎馬馳。壯心不與滄桑改，徐庶還家爲老親。江湖把釣足閒身，少微星邊愛處士。秋風原上動旁人，有子青藜與我厚。是父聲名滿人口，飲泣再拜前致辭。乃公佳傳煩下走，猗嗟韓陵信陵掩秋霧。烏雀啾啾白楊渡，千古之名何有哉。貞珉長傍松楸樹，子爲此歌君莫悲。聊作阡銘表其墓。

送王山長還楚南

地盡三巴接，將歸南雍州。天空一雁斷，何處岳陽樓。橘樹侵寒雨，猿聲入暮秋。仲宣仍作客，更切望鄉愁。

詩取其格

慰李琳枝侍御詔獄

抗疏今何事，身危直道難。忽聞收北寺，不敢問南冠。草莽臣無狀，朝廷法屢寬。聖明知汝愨，頻取諫書看。

慰臣直望主恩也。執政方持法，明君無此心。一種立言之體。

初至靖安寄邸中諸舊友

萬里從戎路崎嶇。正此行。雁聲孤斷。虎氣撼空城。淚盡慚兒女。身危仗聖明。刀鐔何日約。回首玉關情。  
虎氣五字。如見獸賊破成都後景象。

東岡

信是興王地。城郊古木穠。鶴鳴三殿雨。猿挂二陵松。疎拙違明主。胼胝愧老農。吾廬荒徑近。時見白雲封。  
送趙錦帆比部歸汴州

攜酒青門送客多。相看無奈別離何。漫愁關塞疲征馬。從此乾坤有荷蓑。藥鼎千年藏日月。雲山一路少風波。天寒大澤行人斷。獨向夷門叩角歌。  
言錦帆歸去後草野方有耕鑿之人推重之至也。

送孫九畹備兵保寧

萬里炎方尙枕戈。旌車八月下牂牁。猿聲苦霧城邊急。虎迹荒原戰後多。熨道生猿能漢語。羌西諸將半渝歌。休言割據蠶叢遠。灩澦秋高起白波。

見燕

杏葉新陰拂女牆。風吹小燕過池塘。相期定似逢寒食。乍見爭如說故鄉。弄影不教沾柳絮。衝泥何惜點琴囊。雙栖並翅真憐汝。愁殺盧家春晝長。  
一語中燕之多情與己之多情皆見。可云善作情語。

度嶺見長城

嶺坂風迴樹鬱盤。長城如帶霧中看。隨陽雁斷天疑盡。背日峯高夏苦寒。滄海不沉秦女石。浮雲欲動楚臣冠。伊川一曲先揮淚。況是親經行路難。登高臨深自有此種眼界。此種心胸奇警之語自然湧出。

過長洲吳瑤如郡守招飲漫賦

悲歌燕市意何窮。汝向南行我向東。十九年歸蘇屬國。二千石重漢吳公。他時苦憶松江鱸。此夜愁聞塞北鴻。休傍姑蘇問麋鹿。荒臺空鏤白楊風。三語謂已從靖安歸。四語謂吳郡守也。酬應詩能泯酬應之迹。亦復可存。

送汪舟次檢討奉使册封琉球

孤懸鼈嶼海涯間。襟帶窮荒控百蠻。已奉春秋知正朔。何年南北併中山。自天宸翰龍鱗動。繞日珠旂豹尾斑。底事皇華念將母。乘風歸路指刀環。康熙戊戌歲徐澂齋太史出使琉球歸省侍母時作詩送行者及殊失輕重也。此詩將母於結處一點見前輩位置之妥。

送徐徵君電發辟召之京

此去朝辭林屋峯。布衣疏屨倍從容。眼中吾老非衰鳳。足下人稱是臥龍。應詔趨由丞相府。封章辟自大司農。知君芸閣詩成後。苦憶西堂舊植松。

塞上曲

百戰洮河西備羌。合黎山外月如霜。白頭老將沙場臥。尙說彎弓從武皇。

王日藻字印周江南華亭人順治未進士官湖南巡撫

潘山人至自遼左

匹馬南歸道路長。相逢畫閣話遼陽。竇家錦字詩難寄。蘇氏河梁雁幾行。秋盡隴雲寒欲雨。陽回邊草白於霜。漢廷亦下金雞使。誰念當時折檻郎。

董舍字閻石江南松江人順治未進士著有藝葵詩集

旅窗讀漢書

提兵十萬擁元戎。斬帥湛船意氣雄。戰鬪八年能獨霸。殺降三戶竟無功。秦軍已破漳河上。漢社初移渭水東。諸將膝行齊稟命。莫因成敗笑重瞳。

登穹窿謁句曲行宮

山勢崑崙欲到難。玉真宮殿擁千官。香飄下界青冥近。聲入諸天碧落寒。洞口斷雲朝放鶴。石根晴樹暮棲鸞。金門羽客龍泥印。夜禮星辰上醮壇。

彭襄字子贊四川閬中人順治乙未進士

書屈陶合刻後

變風以後數靈均。彭澤天然見性真。對酒不忘書甲子。懷沙空自歎庚寅。滋蘭九畹心偏遠。采菊東籬句

有神五柳三閭異醒醉何妨千載德爲鄰。分分合合律細語工與鄭湛若屈原賈誼一章莫能甲乙。

沈自南字留侯江南吳江人順治乙未進士官蓬萊知縣。

同韓倬次雪聲遠登快風閣兼懷釋堂

秋來傑閣共登臨極浦遙山入望深吳苑弟兄欣聚首梁園賓客最關心蒹葭拂浪渾如雪橘柚垂煙半似金指點江鄉盡圖畫遲君墨妙一題襟

王澤弘字涓來湖北黃岡人順治乙未進士官至禮部尙書著有吳廬集○吳廬辭官後移家金陵既老屹屹風雅遠近奉爲摠持者也綠稿本未鐫漸次散失故所收止此。

送陳心簡之遼東

驅車獨旅向三韓九月秋風已漸寒纔道玉門生入穩誰知鐵嶺放歸難長天積雪家何處絕塞嚴冰路幾盤鴨綠江深終古恨南來鴻雁報平安

留侯祠

穀城山下草離離追憶高風繫所思漫道留侯如女子每看楚帝只嬰兒報韓志切逢黃石翼漢功成賴紫芝身退拂衣還辟穀神仙原是帝王師

易州使院詠松

去年手植新松樹碧葉青枝取次陰幹長凌雲應有日後人誰識歲寒心。果抱歲寒心後自有識者。

買花

賣花擔上露纔乾。野老移來滿藥闌。拋卻故山花事盛。翻來燕市買花看。

陸鳴珂字次山。江南華亭人。順治乙未進士官學使。著有使蜀詩草。

七盤上雞頭關

北棧行將盡。雞頭勢轉雄。七盤蟻旋磨。百折馬行空。天險關山壯。人謀斧鑿工。十年轉戰地。故壘動悲風。

山川之險。須得奇警。一聯寫之。此老杜遺法。

方兆及字子詒。江南桐城人。舉人。官山東按察司僉事。著有天文官制諸書。詩稿散佚。茲於龍眠風雅中採取二章。等於吉光片羽。

劉生

劉生可是高皇裔。任俠由來重漢京。六郡良家輸浩氣。五陵豪士屬荒飢。雕龍雄辯金張館。獵騎橫穿衛

霍營。死難報恩如飲食。一言投合此身輕。劉生未詳何代人。辭始於梁元帝。是六朝時樂府也。後人相沿咏之。篇中狀其任俠縱橫。已云曲盡。

銅雀妓

漢室金甌非改步。曹公銅雀已成臺。名姝俱匹英雄去。豔質惟邀妓女來。瑤席冷餘無霸氣。繡帷空後有

微哀。卻憐疑塚紛如垤。欲望何從心早灰。

錢陸燦字湘靈。江南常熟人。順治丁酉舉人。○湘靈為牧齋族子。然其詩不為虞山派所縛。別調獨彈。憂憂自異。毗陵學詩者多宗之。

牡丹花下集同袁籀菴唐祖命方爾止張瑤星余淡心黃俞邵諸君子長句一首

前歲花時渡江去。去歲吳門三月暮。三度花開一度看。今年恰在金陵住。金陵舊是帝王都。歲歲花開如畫圖。此花又殿春風後。朱衣王謝相傳呼。一筵釀費中人產。一花千人萬人眼。金盤綵籃共貽贈。招邀名士分折柬。永和蘭亭金谷園。月落檀板催金尊。百尺烏絲長到地。清辭豔句爭飛翻。得所穠花易消歇。子規啼血棲宮闕。無復天彭百馱花。王孫五勝埋香國。花殘人散可憐春。十處園林九處塵。欲往城南訪耆舊。酒徒零落空芳辰。太史園中花百種。紅歌綠捧花頭重。花神有意洗粧遲。要勒詞頭罔君寵。諸公同日看花來。鄧生酒甕還重開。廿年無此好事者。無詩不醉那能回。酒醉詩成花欲語。明歲花開待子汝。春風作主人。鸞飄鳳泊同羈旅。於一花之榮落。傳國步之盛衰。中後跌宕淋漓。有對此茫茫百端交集之感。○天彭山名。陸游有「天彭牡丹記」五勝。猶金水。火土五德。言迭相勝也。

計

東字甫草。江南吳江人。順治丁酉舉人。○甫草負奇氣。過鄆下。見謝茂秦墓。圯壞。盡棗。中金爲修墓。過順德。知歸震川嘗佐郡。有廳記二篇。求遺址不得。乃入署旁廢園中。斝香再拜。至吳稱門生。於黃孝子向堅。人共賢之。詩不苟作。時露胸中抱負。

宣府中元夜卽事

邊月新秋夜。哀音四面齊。戰場多舊鬼。野祭有遺黎。柝亂愁人聽。風驚倦鳥棲。遙遙天漢上。河鼓漸垂西。

宣府逢立秋是歲閏七月。



秋氣吾所愛。邊城太早寒。披裘三伏慣。擁被五更殘。風自長城落。天連大漠寬。摩霄羨鷹隼。健翮爾飛搏。

鄴城弔謝茂秦山人

鄴中懷古正秋風。詞賦深慚謝氏工。生欲移家辭白雪。沒隨疑塚對青楓。諸王禮數何常絕。七子交期竟不終。自是貴游無遠識。布衣未必歎飄蓬。王季始推茂秦爲盟長。後稱眇山人而黜之。見交道之不古也。後半大爲布衣吐氣。予有論詩絕句云。眇日山人足性靈。詩盟寒後苦飄零。後來誰吊荒墳者。只有吳江計改亭。改亭。甯草別號也。

答雲間蔣馭閔

西陵原上憶經過。屈首從君學九歌。豈意邊書驚御宿。遂令複壁老山阿。破家張儉飄零久。賃保王成辛苦多。今夕相逢還道故。數聲鶴唳起庭柯。

田茂遇

字髯淵。江南華亭人。順治丁酉舉人。

貧交行

古人不貧才不老。今人貧乃傷懷抱。古人結交重青雲。今人棄置同秋草。今古人情何太殊。我來仗劍卽鄆道。鄆城中遊俠多。邂逅相逢意氣好。腰間脫劍且按歌。尊中有酒復傾倒。上堂拜母下搗嫂。與子纔裳復剝棗。君不見古來英雄不用爲備保。叩角行歌石皓皓。作者真氣抱奇。于此一詩見之。

孤兒行

孤兒啼聲何淒然。問汝啼何爲。長跪答言。父爲南海太守。居官清廉。不枉取一錢。鳴騶吹角。大吏巡邊。前導到部勢喧然。晨報謁不得前。夕報謁不得前。急從販繒者。貫縑百聯。獻之幕府。大不歡。曰。此邦舊有百斛珍珠船。大吏朝去境。夕拜牋。守此海邦。另擇名賢。烏白鷺黑。上下茫然。父羈南海不得旋。客死歸黃泉。兒負殘母。跋涉山川。乞食路間。望見大吏鳴騶吹角。仍巡邊。猗嗟。父骨歸何年。音節全從古樂府出。乞食路間。後復望見大吏巡邊。痛絕在此。絕亦在此。

會晚初名傳燈。字楚田。後更名晚。字庭開。江西寧都人。順治丁酉舉人。○有學集序。庭開詩。謂朝而紫寒。夕而朱邸。涼州之歌曲。與凝碧之管絃。繁聲入破。奔赴交作。令讀者回易而不能自主。

### 麻平寺逢友人自楚至

空山留一寺。下馬忽逢君。蜀道無長轂。征衣有棧雲。秋邊鳴細雨。谷口上斜曛。客自瀟湘至。猿聲似慣聞。

### 雞頭關

南山忽已盡。納納袞城春。漢水原通蜀。巴山不過秦。燒荒熊出壩。樹密虎窺人。銘德昆吾者。還應問釣綸。

### 同僧登赤嶼

看碑尋赤嶼。采菊到黃州。雁氣回秋渚。江聲撼酒樓。兵戈雙眼淚。吳楚一孤舟。蕭瑟匡山客。應隨慧遠遊。

章在茲之。字素文。江南吳縣人。順治丁酉副榜。○我吳操選政。莫盛於楊忠文公之同風。素文先生繼之。每一部成。其序文。文目老嫗僕人。匿而不出。坊間演劇。予金始付之。此吳中佳話也。事載

賈亡  
集中

將出金陵

昔日秦淮渡，高歌舊酒樓。今來江上月，獨對帝城秋。壯志銷投牒，微軀賤旅遊。干將鋒盡折，眞悔覓封侯。

都中雜興之一

入洛誠多事，遊梁亦已頻。半生歡結客，一刺肯依人。不遇鍾期聽，何慙原憲貧。倚閭終日望，只是負慈親。

漢武

調遣天兵過月支，葡萄新發上林枝。初聞使者巡三輔，又命將軍號貳師。越舊樓船通屬國，朔方烽火照征旗。羽林無數孤兒在，獨向高臺泣望思。

陳廷敬  
字子端，山西澤州人。順治戊戌進士，官至大學士。諡文貞，著有午亭文編。○澤州居館閣典  
中。

平滇雅三篇

岳湖逐寇也

岳湖洋洋。我武洸洸。謂南有藩。無敢據我疆。岳湖滔滔。我武囂囂。謂南有藩。無敢闕我郊。章一我疆大矣。我圍溢矣。芽蘗其間。棘合蝟。昔我南藩。化爲異類。章二帝如兩大。以覆以載。推食以食。解衣以衣。遷之善地。勿翦勿拔。音三拔。音四彼惟狂昏。狡焉生心。肆爲誅首。啓戎于南。如螭奮臂。如蚺決背。首仰臆張。如豕斯驚。章四惟帝咨嗟。惠威是崇。薄往禽之。孰佐予功。予矜下民。救此一方。取其殘凶。是類是造。馮于臨衝。章五楛矢敦音離弓。我弓我矢。靡旌靡壘。兵無遺鏃。耕無失耜。天塹茫茫。限此江水。旣斷其趾。且斬其類。章六盜負險阻。距趨躍跟。期飛飢獻。羽翹以張。侯在太白。占於天狼。我溼我隴。是震是驚。章七維彼閩粵。波蕩海垠。帝屢下顧。哀此墊昏。盜往連結。倚以父母。乃餌乃誘。乃爲盜守。章八帝援天矛。鑲羽截鱗。嶺海革面。蒙羞來臣。禽虺于威。柔肌于恩。盜失厥助。飛魄殞命。章九老雄野死。梟雛棲棲。巢湖飲海。傾搖於波。爾居艱脆。我步逶遲。大祖高驤。賊焉遁逃。章十洞庭湯湯。岳陽峩峩。載驅載馳。爰拔厥家。章十一惟人歸德。惟帝之謨。窮經窟宅。是翦是屠。我武輝耀。式廓鬼區。百蠻萬國。俛我來蘇。章十二○章八謂歌尙二逆。助吳逆反也。章九謂三桂既死。賊勢漸衰。而我師以神武臨之也。

湘東克衡也。衡盜倚爲巢克之武功將成也。

師渝于江。于湘之東。師如雷馮。震衡岳以攻。一夫爲逆。多方則病。播虐抗有德。我人斯奮。卒歸厥命。章一歸命伊何。衡人之災。衡盜所家。追奔逐北。犀甲雕戈。虎旂龍節。天威所加。章二帝臣如虎。帝師驅武。烈烈旂旌。淵淵金鼓。嶷嶷綬章。嘽嘽戎路。莫我敢拒。章三右刈武陵。左掃星沙。磨崖岫屺。我功孔嘉。戎馬晨服。候烽夕

遮剿絕惡本。敢遺萌芽。章四其特楓木。其恃辰龍。震之拔之。自西自東。陟嶺踰嶽。于山于川。遠招還歸。囚豪  
解顏。章五東西合師。進次于沅。孽童日盛。怙兇忍頑。左擣其虛。右攻其堅。載關載拔。會于中權。章六既克于沅。  
沅人嬰嬰。如日之昇。如霖遇晞。以肉其枯。以勅其羸。式歌且舞。以樂我師。章七南訖羅施。來迎壺漿。鳴鞀銅  
鼓。洗兵盤江。彼寇輿屍。晝匿宵奔。滇人荒茶。待我于門。章八凡此滇功。惟天子乃成。古者推轂。相外以行。今  
者決勝。一秉廟廷。孰是遺孽。而靡容明。章九師徒渾渾。漸集于滇。惟天威式監。官臣恪守。乃獲其醜。保大定  
功。流聲焉窮。十章○此專爲克沅言之。沅克而諸  
蠻歸化。遺孽退歸于滇。不敢復出矣。

滇池盜伏于滇師受聖策平之武功成也

滇池洶洶。帝乃平之。匪彼元戎。惟帝之功。高居北極。洞視下方。惟仁智勇。克靖萬邦。章一帝命臣塔。汝從西  
粵。急擣其窟。塔拜受命。銜枚束刃。環滇其來。龍駭鵬騫。軍聲轟然。如墜自天。章二帝命臣里。汝往巴蜀。橫翦  
側入。里拜受命。量沙追虜。有疾其驅。無暴我邦。踣柵趾壘。言壁其東。章三帝命臣泰。汝從黔趨。惟此孟賊。數  
載曠誅。汝將士用命。賊其敢遁。泰拜受命。于皇之訓。章四我旄我旗。于苗于蠻。度幕輕留。彌險蔽關。奪其阻  
隘。掀其籬藩。獸窮負嵎。我師固以完。章五帝命我師。勢爲犄角。麾城擗邑。萬里手握。維彼殷驪。敢抗喬嶽。維  
彼萌枿。敢傲霜雹。章六彼枿繁矣。于焉蟠根。雨露旣濡。忘帝力之勤。聖人神武。施設芟夷。斲彼梟鷲。張我能  
螭。章七倭鏜批亢。下甲陷堅。箕張翼舒。合圍于原。獸窮于阱。人或獸哀。快彼凶醜。覆卵毀胎。章八帝曰吁嗟。勞

我人師。日費百萬。大農不支。滇人望拯。如舖療飢。載礪載攻。天策攸宜。九章孟冬月杪。師薄于城。降旛夕豎。逆駭縱橫。林野塗腦。郵驛遞顛。滇人歌舞。于屋于衢。十章夜半捷來。天心惻楚。閔憐下民。罹此荼苦。我將我師。于野暴露。布惠醕功。急疾如火。十一章于廟于郊。其儀孔熾。華俎膺牲。永言昭事。都人士女。白叟黃童。歎呀嘻笑。祝我聖躬。十二章帝曰歸來。予開明堂。制禮興樂。登賢拔良。孩養無告。施厚仁滂。熙我庶績。綱舉目張。永萬斯年。率由不忘。十三章○此篇爲遺孽既平。武功告成而言。○平滇雅三篇。平吳逆作也。康熙十稟承廟謨。以次進討。十五年冬。吳三桂反。雲南明年。耿精忠反。福建既尙之信。反廣南相繼。應之時。諸將劉死雲南。平時三桂已前死矣。三篇爲吳逆言。而連及耿尙。詞氣典重。與柳子厚平淮夷雅相埒。未歸本天子好生。仁武不殺。猶柳雅意也。事詳平定三逆方略。

贈孝感相公

十有四年春。惟三月日吉。枚卜擇近臣。學士登密勿。搢紳賀於朝。處士慶於室。僉曰帝知人。吾等夙願畢。公無得志容。庭館轉蕭瑟。公誠王者佐。生平學稷契。致君慕堯舜。自此見施設。銅犀半夜開。沙隄帶月出。暮讀書百篇。朝入語移日。勞瘁咫尺地。欲使萬國活。時方事南征。戎馬久未歇。黎元尙瘡痍。原野恐駭屑。晴風卷旌旗。三農乍起垆。況我仁義師。忍此田間物。公爲民請命。聞者感心骨。數日政事堂。絲綸慰飢渴。中朝相司馬。姓字及走卒。身當晝凌煙。名其懸日月。昔時同學人。翹首望回斡。分瘞咫尺地以下見兵戎未停瘡痍滿野而以爲民

請命望之相臣。得古人贈言之體。

施愚山見寄長歌和答

闌珊夜雨雞鳴號。關山夢回心魂勞。我所懷思渺天末。涼風一起秋蕭條。美人昔贈相逢篇。吳綰三尺森瓊瑤。今晨曉窗坐展翫。我欲報之情鬱陶。憶昔相逢客京輦。城南華徑紛招要。酒酣惆悵秋燈紅。羨我鬢髮漆黑同。卽今倏忽別四載。頭上已有霜枯蓬。眼前諸子幾人在。浮雲溝水馳西東。萬事回頭淚沾臆。人生朝露誰能必。楚澤難招宋玉魂。緱山不返王喬鳥。自注。指荔。西樵。二子歌詞自絕塵。聲華爛漫今何益。男兒七尺良可哀。生存華屋終黃埃。儒術用世行已矣。浮名寂寞何爲哉。不如放意遊八極。掃除文字棲淵默。未斷塵情憶遠人。茫茫江水分南北。康熙初公與西樵漁洋荔裳愚山顛卷釋堂諸公時爲文酒之會。號到掃除文字。栖心淵默。所見又高一格矣。

東山亭子放歌

東山望南山。百里墮我前。山亭橫絕浮空翠。闌干縹緲臨無地。我來氣與霜天高。風塵歸後寒蕭騷。拂衣枕石每獨往。蛭蟻羣笑滄溟鱉。百事回頭如舊否。一片青山落吾手。倦客重尋岡上廬。童時舊種門前柳。盡掃西風萬古愁。且傾落日三杯酒。君不見謝公高臥東山時。起爲蒼生已白首。昔時絲竹轉淒涼。美人黃土今安有。百年我亦一東山。日夕樵歌動林藪。

分流水送人北歸

分流水流濺。行人到此寂無語。別淚滴作分流泉。我行南來幾千里。多情送遠北河水。北河相送去茫茫。南河相迎客路長。與君相別分流處。春草春花易斷腸。命意遺詞如出唐人手

渡江見焦山有作懷林吉人

江流近海迎朝暎。焦山蒼蒼當海門。憶君焦山古鼎篇。勢凌海日傾江源。金山樓觀特瑰麗。撞鐘伐鼓風濤喧。我行再過焦山下。海雲堂中空夢魂。茲山不到屢惆悵。懷慙竟踐蘇公言。惟我與君亦如此。知禰不薦昔人恥。只有思君日夜心。長江湛湛東流水。結另用意。而以不能薦賢爲恥。相思不斷如水東流。猶見相臣心事。

三月三日同楊松谷泛舟沁水

始得方舟穩。滄波轉路迷。濤聲春晝外。寺影夕陽西。楊柳橫橋暗。桃花夾岸齊。十年江海興。與爾手同攜。

晉國

晉國疆天下。秦關限域中。兵車千乘合。血氣萬方同。紫塞連天險。黃河劃地雄。虎狼休縱逸。父老願從戎。予少時尤滄澗宮贊。以午亭詩見示。讀晉國一篇。愛其近杜。後讀漁洋詩話。亦謂其獨宗少陵。前輩先得我心。不勝自喜。

關樓

壁壘高樓壯。旌旗古鎮尊。塞風春不斷。邊日晝長昏。悲角關樓動。孤城海氣翻。往來憑吊意。辭賦欲銷魂。

山關門百里宿沙河站



關南滄海浮天白。漠北連峯拔地青。一片山河圍郭塞。幾家烟火接邊庭。遼歌調苦風還斷。蘆酒愁多夜易醒。卻喜皇威臨絕域。鎮東門山海關東門曰鎮東不須扃。

邯鄲道上

炊熟黃梁已是遲。海門歸路幾人知。卻憐朝市紛紛客。怕說盧生夢醒時。盧生之夢。終有醒時。怕說殊無謂也。此等詩。可當禪家棒喝。

鄒祇謨字許士。江南武進人。順治戊戌進士。有遠志齋集。

中秋京邸

此夜中秋月。清光十萬家。吳歌聞隔院。邊調入征笳。北闕橫秋色。西山隱暮霞。故園叢桂樹。應發昔年花。

清河縣

客久歸程近。鄉心益不禁。春波高泗水。暝色下淮陰。漠漠寒林樹。蕭蕭柱渚禽。黃河流不到。禹德歎彌深。

高暉字玄中。山西襄陵人。順治戊戌進士。

目則山

削出目則山。蟲起阿剌部。舍馬從步入。路仄足跡聚。泥濕苔如鏡。石銳勢若拒。攀援斷藤行。數起而數仆。山腳霞未明。山腰日已午。曲徑從今日。草木自萬古。叢叢迴寒風。霏霏染翠羽。彷彿露崇岡。蠻營列山塢。廢竈留殘煙。道傍拾遺弩。冷然泉聲落。似猶雜金鼓。盤頂雲霧開。秀峯若可數。恍惚見吳山。慰此行路苦。

未敢舒鸞嘯，恐驚豺虎怒。極形山之險削而兵戎未平意，卽於眺望中見之。字字峭拔，不肯輕下。

寄答桑楚執見懷

短髮空餘老大悲，三年一讀故人詩。竹間殘局完公事，塞外新編是宦資。自笑子長牛馬走，誰憐杜甫風飢。何時煮石青峯下，共跨黃羊侶鹿皮。

李念茲字肥瞻，陝西涇陽人。順治戊戌進士。官景陵知縣。○有學集序。秦人詩，自李空同文太清。皆有車鄰駟騏之遺聲。肥瞻行安節和，一唱三歎。有藜藿白露美人一方旨意，非秦聲也。

登浮山

絕頂憑誰引，蒼藤乍可攀。偶然臨險地，不信在人間。古洞遙通棹，江光日浸天。東南百戰後，登眺淚潺湲。不信在人間，登高時實有此想。

螢

不自慚微照，秋宵款款飛。乘陰稍騰上，化腐暫光輝。月暗時依砌，風生亂點衣。時危妨誦讀，乾死舊書幃。

立春夜感懷

聞道花門信，甘州今尙圍。城分猶拒戰，兵久未成歸。刁斗連邊動，軍書入塞飛。客懷無一可，愁絕盼春輝。

雲

片片浮雲去，愁人正望鄉。東風吹送汝，幾日到咸陽。懷歸之作，自是唐音。

徐文烜

字又章江南青陽人順治戊戌進士

浙東別友人

歲晚催孤客。鄉心逐小舸。來隨江水遠。去繞越山高。寒日淡霜野。陰風亂夕濤。感君多意氣。不必贈絺袍。

張一鶴

字友鴻江南華亭人順治戊戌進士官瀋南司李

辰龍關

天地金湯險。由來王氣鍾。五丁開絕塞。二酉抱神龍。亂眼奇峯過。驚心暑瘴重。興亡千古在。立馬倚長松。

懷人

西南諸國滇爲大。六詔新開燹道平。應憶松江蓴菜好。卻將老眼看昆明。

卷五

李天馥

字湘北江南合肥籍河南永城人順治戊戌進士官至大學士謚文定著有容齋集

明景帝廢陵

張段走靈帝。程魚奔代宗。喪亂有其漸。式微丁數窮。總無全盛時。一旦嬰愍凶。異哉王閹奴。挾帝出居庸。土木試一擲。舉國紛相從。親征竟蒙塵。身殉觀軍容。爾時微邸王。誰爲奠寰中。八載修戰守。廟社安鐘鏞。

虜心絕要求，塞外歸重瞳。嗟嗟奪門徒，甘心爲首戎。復辟亦天意，羣小冒奇功。忠良旣誅鋤，謚戾良非公。窳窳荒山麓，大禮斬樹封。悠悠二百年，壞道餘喬松。皇仁念前朝，慨焉愴宸衷。置守禁樵採，魄毅安幽宮。傍陵三十戶，戶戶野花紅。隧道寒潭靜，繚垣芳草空。獨恨魏璫墳，東西峙龍嵒。議論正大，足破奪門之姦。末有憾於魏璫之墳地，相

近也。後祁門張御史疏請削平天下共快之。

### 俠客

年少悲歌客，秋原落日情。快逢燕大俠，羞學魯諸生。問世都難合，論交每不平。懷中三尺鐵，風雨夕常鳴。

### 樓桑村懷古

衰草寒煙望裏孤，樓桑遺跡未全蕪。帝鄉恥屬黃初歷，王氣猶延赤伏符。國士風流曾據蜀，宗臣魚水失吞吳。啼鴉舊恨蠶叢遠，此地惟聞叫野烏。

### 美人曲

花氣惹陽春，晴窗晃鏡塵。畫眉啼徹曙，愁殺畫眉人。崔國輔小詩

孫一致

字惟一，江南鹽城人。順治戊戌，賜進士第。二人官至侍讀學士，著有世明堂詩集。

### 贈唐陶菴先生

蚤投簪紱遂幽襟，偃臥蓬蒿足醉吟。衣履尙存耆舊色，鬚眉眞見老成心。天涯故國憂方切，自注：時吳寇未寧。夢

裏華胥感自深。聞道欲歸仍遠適。雲山何路許追尋。

錢中諧字宮聲。江南吳縣人。順治戊戌進士。康熙中。諧已未召試博學鴻詞。官翰林院編修。

讀武帝內傳

漢武求仙日危樓。四望開漫傳青鳥至。空候白雲來。玉露虛芝館。金風冷桂臺。茂陵終寂寞。誰與望蓬萊。

白鴈

白鴈初臨楚澤來。孤飛正值葦花開。影迷積雪望難極。聲入曉霜清更哀。閑共雲烟相掩映。偶逢鷗鷺不驚猜。卻疑玉塞辛勤久。歷盡風霜毛羽摧。四語不刻。畫而自佳。

許虬字竹隱。江南長洲人。順治戊戌進士。官紹興知府。著有萬山樓集。

折楊柳歌

柳條三尺長。明日清明節。江南小兒女。采作流蘇結。千樹宮牆柳。萬朵道旁花。折柳在儂手。花飛到誰家。

居遼四十年。生兒十歲許。偶聽故鄉音。問爺此何語。竟。是齊梁間北國歌辭。

河西關

去國何曾隔絳霄。幽燕襟帶古迢遙。尾箕斜綰星千里。恆衛中分水二條。鐵笛漫驚龍塞月。玉釵春怨鳳

城簫還將清嘯憑。對南北音書任寂寥。

登黃鶴樓

黃鶴仙人不少留。洲名鸚鵡更堪愁。三湘登眺還吾輩。千古江山獨此樓。漢口夕陽銜遠岫。武昌寒郭浸春流。燒痕滿地閒生感。回首烽烟野戍秋。如此襟抱如此手筆。何不可作黃鶴樓詩。

攜壺憑檻塞雲橫。懷古荆門鎮重兵。春柳久荒陶侃壘。寒潮直上呂蒙營。滄桑盡付邯鄲枕。煙月全銷玉笛聲。唯有芳洲春草色。年年還傍大江生。

將發荊州招李劬庵秦對巖話別次劬庵韻

荆蠻忽聚四方豪。睥睨城西幕府高。蹴踘攜蒲方合陣。竹頭木屑有分曹。清商莫奏湘君曲。濁酒堪酬屈子騷。南北往還誠萬里。百年物役一何勞。

和答錢宮聲見懷

吳閩惜別雁書稀。春樹春江雨色微。遊子誰憐親漸老。無家止有國堪依。青萍嘯夜中原在。白日流空兩鬢非。還憶長安同躍馬。極邊憔悴攬征衣。

王又旦字幼華。陝西郿陽人。順治戊戌進士。官給事中。有黃涇集。○王漁洋謂幼華詩每變而益上。足以傳世行遠。又謂遊太華羅浮詩尤爲警策。惜未得全集。於選本中采取故所收止此。

蒼龍嶺

削壁突斷絕。微逕始躋攀。長虹馳遠影。飛落青冥間。迅颺兩崖起。獵獵雲氣還。連峯若動搖。我行亦孔艱。天色撲蓮花。瑤草何瀟瀾。陟危千萬慮。曠望忽開顏。璇宮應不遠。從此排天關。連山雲合而風鼓動之真。有動搖之勢。子遊黃山觀雲海親見之作。者先已寫出。

自千尺嶂緣猢猻愁行

清晨杖輕策。入谷二十里。傾崖驟合杳。梯棧空中倚。無翼如何度。艱難方此始。萬狀石磴磴。紛垂縞纒纒。攀縞踏危石。足頓不能起。巖屋照頽陽。曾岑倒松梓。養力憩烟靄。乃知崎嶇美。東南得高壁。路隘不任趾。亂峽無全天。坤軸忽崩圯。猿狖怯方啼。吾生悵何恃。太息展遠眺。前途尙嶮巖。亂峽無全天。字如出杜陵手。

夜坐仰天池

窮日凌岷嶧。我行亦云疲。散髮臥絕頂。疎星下清池。峻絕五千仞。晻翳何可窺。白雲上下飛。深松羅四垂。欣無職事縲。得與山靈期。延佇不知反。風林露華滋。高視但青蒼。一氣回坤維。鸞鶴如可馭。終焉謝磷淄。

古鼎篇

白注鼎中一馬一鼠引呂氏春秋爲證據知周鼎也。

夜坐金景流房櫺。一南一北雲逢逢。誰爲此者驚愚蒙。戴氏之鼎來河東。子水母土木火功。古色不辨賈與崇。翡翠青間玫瑰紅。饜饕怒張雜夔龍。蜿蜒之勢何其工。中有一馬方雙瞳。其下隱約憑社蟲。或云乾與良相從。不然子午識夏冬。紛紜衆說胡能同。魯真齊贗空懵懵。何人博雅爲譚宗。考圖論世自鎬豐。憶

昔神廟稱時雍。斯器原出蓬萊宮。天球河圖與大鏞。雖敦紀甌爭春容。金耶張耶椒房雄。乞而有之作清  
供。大梁左右興兵戎。豪門散盡隨霜蓬。零落不復求亡弓。嗚呼治亂何匆匆。使我感歎填心胸。大烹杏矣  
難繼蹤。此物合依蒲葦叢。主人有闍名丹楓。闍之前後花纖茸。兩耳三距位當中。玩視聊寄疎且慵。王生  
作歌紀始終。慙無長管搖白虹。焦山古鼎爲嚴分宜取去。嚴敗仍歸焦山。此從亂離  
後失而復得所感尤大也。前半刻畫亦見造句之奇。

曉渡望鄂州

曉霧壓城頭。蒼茫古鄂州。風烟盤赤壁。波浪下黃牛。星動連江鎖。旌高隔岸樓。由來征戰地。不忍問東流。  
三四  
神勇。

贈梁峒樵水部

幾載常含畫省香。知君例作水曹郎。久辭請謁草侵戶。近著河渠書滿牀。舊業六盤秦北地。臣軀九尺漢  
東方。那堪塞上烽烟暗。升斗朝朝問太倉。

送家叔季鴻先生游雁上謁后土祠

綠楊連岸曉風斜。東渡汾陰泛客查。天際兩崖馳竹箭。春流三月湧桃花。黃雲寶鼎淪衰草。絳氣靈壇落  
暮鴉。舊事於今無可問。市樓沽酒是生涯。

故陳忠愍公挽詩

福



陰風獵獵陣雲低。雪滿靈州動鼓鞮。絕寒名應傳屬國。前軍星已落安西。五原未復精靈在。百口無歸道路迷。蕭颯惟聞哀痛詔。城門月出夜烏啼。

太史祠隔河望孤山

絕巘連雲出。秋風隔水多。韓原中缺處。山翠壓黃河。

嚴允肇

字修人。浙江歸安人。順治戊戌進士。官壽光知縣。著有石樵詩稿。○石樵以同官累去官。後與同官遇益厚禮之。人服其長者。詩古今體兼善。龔芝麓尙書謂其春容大雅。近代作者亦不多見。蓋不妄許云。

古風

世路真險巖。泰山起方寸。要盟矢天日。咄嗟不相信。耳餘勿頸交。禍機起奪印。武安傾魏其。杯酒遂成釁。匪眦按劍怒。磨牙雪餘恨。兩虎不相下。報施理亦近。爲國忘私讐。千秋思廉藺。交道之險巖。爲己私也。能如廉藺之爲國。則公而忘私矣。主意全在一結。

送宋荔裳按察四川

驄馬出薊門。駕言赴岷峨。前驅負弩矢。乘傳相經過。劍門天下險。錦江翻白波。近代厄銅馬。西川血成河。至今勞生聚。人少豺虎多。大夫秉邦憲。兢兢志靡他。外臺持風紀。霜雪變陽和。文翁寬匪弛。武侯嚴不苛。蜀道易平地。巴渝起新歌。琴臺與卜肆。古蹟猶未磨。追從訪揚馬。道遠將如何。極亂後宜以寬嚴相濟處。之文翁武侯其前事也。贈

言之體  
如是

洗象行

長安六月車塵颺。都人傾城觀洗象。黃門鼓吹前導行。玉河響閘流奔放。怒蹄蹴踏蒼山頽。豈曉臃腫難  
爲狀。蠻童赤身跨象背。游戲波濤覺神王。須臾牽挽出水濱。長鼻一噴飛雪浪。吾聞此乃瑤光精。西域南  
荒配利兵。雄姿幾耐身毒戰。猛力可代蒼梧耕。遠人來朝貢天闕。含元仗下隨簪笏。豆芻飽食三品料。劍  
珮班陳百官列。黃鬚健兒不敢騎。拱立閭闔生威儀。莫言材大難爲用。馴擾聽受諳職司。開元天子奏衆  
伎。金羈錦纏舞玉墀。他日重逢祿山宴。努目不拜竟死之。近聞蝮賊陷京室。象房躑躅鳴聲悲。渠雖雄長  
亦獸類。君臣大義猶能知。嗚呼。君臣大義偏能知。前半形容洗象人皆能之。後以獸類亦知君臣大義。見臣道之不可頃刻不明也。讀末二語爲之凜然。

述哀

母之生我日在角。絡緯鳴機夜深作。歌成黃鶴不忍聞。大狐啼飢小孤弱。亂離伏莽乞餘命。十口流離竄  
叢薄。朝呻夜吟不暫休。骨肉幸免填溝壑。長養衆雛畢婚嫁。慈幃未省舍飴樂。當時奉檄心獨喜。今我窮  
悴至於此。俯仰無因供菽水。衾影之間媿人子。去官無祿不能供母氏菽水。猶爲抱慙。況有祿而無母可供者乎。此種詩不忍作亦不忍讀。

觀繩妓作

長繩罽竿高百尺。楊花雪落城南陌。美人冉冉化行雲。細縠輕紈望空擲。冶袖雙開舒錦臂。婆娑往來若

平地盤中小試飛燕舞。樓上驚看綠珠墮。迴眸顧盼無限情。空裏忽聞環珮聲。天風吹入碧雲去。始覺仙骨珊珊輕。輕軀上下無斷續。舞罷腰肢新結束。燕釵墮地悄無聲。背立當窗鬢雲綠。抱得秦箏寫春怨。歌唇宛轉吳趨曲。吳歌楚舞絕可憐。誰家笑擲珊瑚鞭。唐人此題以「身輕一絲中」五字盡之。妙于用簡。此又妙于用繁。

白下

白下援師聚。鍾山薄伐新。三軍隨庾亮。一戰走盧循。虎旅屯江岸。鯨波靖海垠。論功諸將在。哀此亂離人。

諸將雜感

建國行師自古今。千秋理亂事相尋。雲龍勢合攙搶掃。汗馬功成帶礪深。不信蒯通能相背。可無孫武善攻心。山頭廷尉空凝望。星拂招搖白日陰。

仙霞烽火照龍山。玉甌金庭棄草間。慷慨孤臣提漢節。指揮諸將出雄關。蒙茸壘嶂潛師度。鼓角巖城振旅還。勞苦西平功第一。江東坐鎮羽書閑。三語范忠貞之不風。四語李文襄之命將。

天彭井絡望中遙。劍閣重關似建標。白帝城空王氣盡。金牛峽險霸圖銷。漢廷卻悔封雍齒。巴郡終須殄隗囂。邛棘西南重置吏。不煩檄使下星軺。

款塞諸戎擁節旄。大開屯種刈蓬蒿。戴牛佩犢經營苦。畫井分疆部署勞。豈爲流移增國稅。卽看荒穢長田毛。戈船下瀨今無事。壯士休論戰伐高。大概爲逆藩時事。言宜屯田守禦。永固疆圉也。風格從杜詩中出。

顧

字泰瞻，江南無錫人。嘉定籍。順治戊戌進士，官贛州府丞。

奉委進江背洞駐軍赤坎招安賊三萬有奇

匹馬臨江背，前旌近賊營。由來皆赤子，何忍作長平。地險歸畊少，民頑入法輕。撫綏誠不易，先軌是陽明。  
乘心如此體天地好生之心者也。彼白起、阮長平卒至七十萬人，項羽、阮新安卒至二十餘萬人。李廣殺羌亦八百餘人，三人不全首領，天道然也。陽明破賊勦而兼撫，故引以為先軌云。

徐元文

字公肅，江南崑山人。順治己亥，賜進士第一人，官至大學士。

登男崗峯

高峯直上勢崔嵬，閩越雄州一柱開。路轉千盤隨石筧，崖臨百丈聳丹臺。鳥飛天外山如鏡，人到雲中海似杯。便欲凌虛生羽翼，翛然綽馬閩風來。

春日閱武召百官詣南苑

逶迤上苑帝城東，御輦巡臨振武功。甲鎖鍊金寒白石，旗翻翠羽動春風。龍驤萬騎軍麾轉，鶴立千官拜舞同。莫以清時忘戰伐，至尊親為挽雕弓。  
本朝王業基於武功，一結得安不忘危之旨。

葉方藹

字子言，江南崑山人。順治己亥，賜進士第。三人官至禮部侍郎，加本部尙書，謚文敏。

關隴平

關嶺茫茫隴流湯湯，紆逶迤，崢嶸嶮巖。面蜀肘涼，輔車相將。狡馬啟疆，震驚我方。  
一關嶺兀兀隴流

潘潘彼涇啓戎。乃蠢茲蝨賊。爲虺爲蜴。爲螟爲騰。叩首張臆。助逆抗有德。如蝟之集。如豨之突。二章涇原既清。羣賊大震。睢睢肝肝。延旦夕之命。帝命臣海。爲隴民徒災。帝命臣勇。師出自西陲。三章帝詔臣海。汝速涉坂。出彼朝那。爲勇軍援。掎之角之。杳之蹙之。除民之慝。俾婦子恬適。尙嘉乃績。四章海涉河涇。言騰灞澹。秦山聳突。嶽崎隴坂。踰邠越涼。飛旛揚旆。扶輿猗靡。雲罕綵縹。雍部阻長。敢憚痛瘡。式遏寇虐。以寧爾室家。五章勇自河西。銜枚疾指。來從酒泉。轉戰天水。矯矯虎臣。一乃心力。摧堅挫鋒。盪彼蝨賊。兵車百萬。洵洵雷震。橫會方州。爲行爲陳。六章東西合圍。賊在釜底。七章其智斯竭。其魄斯奪。勇率其麾。崖誅谷討。曰臣思克。曰臣進寶。赴赴奮武。爲王干城。勇實帥之。桓桓于征。七章于征何所。于鞏于臨。道阻且長。蔽虧岑峯。深入其阻。禽獮草薶。申用三驅。根株斷刈。餘賊竄蜀。游魂猶悻。西夏以綏。賀蘭其父。八章脅從蚩蚩。亦孔之哀。寬其誅鋤。予以惠來。維海維勇。剛克柔克。勇也帥師。爲闢爲拔。海也救民。爲揉爲活。北地上郡。稽顙歸命。如旱望霓。海實綏之。九章義威戢武。奠我西陲。剖蜩斲蝟。人畏以懷。秦民嘘呵。化爲謳吟。殄熄暴悖。克廣德心。經戰伐區。蠲除租賦。問孤弔死。起迺沉痾。廓我皇恩。義聲先路。十章帝德振振。隴山旣平。隴流旣清。維天子之禎。隴山旣伏。次黔粵滇蜀。敢不嚶伏。如翰如飛。萬里來威。十一章維臣之力。維師之武。繫縛巨憝。爭荆膾肺。塞神人之怒。黔首喁喁。式歌且舞。億萬斯年。篤我皇景祐。十二章○紀平王輔臣之亂也。輔臣本名馬鶴子。三藩之變。輔臣叛。據平涼。秦隴震驚。特命大將軍圖海討之。時靖逆侯張勇奮威將軍王進寶提督孫思克會討。累戰皆捷。惟平涼一城腹背受敵。因請降。檻送入京。死於道。關隴乃平。

海氛清

巨浸稽天滔滔如何。天吳蝸像倚以爲家。有鯨有鰐。有蛟有鼉。摧幢決帆。血人于牙。中國有聖人。爾獨揚其波。一章。蓋茲鼉也。亦雜此處。曰子勝國後。誕敢繼其緒。藉瑕蹈躒。伺窺肘腋。結連蜂螫。載逞兇慝。離間我臣僕。盜據我疆場。二章。于興于泉。于汀于漳。乃揚沸湯。乃噉蝸蟪。我有城郭。倏爲沮洳。我有民人。倏爲鱗鱗。忍死須臾。後來其蘇。三章。恭承帝命。建大將軍旗鼓。我冠帶之國。忍鱗介是伍。據我上游。張我翼孳。與子偕作。與子同仇。悉率左右。殲此羣醜。四章。暨暨藩臣。一心一德。討賊自贖。不叩已恤。塹山堙谷。馬騰舟駛。親董其旅。以臨濛汜。陛下曲赦。臣敢不效死。五章。將士和睦。有冕在藻。既獲賊師。如飢斯飽。或拔其角。或脫其距。或斧其吭。或截其脣。賊窮見窘。無地自處。六章。彼強者跳。我攘我逐。彼黠者窮。我殄我戮。神甚之毒。鬼速其覆。如探鷂鳥。如振槁木。非我黷武。取彼殘已足。七章。前徒既奔。兇渠束手。計無復之。狼奔鼠走。茫茫烟島。爲逋逃藪。仁無必取。義不盡殺。屏諸窮髮。無汚我王鉞。八章。四州士女。來迎王旅。君子維何。玄黃在筐。小人維何。塗殮在宮。復爲王人。以耕以仕。九章。帝德溥將。涵負吐納。百谷來王。天與地杳。何人不綏。何物不懷。何戾不蠲。何善不嘉。皇仁熙熙。云何不來。十章。皇帝在位。受天之籙。東西朔南。無思不服。其有不順。自嬰顯戮。獻馘于泮。獻俘于廟。武功既昭。文德用紹。史臣奏雅。來哲是詔。十一章。○紀平海芝龍子成功。結連殘寇。爲東南患。王師討之。黨逆者歸順。成功死于荒於酒色。勢窮遠邁。後歸誠海氛。乃清。○澤州平瀆三篇。似柳雅。此二篇。似韓碑。各有得力。

弔鐵崖墓

先生不可見，遺塚自斜暉。無復攜紅袖，還聞葬白衣。才銷明主忌，老幸故人依。鐵笛吹雲起，猶疑踏月歸。  
明太祖召鐵崖至旋放歸有白衣宣至白衣還旬用來恰好

撰西樵考功誌文畢寄阮亭戶部

恍惚相隨把袂時，幽明難問兩心期。敢云下筆不加點，差喜臨文無愧辭。比似東芻應恨薄，即同挂劍已嫌遲。  
白注：予請阮亭請遜歲始報。 友生投契猶如此，況爾連根荆樹枝。  
三語用彌衡語意四語用蔡邕語意

授職翰林學士感恩述懷

麻衣席帽滿塵埃，親荷先皇覺沐來。敢道齊賢留異日，屢稱蘇軾是奇材。  
自注：戊戌充貢士入都先皇帝試拔第一八月舉南宮九月臚傳日親諭朕知汝久特拔汝為一甲進士又數對臣下稱道文學。 身離牛口驚還在，夢挽龍髯恨不迴。今遇吾君重拂拭，

孤桐果否爨餘材。  
如此屬對脫口而出無引用典實之痕

彭孫通  
字駿孫浙江海鹽人順治己亥進士康熙己未召試博學鴻詞第一官至吏部侍郎○美門詞和氣平在唐人中最近大歷十子在十子中最近文房

雨中過白芒村寄高山人儼

春雲生驟寒，溪上無人迹。石笳清相羅，煙翠紛可摘。欲持三尺絹，寫此春山碧。卻憶山中人，遠在龍池宅。惆悵不同遊，白芒風雨夕。

魚梁灘下泊

暝色起何處。忽然雲水昏。春燒如新月。遠挂山一痕。寒禽呼木杪。暗蟲沸草根。遙見冥際火。知有林外邨。  
孤舟欲棲泊。石溜濃雲奔。羈旅一無托。菀結難自論。矯首眺天末。躑躅勞心魂。寫晚景入神。

彭蠡夜泛

清淺宮亭水。濺濺百道流。殘春風送客。終夜月隨舟。野火沈葭葦。遙天挂斗牛。相依有鷗鷺。任意宿汀洲。  
四語在人人意中。而脫口新鮮。渾然無迹。

登湖口縣城

一望烟波萬頃明。女垣高與石根平。湖光盡日依樓堞。山色終朝滿縣城。寒嶺無人孤鳥下。秋林欲雨數蟬鳴。何當便作移家計。終臥滄洲寄此生。領聯語。身親其境。者知其寫照之工。

秋日登滕王閣

客路逢秋思易傷。江天煙景正蒼涼。依然極浦生秋水。終古寒潮送夕陽。高士幾回亭草綠。梅仙一去嶺雲荒。臨風不見南來雁。書札何由達豫章。

金陵懷古

杜宇啼殘百感生。西風建業舊神京。詩成狎客遺簪會。酒泛諸郎按曲聲。江外羽書空絡繹。禁中刀勅正



縱橫大官別有長生藥。不假天台刺史行。二章皆言南渡時事。遺贊按曲祕戲除官。而置兵防於不問事勢至此不亡何待。

萬里山陵萬古愁。南司北部總悠悠。屠沽自立宮中市。竈養爭除關內侯。肯向人間求故劍。誰從闕下問全鳩。姑谿幕府空貔虎。一夕龍車不可留。童妃王之明事。迄無定論。詩人歌咏者俱以爲真。

豫章城下送春有懷故園兄弟

城下煙波暮可哀。扁舟日夕更漂迴。一春又向他鄉盡。千里曾無尺素來。野鶩孤飛煙裏沒。江帆相背雨中開。故園風景今何似。池草春花夢幾回。

黃與堅字庭表。江南太倉人。順治己亥進士。康熙己未召試博學鴻詞。官詹事府贊善。有忍庵詩集。錢牧齋序忍庵詩謂長安金陵雜感諸篇頓挫鉤鎖纏綿惻愴在韓致堯元裕之間。

辰龍關

鬱盤鳥道中。忽視巉巖削。雙聳若天門。神工斧斤鑿。攢刺劍戟橫。摩厲成鋒鏑。青冥杳無垠。怪雨從空落。一徑折霄光。絕壁盡倒卻。千仞登孤危。不敢棲猿猱。攀躋坂益歇。數武困行腳。嗟彼銅馬餘。持鍛倚木闌。狼窺險一隅。俄就官軍縛。於今走輕車。亭午氣頽索。白日景蔽虧。一步一掙惡。瞬息度層關。鬚鬢恐非昨。

聞砧

萬井西風下。城高一葉飛。可憐今夜月。重搗去年衣。聽亂情交切。聲疎力漸稀。異鄉刀尺冷。多少客思歸。

悲憤之作。遠客人幾不能識。

金陵雜感

勅選良家降墨封。玉車輕轡進昭容。花開並蒂鴛鴦煖。酒醉同心琥珀濃。蕭寺鼓聲驚翡翠。蔣山風雪葬芙蓉。飄零故劍秋江上。回首長干冷暮鐘。言勅選良家而置故妃於僂辱也。叔寶無心肝不至於此。龍虎鍾山百戰雄。朔風吹浪下艤幢。彫戈壓陣黃沙斷。鐵鎖沈江赤燒空。鵝鵲觀消春雪裏。鳳凰臺冷暮雲中。由來帝業終荒草。銅狄何曾戀漢宮。言神兵北下而長江無備以至亡國也。

沂州客店遇同鄉友人

江郭蕭條尙苦兵。訝君北走得班荆。地懸淮海艱消息。人歷冰霜倍老成。同話寂寥皆逆旅。兩經離亂卽餘生。故園風物那堪問。但說梅花已繫情。人歷冰霜倍老成卽杜老艱危氣益增意少年柔脆人應知之。

田

雯字綸霞山東德州人順治己亥進士官至戶部侍郎著有山疆詩選○山疆詩才力既高取材復富欲兼唐宋而擅之山左詩家中另開一徑然緣此不無少雜茲擇其極純粹者采之山疆有知恐亦以後生爲不妄也

病愈早起成詩

雨過庭翠滋。一鳥發清籟。披衣趁朝曦。新晴滌埃壒。西軒青嶂疊。縱目收霏靄。曉廊取次行。心神頗融快。住客時過從。絺袍迎戶外。憑几理素琴。焚香誦梵貝。起二語寫病起入神

晚投臥佛寺宿

峯銜新月黃。雲擁山容變。深谷一鐘響。蔽虧烟樹斷。樵人語前浦。古寺隔幽澗。翠滴衣衫重。松黑黐鼯竄。疎燈出深竹。依微露紺殿。井欄摘茂葵。僧廚供茗饌。偶來訪支遁。吟棲有餘戀。夜半大壑鳴。風雨四山亂。

翠微寺

詰曲歷石齒。沿溪樹溟濛。招提門何向。陂陀無人蹤。峭崖立萬仞。惆悵林路窮。豈知披榛莽。紆迴流水通。一僧出汲水。竹屐行相從。長繩下深澗。割豁驚潭龍。淅淅石湫雨。泠泠葛花風。前循略約去。木杪聞清鐘。

山脚晚行

水樹色相映。淨綠生衣裳。日薄無倒影。石髮有冷光。前入翠微寺。已過黃花場。貪行夕忘返。織月吐東岡。古髻喬松下。暑暑如北邙。林昏叫寒鷓。風颺響枯桑。俛仰今昔人。千載心徬徨。作者五古。每以才勝人。此四章錄其清微幽遠。有遺音者。

縵車辭

朝飼蠶。暮飼蠶。桑樹葉大蠶眠三。初長如蟻。今成蠶。乙乙上簇黃白滿。縵車啞軋風中轉。女十五。當戶織。桃夭期。聞消息。簾幙半垂。雙燕飛。打疊新縑作嫁衣。

登采石磯太白樓觀蕭尺木畫壁歌

太白樓上秋風寒。采石磯下波連山。長康不作僧繇死。何人攫弄秋毫端。力挽萬牛嘯兩虎。袒衣跋扈青

冥間四壁四山拔地起。直從十指生煙鬢。峨眉匡廬兩對峙。西華東岱同躋攀。巨靈夸娥日月走。坤位乾寶神鬼盤。屋角雷雨勢飛動。牆根澗壑聲潺湲。牛渚白沙如蟻蛭。天光破碎滄溟寬。藍陳蕭惲稱大手。前追董巨凌荆關。尺木老人更奇絕。身駕大海騎虬鸞。秋來放眼忘遠涉。憑陵萬里開心顏。寺徑濛濛松杉雨。蘆花漠漠龍鼉灘。顧盼無人相娛賞。高呼太白騎鯨還。可匹漁洋作一結。迴顯倍覺有力。

碧峽書院歌弔楊升菴先生

塚風雷露哀牢羶。山川瘴癘難禁當。新都公子老戍客。孤臣萬里堪悲傷。當時世廟議大禮。撼門痛哭千夫強。仗節抗疏言矯矯。干觸螿尾投蠻荒。程朱正論臣所執。今昔濮議誰斟量。大禮未定大獄起。批鱗折檻空激昂。逢君首事有聰蓍。議論附會來豐坊。明堂秋饗復聚訟。分宜餘毒爭拍張。嗚呼先生遂不返。箬舟峒獠羣相將。木弩含沙火雲熱。天教老噉紅檳榔。吳粉傅面兩丫髻。簪花擁伎何徜徉。都盧倒吹潑醉墨。熨兒觀者如堵牆。羈魂漂流夜郎地。何異屈子沈沅湘。海莊故墟碧雞籠。猩猩白晝啼書倉。巾杖逍遙鬢眉古。圖畫遺像生光芒。竹槍一徑夾流水。菊乾楓落寒雲黃。潮州儋耳同一轍。祠廟最屬摩青蒼。小子夙昔慕高節。況值奉命來黔陽。竊願升階更翦紙。招魂歸送蠶鼻鄉。高吟死去誰憐句。令我涕泗徒滂滂。

張桂議禮始猶近情後則漸流險惡矣。篇中寫諸姦之附。和升庵之轆軻。跌宕淋漓。神道氣王。應推稿中壓卷之作。

泊舟吳門寄汪茗文

渺渺太湖水，遙遙光福山。梅花一萬樹，窈窕非人間。思與堯峯叟，扁舟數往還。煙巒七十二，坐嘯聽潺湲。  
律體可作古風讀。

董俞 字普水，江南華亭人。順治庚子舉人。有浮湘度嶺諸稿。

落花篇

東風綠徧芳洲草，春晝落花啼鵲早。片片朝縈上苑煙，麴麴夕覆長安道。長安美人惜落花，落花飛去墮誰家。曉看青鏡愁紅粉，暮掩珠樓泣絳紗。珠樓紅粉須臾變，帝里繁華君不見。一夜飄飄長信階，數枝零落昭陽殿。長信昭陽月影低，邊笳橫笛紫煙迷。渭城倡婦承歌扇，粉社遊人拂馬蹄。願為舞蝶棲芳墅，願作流鶯隱翠隄。金隄玉豎幾千里，黯黯餘香沉綠水。玳瑁筵前雪亂飛，珍珠簾外風先起。舞雪迴風可奈何，春閨少女歎蹉跎。此時攀條垂玉筍，此時掩袂蹙雙蛾。別有征夫淚霑臆，鴈沙龍塞無消息。金谷園中不見人，玉門關外長相憶。落花落花誠可憐，尊前一曲箜篌絃。花茵醉臥不歸去，明日重來應泫然。  
唐初體全於纏聯旋轉處取神，卷中偶一存之。

曹貞吉 字升六，山東安邱人。順治庚子舉人。官禮部員外郎。著有珂雪集。○商邱宋公極推作者。游黃山詩謂此山名作寥寥，向推虞山今被實菴壓倒矣。惜未能多見，祇存文殊院一篇。

文殊院觀鋪海歌

蓬萊關外海作山，文殊院外山爲海。神物由來不易逢，天爲吾徒澆塊磊。白雲一片湧空濛，眼底千峯皆

杏靄只疑天。一生水開窮荒。江漢朝宗。此間匯鼈。身一抹映天黑。鯨波萬里連渤澥。天都直可作員嶠。蓮蕊蓮花餘蓓蕾。須臾長風吹散碧琉璃。液溼茫茫竟何在。仙人游戲太神奇。我欲直上高空間。眞宰得此起結

乃見作手

### 花朝得家弟過江消息

使者乘秋泛畫橈。重來不覺斗回杓。花明故國初啼鳥。人渡空江欲暮潮。萬里山川供筆札。一天風雨過金焦。孤帆搖曳垂楊裏。知在蕪城第幾橋。

### 登望海樓

杯勺滄溟望裏收。百年觴詠幾登樓。尊前忽覺來三島。此外猶聞更九州。斷岸雨晴天倒影。海門風急氣成秋。搖搖坤軸渾難定。曾否金鼈背尚浮。

崔

華字不雕。江南太倉人。順治庚子舉人。○漁洋詩話。摘其名句云。溪水綠於前渡。日桃花紅似去年。時又有丹楓江冷人初去。黃葉聲多酒不辭。人目爲崔黃葉。

### 擬宋如意和歌

羽聲既凜冽。陰飈吹大荒。驅車過金臺。目已無咸陽。余亦從此逝。無人燕市傍。目中人

### 澗墅舟中別相送諸子

溶溶月色漾河湄。曉起頻將玉笛吹。同上郵亭忘別緒。獨行驛岸解相思。白蘋江冷人初去。黃葉聲多酒

不辭。此路三千今日始。薊門回首雪霜時。原本丹楓江冷人初去。丹楓黃葉不無合掌。擬易白蘋。崔黃葉以爲可否。

趙

灑字山子。江南吳江人。順治庚子舉人。著有雅言堂詩。

喜弘人聞夏南還并憶漢槎

綺里由來有二難。無端相對作南冠。輪臺詔下龍髯迴。華表歸來鶴語寒。月夜一尊歌棣萼。春風雙騎渡桑乾。何年恩到窮荒外。還向藜牀問幼安。

卷六

馬世俊

字章民。江南溧陽人。順治辛丑。賜進士第一人。官翰林院侍讀。○狀元對策。隨題敷衍者多。先生獨侃侃直陳。不負所學。制義皆有根抵。何義門學士云。我朝狀元。前劉後韓。公居其間。鼎足爲三。非妄許也。詩品亦清正不凡。

吳季子挂劍處

公子歸吳去。故人知此心。死生同白日。然諾豈黃金。一劍竟何往。高臺自古今。君看碑上字。苔蘚不能侵。不須名句。風骨自高。

古意

紫塞三千里。征夫去不還。簾前新月上。似爲寄刀鐮。

陸賈

莫問尉佗裝，千金豈在眼。請看馬上公，何曾事生產。

張玉書

字素存，江南丹徒人。順治辛丑進士，官至大學士。謚文貞。○文貞古今文俱以風度勝，詩品亦然。令讀者如飲醇醪，自然心醉。

謁項王廟宿遷縣

項王祠枕長河水，拔山氣沸驚濤起。陰森白晝啼鼙鼙，蕭瑟西風黯菰米。座傍烏騅伏不鳴，餘怒猶欲乘雲騰。想像悲歌出垓下，可憐遺恨迷陰陵。英雄坎壈識天意，失路東歸亦何濟。萬戶輕身贈故人，一死何顏見義帝。往事東流逝不回，雌雄壁壘空塵埃。君不見下相城頭望豐沛，樵歌暮上歌風臺。項王事業不於自刎時提醒之，筆下有風霜之氣。

息浪菴夜坐別叔敦讓木諸子

短棹攜樽觸浪過，將離莫問夜如何。最憐帆遠浮天闊，始信江空得月多。隱隱鐘聲千佛唱，星星岸火一漁蓑。荒雞促曙行人去，回首雙峯護薜蘿。

寄李厚菴學士

幾年烽火斷江春，萬里無諸戰壘新。一自蠟丸通帝座，始知嶺嶠有孤臣。山城躍馬荆榛滿，書劍臨戎涕淚頻。迢遞九天優詔下，清宵回首憶楓宸。表其進蠟丸陳破耿逆之功，然蠟丸更得之友人也。時文貞未以理學名，故不之及。



大閱恭紀

鑾輿曉出傳宮漏。萬乘春蒐控玉鞭。十二羽林雕鞞後。三千犀甲幔城前。招搖色映長隄直。華蓋香凝禁樹妍。脫臂饑鷹霜距疾。嘶風駭騎雪花拳。龍鱗乍見雲霄上。虎旅同趨日月邊。褒鄂宗臣張左纛。薛岐帝冑領中權。銜枚受律連營肅。射柳分弓七札穿。臂築聲中看隊列。鏡歌曲裏促觴傳。丁寧諸將投戈日。長憶先皇講武年。駟介踏雲還紫禁。六飛扶日下青天。威馳塞北名王壘。風靖滇南漲海煙。指顧銷兵資廟略。兩階舞罷譜虞絃。中間警句摸之有稜應制中之指南也。七言長律本非正聲存之以備一格。

送邱曙戒前輩之武昌

猿聲夾岸聽斜陽。江樹蒼茫接故鄉。卻較長沙歸路近。行吟何事怨瀟湘。卽聖主恩深漢文帝意。是爲溫柔敦厚之遺。

輓馬章民年丈

東廬舊築翠微間。望裏煙霞日夕還。幾度欲歸歸未得。空餘遺恨滿青山。辛苦中閨罷錦機。白頭曾未識宮衣。可憐風雨寒燈夢。猶是書堂夜讀歸。

葉映榴字炳霞。江南上海人。順治辛丑進士。官湖廣參議。道死。夏包子難。贈工部侍郎。諡忠節。

庚申夏至日起武威至張掖

武帝功成吏守邊。傷心天末是居延。人家板屋風聲裏。思婦寒衣淚眼前。目斷燕支愁見月。槎浮銀漢渡

經年慚余不作征西將。藥裹書囊信一鞭。

榆次道中

路出榆關西復西。荒原白草怪禽啼。經行百里無人迹。惟有秋風送馬蹄。

孫

蕙字樹百。山東淄川人。順治辛丑進士。官給諫。著有笠陽詩草。○給諫爲令安宜時。撫字心勞。領河務。上官謂苛令。濟河將中以非法。士民感憤不呼而至者萬餘人。負春餉。築隄堰。兩月。

之工。六晝夜成之。上官無以難也。亡民繪圖紀其事。志石中云爾。據此。可入循吏傳中。

秦川懷古

內史新豐不可求。長陵王氣已全收。千盤鳥道歸隆準。百戰鴻溝割沐猴。風雨滿天來渭北。麒麟遺塚自南邱。幾經汗馬勞諸將。紫塞黃榆起暮愁。

爲姜勉中兄弟題諫草樓

杖血曾聞濺漢廷。孤忠旅望海雲青。難回國步逃吳市。易了家緣問敬亭。失序雁鴻天漠漠。經時薇蕨雨冥冥。空餘十二封章在。夢繞銅駝幾涕零。諫草樓詩成集二章爲最。以其無一字不典切也。結意尤微婉。可思。

聞鼓山絕頂可望海外諸國欲登不果

自注。上有天風海濤亭。宋文公題。

共說鼓山高出羣。半天巒翠畫氤氳。島藏諸國晴時見。風捲洪濤靜夜聞。未得肩輿隨度鳥。何時蠟屐踏層雲。晦翁亭子空相憶。絕頂松篁望不分。三四流洋極賞。

于忠肅公祠

出狩天王竟北征，烽煙已逼鳳凰城。有君定國真長策，奇貨難居始罷兵。南內邀功爭復辟，西曹枉殺患無名。最憐一事公遺恨，不使前星羽翼成。以宋和議之失，對照于公功在社稷，真再造矣。詩中有史，擲地當作金石聲。

吳

光字長庚，浙江歸安人。順治辛丑，賜進士。第三人官翰林院編修，有南山堂集。

泊湘口二妃廟是瀟湘二水會處

泛槩楚江曲，輟棹瀟湘涯。天水互澄廓，矧逢清秋時。霜明沙洛淨，露寒岸草滋。芳蘅被長薄，修篁映素漪。月華臨夜空，青山竊多姿。帝子渺何許，嬈娟遠水湄。透靡迴翠旌，彷彿驂文狸。蒼梧白雲去，洞庭丹楓衰。美人期不還，日落愁參差。睠彼湘竹吟，躊躇有餘悲。點綴九歌白，足遠神遠韻。

遊招隱山六洞

自注：洞曰朝陽、夕陽、白雀、嘉蓮、南華、北廬。

攀陟情忘疲，洞壑洵迢迢。朝陽開霽微，夕景映澄鮮。菌萑不可見，白雀徒空傳。窈窕北廬室，演漾南華泉。虛竇顯向背，隱磴潛互綿。蔽虧欺日月，藏納杳雲煙。削鑿太華小，澹瀕神島連。偶然二儀剏，遂奪萬古妍。寓真賞非一，尋異懷屢遷。浩蕩觀物化，聊謝區中緣。作者五古胎源二謝然自能造句不徒得古人之形。

遊虞山韶音洞

自注：在嚶。

探奇尋古嶠，巖竇臨清瀨。空谷響易奔，萬竅成笳籟。苔蘚映崩壁，竹柏翳叢蒼。冬夏鳴瑟商，昏旦變明竅。

騰逸蒼梧巡。逶迤翠華邁。騖虬紛蠺嶸。羽旂森旄藹。攬袂南薰亭。天風動衣帶。月皓清湘流。雲空九疑外。抗緬千載前。躊躇發深嘅。

登昭州城樓卽事

兩江穿石壁。巒嶂倚孤城。舟向猿邊下。人於鳥上行。巖幽谷霧暝。野曠戍煙平。薄暮樓笳發。棲栖旅客清。  
千里江陵一日還後。復得此奇險之句。

晴川樓

萬古山樓對黃鶴。一身楚塞吟清秋。羲娥平向窗中過。江漢交迴檻外流。深窟鼉鼉時隱見。盤渦鷓鷯靜沉浮。禰衡李白今何處。日暮空悲芳草洲。  
江漢交迴的是此處。得此句不嫌上句之泛。

王維坤 字幼與直隸長垣人順治辛丑進士。

寄慰乾一落第

常年交臂許雲龍。太息名高未易逢。我輩都非食肉相。古人常作酒家傭。三巴二月鶯千囀。萬里雙魚淚一封。何處相思不相見。梓江迢遞劍門重。  
諸乾一松江人時幼與在蜀中寄詩。

除夕

眼底年光盡。家人真不來。西川兵火後。無復望鄉臺。

順治朝科目止於辛丑此下皆文人才士山林野老之詩

徐延壽字存永福建閩縣人有尺寸集○存永與公燭之子錢牧齋序其詩盛稱許之

建州符山寺別楚黃樊山甫

共借僧寮一榻眠。離家愁說兩經年。斷雲古驛過樵水。涼雨孤舟憶楚天。千里別情芳草外。五更殘夢落花前。城南歌舞今消歇。又見關山月上弦。

新淦縣拜周公瑾墓

水畔巴邱古縣開。周郎祠宇傍泉臺。霸圖當日成何事。才士無年實可哀。荆楚干戈終古恨。小喬環珮幾時來。天涯孤客逢寒食。特為停舟酌一杯。霸圖不成。蘇公瑾之早沒。哀之深矣。

褚

字蒼書江南長洲人邑諸生○蒼書天爵自尊。浮囂古學。韓文謔公以父執敬禮之。康熙己巳聖祖南巡。召見於行在所。命書牋二幅。御書海風。風姿賜之。時年已九十六矣。越歲卒。生平詩稿散佚。祇存此篇。

歸度仙霞嶺

匹馬勞勞蒼翠間。千尋古棧度重關。天南氣象開蠻府。嶺上風雲動越山。徑走黃狐荒草合。村連紅樹夕陽殷。生民苦憶無家別。煙火蕭條何日還。

趙士喆

字伯濟山東諸城人有觀物齋集○伯濟去家不歸。著建文年譜。董樵目中無人。然師事之。可以覘其品矣。

五平詠懷

陽春風初和。驅車游臯州。平原明朝暉。層城如雲浮。高陽綠長川。丹霞棲瓊樓。驪駒誰家郎。翩翩臨清流。雕弓飛金丸。銀鞍懸吳鉤。從禽平陵東。還歸倡家游。燕姬顏如花。琅玕為搔頭。留君調新聲。哀歌彈箜篌。清宵華燈張。輝煌羅衾稠。人生當為歡。誰能長憂愁。嗟嗟元經儒。窮年無時休。創格卻極自然不入游戲。

劉獻廷

字繼莊。廣陽人。○繼莊於天官地理農田水利刑名錢穀以及兵陣刀槊之類無所不能。頗語其餘事也。然豪氣颯馳。逸情雲上。讀其詩。可以想見其人。

懷古

古之兵皆農。農富兵亦強。古之士皆農。農朴士亦良。兵農一以分。甲冑無餘糧。士農一以分。耒耜無文章。分之則兩傷。合之則一理。請語當途人。治亂實此始。經生家安能為此言。即此可以規其抱負。

泛溪

白石何粼粼。清流自混混。信舟漾前溪。兩岸饒蒲葦。日落秋風生。停橈弔山鬼。

題暉草齋

誰將堂上春。得比春日暉。日入光更出。親老無重歸。誰將人子心。得比庭前草。春風日日吹。草色年年好。

從東野意。翻進一層。詩到此。纔有關名教。

水仙操

天行海運旋宮音。萬象回薄由人心。移情易性琴非琴。刺舟而去留深林。海水汨沒鳥哀吟。余心悲兮無古今。援琴而歌淚淫淫。

留別張鴻伯兼懷張非文和韻

舟楫吾將老。詩書世所輕。誰知天下士。漂泊亦無成。放眼空今古。虛懷向友生。北歸心已足。不復悔南征。  
一氣鼓盪  
律體最高

贈行西上人

鐵騎穿雲舊拓邊。大江歸去浪連天。五更夢醒荒祠下。百戰人酣繡佛前。風急鴈行排遠岫。秋高鷗影落寒煙。與君共望中原路。衰草離離倍黯然。  
應是戰將而  
隱於僧者

臥病

風塵泉石兩蹉跎。歲月催人委逝波。萬事無成心力少。一生有幾別離多。夢回弟妹依然失。病久交遊誰更過。剩把新詩消永日。空牀獨坐強吟哦。  
古之傷心人  
乃有此言

幽居

王孫學賦小山招。意氣峻嶒耿未消。燕市酒酣聞擊筑。吳關人去憶吹簫。功名夢醒玄駒國。卜築門臨白馬潮。回首故園千里外。江鄉隨地老漁樵。  
一肚牢騷  
借幽居發  
出此豈幽居人語耶

贈向語可

天半峨眉落照邊。漢川東與蜀江連。萬金散盡猶存骨。一劍長留豈學仙。秋水欣逢東海若。馬蹄難遇九方歎。窮途我自憐空手。洒淚相看大別前。

詠史

朝橫而夕縱。志本在溫飽。弊裘先自媿。何論妻與嫂。足以服季子之心。

七首西入秦。生死在眉睫。秦政非齊桓。如何欲生劫。明人有論已暢言之。此括於二十字中。尤見明快。

治國與治軍。臥龍豈兩事。陳壽亦何知。還問司馬懿。掃得痛快如此。作詩何妨議論。

王昭君二首

六奇已出陳平計。五餌曾聞賈誼言。敢惜妾身歸異國。漢家長策在和番。昔在陳平畫敬。此正論也。○元帝時匈奴已弱。帝不欲失信。非

畏其強。此意詩家未曾道及。

漢主曾聞殺畫師。畫師何足定妍媸。宮中多少如花女。不嫁單于君不知。若故爲自幸之辭。不怨深於怨矣。

題閨秀雪儀畫嫦娥便面

素箋摺疊塗雲母。黛筆清新畫月娥。莫道繡奩無粉本。朝朝鏡裏看雙螺。

徐振芳 字大拙山 東安邠人。



海陵寄李子傲

澹澹長河落日愁。美人芳訊到滄洲。猶龍久矣逃塵世。牽犢公然飲上流。赤水有珠歸罔象。碧天無際泛虛舟。班荆擬在雲深處。一醉青蓮海岳樓。

沈道映

字彥徵。江南華亭人。著有鴻跡軒稿。

訊髡淵水西

幽人谷水耽高臥。江邨長夏看雲坐。清夢心隨鷗鷺慵。獨醒跡向風塵左。草閣蕭蕭六月寒。窮探學海傾波瀾。千秋自取性情足。一編歌哭來無端。與君成別忽已久。不向西郊頻握手。聞道驚濤沒釣磯。爲問漁竿無恙否。

送霄客南還

聚首無多日。天涯袂忽揮。苦將遊子淚。灑向故人衣。落日河流急。寒楓驛路稀。與君俱作客。爭奈不同歸。

遊子淚。故入衣。極平平語。其合用之頓。傳出至情。知詩人所貴。點化不專求新。

野泊

野渡夕維舟。寒潮正急流。雁聲沙際月。帆影笛邊樓。獨客難爲夜。孤心易感秋。百年同逝水。不盡古今愁。

登泖中潮音閣眺望有懷

峯頭雲氣畫冥冥。蠟屐憑高試一停。湖面日翻荒岸白。海門天入亂山青。孤帆是處隨漁網。長笛何人起鷺汀。谷水崑陰俱在眼。可憐二陸久凋零。

舟泊富林謁陳大樽先生墓

富林溪上一盤桓。墓道春陰泣漢官。未見豐祠傳俎豆。空留皎日照衣冠。當年碧血青燐散。此地銀濤白馬寒。回首平陵松柏路。子規啼徧朔風酸。弔大樽先生。祇傳其精衛填海之節。而學術詞章。概從闕如此。立言得體處。

陸元輔

字翼王。江南嘉定人。○翼王爲黃陶庵先生入室弟子。學術志行不媿師門。所爲詩亦復相似。鍾譚習氣不能染也。

送袁重其歸吳門

青眼滄桑閱逝波。百年世事足悲歌。尊前故舊凋零半。亂後文章感慨多。鱸膾正堪淹客棹。驪駒無奈向關河。憑君一寄昌亭淚。江左風流更幾何。自注。時聞葉聖野之訃。

送文介石學博歸滇南

滇客頻年賦式微。今朝纔見理征衣。三江日月孤臣老。六詔風煙萬里歸。山過碧雞多戍鼓。星窮朱鳥近親闈。好音爲寄東來驛。莫道南天少雁飛。三詩值悲歌感慨之境。無志微嚙殺之音。可以覘其所養。

陸宗濂

字維水。江南嘉定人。翼王姪。

維揚舟次遇鄉人南歸

忽聽鄉音喚阿蒙。月明橋畔此浮踪。乘君下水歸帆便。寄我平安第一封。與復恐匆匆說不盡。行人臨發又開封。同一天籟。

陸元泓 字秋玉。江南常熟人。○秋玉無家。圖已像於水墨中。自稱水墨中人。

過河北劉賸菴先生墓

會云歸去總天涯。三尺荒墳萬古家。若個年年弔寒食。半瓢清酒滴桃花。

徐波 字元歎。江南吳縣人。○元歎少年任俠。後工詩。之楚中。交竟陵鍾譚二公。晚歸老落木庵。以枯禪終。生平詩近鍾譚體。牧齋痛貶鍾譚。而於元歎獨許之。

落花

花意寒欲去。登樓送所思。將分春雨恨。似與故人期。野水斷村路。孤煙生竹籬。吾徒從此逝。忍見豔陽時。

落花習徑以生新之筆。滿除之。李義山高開客竟去一首。後復見此詩。

侯涵 字研德。江南嘉定人。

送別鷺賓感家朝宗往事

閩闔門邊酒共傾。依依酬勸忽分征。卻愁此別成南北。誰道他時隔死生。十載黃墟豪士骨。千秋青史黨

人名。白頭太傅腸猶熱。手把家書倍愴情。自注。出朝宗遺札。多隔世事。

劉逢源 字津逮。直隸曲周人。

郭泰

博帶雍容七尺身。遨遊郡國擅人倫。如何下士相撫倣。只愛先生折角巾。

### 補鍋匠

高隱昔傳磨鏡客。奇踪今見補鍋人。若將姓字留天地。縱使巢由亦外臣。非薄巢由。要見不留姓字爲最。高耳。必求其人以實之。毋乃鑿

吳兆寬字弘仁。江南吳江人。

### 寄懷小脩弟

萬里江濤接郢城。上游節鉞坐論兵。風清鼓角秋開幕。月照旌旗夜勒營。海內功名多難日。天涯兄弟別離情。只今漢上烽煙滿。慷慨中流憶祖生。

閔麟嗣字賓連。江南歙縣人。著有臥雪詩草。○賓連喜遊蹤跡幾徧天下。所遊皆有詩而廬山一集尤膾炙人口。緣未見全集。止錄二篇。

### 空水閣

欲窮瀑水源。峽束忽無路。上有蛟龍居。下雜古今樹。數石何漸漸。飛動令我懼。側身入空冥。盤曲審跬步。陰森鬼搏人。日月如未曙。一闢踞其巔。青蒼於此聚。山僧不常栖。終年白雲住。雙扉風爲開。倚檻時一顧。晚來山雨晴。豁見湖光露。留連空明中。恍惚若有悟。起步得此。下信手。寫去無不入妙。

### 玉淵潭

纔過三峽橋。豁壑駭聞見。吁嗟此奇觀。曲盡水之變。石忽不受水。水怒如激電。其勢必斜飛。下與蛟龍戰。淵深不敢窺。蘇滑試一踐。我有悠然心。六虛任周徧。對之神益閒。湏洞增餘眷。高歌扶杖歸。習習風吹面。

向遊天台石梁見瀑布激石勢怒迴轉斜飛亂下如萬斛明珠噴灑  
跳擲時有語不敢輕吐意此詩石不受水數言恍置身石梁間也

吳嘉紀字賓賢更字野人江南泰州布衣著有陋軒詩○野人居泰州之安豐鹽場瀕於海刻苦以學問勝運用典實而胸襟固侍郎盛稱其詩人爭重之由是陋軒之名與諸名家相埒○漁洋詩查澹故語語真林而越見空靈然終以無名位人子持此論而衆人不以為然然其詩具在試平心易氣讀之道人中

送吳卷西歸長林

孟夏雨初霽。海村桑葉肥。小麥蘄蘄秀。雉來麥上飛。悵然遠遊子。顧盼思巖扉。十年困馬足。四體懸鶉衣。世態已閱歷。長策莫如歸。巖樹無甘蔭。冰壑無炎暉。從來高蹈士。不厭寒與飢。去去故山中。努力餐蕨薇。長林何處所。泉潔山秀峙。曖曖人煙際。灌木四五里。枝上老鴉多。春來各生子。子幼含哺勞。子大雌雄特。恩勤雖已極。骨肉一巢裏。此時垂白母。望遠閭自倚。行路稍欲稀。夕陽半山紫。兒今遠歸來。無米親亦喜。

末語非至性人誰能道出

贈汪秋澗

秋澗九尺軀。雙腕最有力。自稱草野臣。提刀能殺賊。家破讎未報。亡命走江北。黃金買紅袖。將身委聲色。

荒淫不得死，聊復弄筆墨。歐虞及顏柳，生氣盈丈尺。時賢慕絕技，他鄉且謀食。懷中一片心，到老無人識。  
秋澗奇人，惟此奇筆，足以傳之。末語終莫定爲何等人，所以爲妙。

哀羊裘爲孫八賦

孫八壯年已白頭，十年歌哭古揚州。囊底黃金散已盡，箇中存一羔羊裘。晨起雪霏霏，取裘覆兒女。亭午號朔風，兒持衣而翁。風聲雪片夜滿牖，殷勤自解護阿婦。裘之溫暖誠足珍，不得衆身爲一身。吁嗟乎，長安天子無故人，羊裘冷落對邗水。他年姓字齊嚴光，今日飢寒累妻子。

朝雨下

朝雨下，田中水深沒禾稼。飢禽聒聒啼桑柘，暮下雨，富兒漉酒聚儕侶。酒厚只愁身醉死，雨不休，暑天天與富家秋。檐溜淙淙涼四座，座中輕薄已披裘。雨益大，貧家未夕關門臥。前日三日餓，至今門外無人過。

我昔三首效袁景文

我昔客途逢敗兵，弦聲旆影魂俱驚。殘騎如狼散草莽，居人雜兔奔縱橫。漁船貪利夜賣渡，金多方許載人去。暝色潛行曙則隱，口乾腸飢我能忍。

我昔攜家亟逃難，海雲漫漫晝昏晏。野空蹄響賊馬近，我船欲速行轉慢。須臾燔燒閭里紅，風漂船入蘆

港中蘆葉菰葉蔽男婦。引衣掩寒啼兒口。

我昔兵過獨還家。畦上蠲骸多似瓜。空村無聲雞犬盡。籬菊自放霜中花。天南伯兄天北季。驚魂棄絕故園地。夜寒鬼語聚稍稍。細雨還聞九頭鳥。效景文而體源出於杜老全以質勝。

勸酒歌贈喬功偕

蠟梅開花醞香發。親戚攜觴造門闕。造門闕來勸翁。念翁遯跡楚雲東。皂帽布裙臨大海。蘆花蒲葉多清風。清風蕭蕭塵起奈何。未若蟻浮鸚鵡螺。繇來酒鄉可避世。請翁聽我勸酒歌。

燭花漾漾酒滿瓢。雪飛入檐見酒消。瓢與杓引翁嘗。念翁辛苦容貌蒼。汾河恆岳家鄉遠。吳樹淮隄歌思長。長歌復短歌。古調清冷洽。不如濁醪注瓦瓶。繇來醒者多智慮。勸翁一醉安性靈。

桑田變易城市改。翁家書卷年年在。東壁卷西壁書。中間惟應置酒壺。萊衣芟裳膝前侍。偉節慈明天下無。門戶須開明月欲來。甕中又漉新熟醕。有書有子願已足。翁不痛飲胡爲哉。三章音節劇佳。

僻壤

僻壤無春至。安知春已殘。海雲千里黑。寒鴈一聲寒。老去謀生拙。時危作客難。直西是鄉路。日日出門看。

落葉

枝上曾幾日夜來。秋已終。又隨天地意。亂下戶庭中。不靜月斜處。偏驚頭白翁。何須怨搖落。多事是春風。

小小腿傳出天運自然不怨霜露而怨春風見盛之始已伏衰之機也小家但工刻畫粗得形似而已

### 送周雪客遊新安

三秋尋老友千里去新安。地主雲中候。天都馬上看。蓬生黃帝竈。鶴唳呂公灘。登眺須扶醉。深山瀑布寒。

### 輓鮑念齋序

念齋諱輝祖。父夢斗。乙酉客蕪城。四月兵屠城。輝祖在宛陵。聞父訃。時方九歲。往蕪城尋父屍。不得。箚中得父敝衣。抱歸。歲時泣祀。奉母守節。母死。哀毀成疾。因卜地以敝衣置棺中。招父魂。同母厝于南梁。栽樹左右。日夕攀樹枝。哀號洒泣。踰年死。聞者莫不悲之。

獨遭傷心禍。應爲早死人。魂招衣當骨。淚盡子隨親。孤稚遺天末。三棺客海濱。手栽原上樹。靈鬢野陰新。

魂招十字。渾括全意。

### 新僕

語少身初賤。魂傷家驟離。飢寒今已免。力役竟忘疲。長者親難浹。新名答尙疑。猶然是人子。過小莫輕笞。

### 內人生日

潦倒邱園二十秋。親炊葵藿慰余愁。絕無暇日臨青鏡。頻過凶年到白頭。海氣荒涼門有燕。溪光搖蕩屋



如舟不能沽酒持相祝。依舊歸來向爾謀。三四寫清貧之況。五六狀瀕海之景。未點化熟語。脫口生新。莊子所謂有道妻子皆得快樂。可以想其高風焉。

玉勾斜

莫歎他鄉死。君王也不歸。年年野棠樹。花在路傍飛。

沈

磐字石均。江南吳縣人。諸生。

陳靖獻公祠自注。名迪。宣洪武時。禮部尚書。靖難兵入。不屈。磔死。

強幹謀成禍亂紆。漁陽突騎竟長驅。運籌不少黃羅漢。堅壁難逢周亞夫。司馬豈聞嫺將略。秩宗何自綰兵符。宮車赴火君臣盡。一寸丹心逐鼎湖。歎齊黃之無謀。而鐵尚書之外。無能堅守者。

分茅薊北控巖疆。鼙鼓誰教動范陽。自有長君圖社稷。不勞叔父佐成王。丹心願化千年碧。弱息難迴百鍊剛。自注。子六。人俱被禍。縵絰何人輕慷慨。忠魂總赴白雲鄉。

六月霜飛殺氣中。收拏令下市朝空。生無面目滿三族。死念君王哭兩宮。精貫白虹隨落日。魂歸丹陛起悲風。宛溪舊接秦淮口。嗚咽流澌水不東。

采石磯望開平王戰處

咫尺江陵王氣浮。東南根本治揚州。關中早勸高皇定。河內先從世祖求。狐鼠依山還背水。將軍破釜更沈舟。只今寂寞長干路。楊柳蒹葭滿目愁。

蔣平階字大鴻江  
南華亭人

禹陵

蟻壘逢堯祀。垂裳拜舜年。剖圭開日月。瘞玉鎮山川。南幸遊方豫。東巡駕不還。衣冠辭岳牧。劍舄步神仙。寢廟春常閉。宮車夜自懸。千秋明德遠。萬衆寸心虔。海闊滄江外。星臨斗柄前。金莖留曉露。碧殿鎖青煙。罔兩猶留鼎。蛟龍想負船。秦碑荒草合。漢時白雲連。蒼水書難得。玄狐籙可傳。按圖通百粵。淚盡九疑天。  
鋪敘有倫不覺不點此長律體也陳杜沈宋素稱擅長元白酒滔百韻才有餘而律不嚴矣作者隱伏自然淺深合度猶可望見初唐

送李分虎之滇黔

萬里南中路。春風入五溪。地分銅柱北。山險桂林西。樹酒尊堪泛。箬船棹自攜。關梁莊蹻設。碑字武鄉題。水出滇池倒。天臨瘴嶺低。烏言通八部。繡面接諸黎。聖武初經略。征南振鼓鼙。三軍持畢節。一戰下和泥。荒服開州郡。窮邊走寄羈。闌干紅鬪入。歌舞白狼齊。漢使難重問。磨崖不可梯。烏蠻新幕府。屬國舊朱提。君聽南征曲。能令鄉思迷。山深鸚鵡語。花老杜鵑啼。河外青蛉縣。關前白馬氏。還將碧雞賦。遲爾到金閨。

李鄴嗣

字景堂浙江鄞縣人諸生○平生以著書爲事著漢語南朝續世語中寓筆削予奪點入多師事之詩品刊落凡庸不肯一語猶人浙人中獨開生面者

繡州孝女

女李氏志在事親遂終身不嫁年四十七

遠我父母事人父母誰無父母誰有父母解一少慕事親十年不字長慕事親終身不字解二謂我女子謂我男子宛然孝子宛然處子解三有父子倫無夫婦倫嬰兒子後惟此一人解四暮雨梨花年年寒食麥粥一盂父母之側五解○古音古節作者所擬可以當古樂府讀

出烏石山後失道

習僻厭平阡岐道入榛莽筓足不肯回牽拂堅初往稍進不見天竹葉大躡掌隙處迷煙雲日脚不落壤直躬礙枝幹漸偏安得仰兩袖競翹張冒棘先用穎導者未識誰後趾蹴前網人獸盡無音但聞碎籟響三里幸出叢目光久矚睜始見樵子行寸心翻惚恍字字刻削極苦乃得極甘孟東野後見此一人

得杖

既出賀險盡瞻前乃復陡小憇對古松支離類此叟策足恥言疲恐落僕夫後山人指爪彊折竹等蒲柳構子進一莖茲意感君厚忽若當顛危倚仗得奇友山魃不敢爭空潭戲勤繆翼足漸以輕影逐孤雲走笑謂同行人騰嶽等培塿承上一首來詩格亦從苦得甘

自大嵩上二十里至福泉精舍

舍舟上樵徑晴眺分纖毫循塗凡屢盤獲奇隨所遭崩崖露雲根長風勢漸饜諸巒徐束體始識身已高在輿尚苦疲何況昇者勞斗上復稍垂豁然闢林坳老松得成鱗巖土抽春毛梵僧構幽棲人龍同一巢

入門氣得蘇。豆筍羅山庖。到此慚浮名。徒爲猿鳥嘲。諸蠻徐東體四語少陵

王猷定字于一江西南昌人選實生著有四照堂集○于一

螺川早發

月落秋山曉。城頭鼓角停。長江流剩夢。孤棹撥殘星。露濕鷗衣白。天光鴈字青。蒼茫回首望。海嶽一孤亭。

大江流漢水。孤艇接殘春。瀛洋賞費此度詩。爲十字千古三四寫舟行早發亦復入神

戴本孝字務旃江西南和州人布衣著有前生餘生詩稿○池北偶談載務旃性情高曠在京師時夜

是也詩近平直茲錄其集漢魏集陶數章

漢魏集律

秋殘

良時忽一過。阮白日半西山。王哀彼寒霜厲。馬明空令蕙草殘。無微歌發皓齒。嵇時俗薄朱顏。曹奄若風

吹燭。無人生一世間。徐

送別

遠送新行客。孔中心摧且傷。徐寒蟬鳴我側。曹孤雁獨南翔。曹努力加餐飯。無隨時愛景光。蘇勉哉脩令

德。編別後莫相忘。曹

律陶

贈野人

樂與數晨夕。區區諸老翁。貧居依稼穡。繞宅自蒿蓬。懶惰故無匹。箴規嚮已從。閒居三十載。鄉里習其風。

課農

所營非近務。相命肆農耕。井竈有餘處。林園無俗情。酒能祛百態。菊爲制頽齡。遂令介然分。不爲好爵榮。

田家

少無適俗韻。甘以辭華軒。但道桑麻長。而無車馬喧。服勤盡歲月。守拙歸園田。終曉不能靜。雞鳴桑樹顛。

集陶勝於集漢魏諸作。以陶有名句。漢魏惟在氣骨也。此章尤極自然。

葺山中田廬

素襟不可易。性本愛邱山。懷役不遑寐。躬耕非所歎。敝廬何必廣。虛室有餘閒。歲月相從過。吾生夢寐間。

卷七

曾傳燦

字青藜。江西寧都人。著有止山集。○青藜選本朝詩名過目集。所選純不勝雜。而人才略備。余于此竊有取焉。兄名嘯。並以詩名。有雙丁之目。

將立春同友郊外眺望

羣動各有息。茲遊成我閒。氣交寒煖候。春到有無間。寒石自流水。夕陽多遠山。離離林下屋。時見鳥飛還。

蕭

字中素。江南松江人。○中素隱於梓人中。人以工役之。往役受直待。詩以詩人。則行朋友之禮。古人賣漿。傭牛之伍也。惜其詩未能多見。

答董子紹詩

南村有遺叟。寂寞居河濱。一褐常見肘。數椽聊寄身。所志在不苟。食力甘苦辛。閒來把魚釣。終日無纖鱗。晴霞映眉宇。野火光燐燐。坐久發清嘯。怡然全我真。於此頗有得。勿謂原思貧。詩即白道生平所志在不苟。食力甘苦辛。得陶公語意。

毛會建

字子度。江南武進人。

回鴈峯

山到衡陽盡峯回。鴈影稀。更憐歸路遠。不忍更南飛。

董以寧

字文友。江南武進人。○文友與陳太史其年。鄒進士訐。董以寧去。並有才子之日。生平急友朋難。奮不顧身。亦豪士也。

席上看弄丸歌

臨淄卽墨天下聞。鬪雞走狗紛如雲。我來作客喜結納。脣舌不減樓君卿。銀花之脯八帶魚。主人邀我飲。半醺當筵少年擊鼙鼓。更一少年袒臂舞。足下紅錦鞵。腰間五色組。手持一丸塵雲端。一丸未落復一丸。雙丸將落承以頂。須臾重入雲中看。更出七丸在肘後。兩手承螭左復右。旁有少年拍手嗤。大言此技安。

足奇。摩頂至地身倒懸。以足弄丸目不施。七丸上下聲相擊。擊聲一依鼓爲節。是時我醉不欲眠。紛紛羅袖屏前列。

渡淮

黃河經北徙。千里背淮流。遠樹煙中暝。荒城天際浮。人歸二三月。南去一孤舟。何處王孫釣。傷心古渡頭。  
讀荒城天際浮五字爲淮人傷心今更陡高於城矣。

閨怨

流蘇空繫合歡牀。夫婿長征妾斷腸。留得當時臨別淚。經年不忍浣衣裳。  
詩人寫淚者多。無寫到此者。

陳子升字喬生。廣東人。縣諸生。以薦舉官給事中。○喬生詩麗而有骨。原本義山。近代中可儷楊升菴。

昔昔鹽

鴛鴦樓外鳥欲棲。瑇瑁梁間燕吐泥。月暈圓隨漢東蟬。天河傾向汝南雞。萬方儀態華鐙出。一笑橫陳翠帳低。愁見曉鴻征塞北。不知天將定遼西。

何嘉延字奕美。浙江山陰人。

燕子樓

極目古徐州。斜陽睥睨愁。黃河聞改岸。紅粉尙名樓。芳草長埋恨。悲風不待秋。尙書遺墓在。可有珮環遊。

地已變遷。樓名長在一女子之真亦足不朽。可以風世矣。

張可度字嗣篔。江甯人。

### 廬山懷古

父居黃閣女峽峒。流水桃花石室中。無限炎威竟何在。成仙卻讓李騰空。自注。林甫女也。李白有送內廬山訪女道士李騰空詩。

沈欽圻字得與。江南長洲人。邑諸生。贈內閣學士。兼禮部侍郎。○後學周準填諱。○國初詩沿明季

風流毒天下。不能濡染。沈生大是豪傑之士。太僕先大父師也。不輕許人。當時以爲篤論。

### 春日招諸生

春風來融融。好花自爲開。好鳥林間鳴。求友聲喈喈。我心適無事。觸物俱和諧。鳥尙求其羣。人豈無同儕。花下設杯酒。願與諸子偕。中心諒有得。各自抒我懷。元化本大公。何用分形骸。春風沂水。無非天趣。

### 生祠

虎邱七里塘。生祠何纍纍。榱棟高入雲。丹雘紛陸離。連牆與接牖。屹然豎豐碑。下承以最風。上蟠以龍螭。華文表德行。大論杼猷爲。某公居官日。曲折行其私。析利如秋秧。忘卻民膏脂。文中頌清節。飲水邁伯夷。某公居官日。斷獄無矜疑。五刑任喜怒。罔卹童與耆。文中頌仁愛。臯陶爲士師。周覽諛悅文。一例慚惡辭。舊有遺愛人。行政介且慈。行如打包僧。蕭然去官時。士民走相送。各各涕漣洟。誰爲建祠宇。惟留後人思。



好官無生祠。墨吏有生祠。好官與墨吏。行人知不知。傾吐出之。如白傳秦中吟。辭氣風骨無一不肖。

除夕書事

匆匆歲欲盡。有客過我廬。云有急難事。強梁禦諸途。一身惟赤手。何以遠里閭。君能急人患。哀聲爲君呼。援手實我分。焉敢辭有無。所愧生計薄。末由足君須。傾囊贈之去。餽歲無留餘。恐乖家人意。歡顏對妻孥。妻孥知我心。笑言倍怡怡。依然煨榼榼。聊復換桃符。入夜四壁清。此心真晏如。

童奴石義託身於阮懷寧府中。頗用事。招家五弟。衷赤往。謂微官可得。既至。弟識亂徵時遊倡樓。

示荒嬉不可用。乃放歸。乍歸而留。都不復守矣。喜其能識時。自汗。以免。因贈以詩。

都督滿街走。職方賤如狗。白注。時童謠。此時乾坤入醉鄉。君臣嬉戲同披猖。翦伐連枝折故劍。一網盡欲擢鸞鳳。僕隸招邀吾弟去。人頭畜鳴日相遇。寸心陡觸大廈傾。厝火積薪難久駐。自荒於色耽倡樓。是鄉足樂真溫柔。香濃魄醉不知返。一笑似欲三年留。懷寧謂是妄男子。收拾行裝子休矣。歸來三月陪京亡。子嬰奔竄繼於枳。沙蟲猿鶴總消沈。大地旋看換塗軌。吾弟依然把耒耕。閒中常話小朝廷。從今永斷冠纓夢。抱犢眠雲無限情。

贈徐元歎波

少年爲俠客。萬金散盡不少惜。中歲爲詩人。遠之楚澤哀靈均。歸來慕隱者。脫棄浮榮如土苴。晚歲依空

門巷名落木歸本根。我來訪君荒山裏。留客晚餐烹菊杞。夜寒襖被擁繩牀。月滿空堂疑積水。不是尋常話。箭鋒生平披豁見心胸。卅年無限悲涼事。付與晨鐘暮鼓中。贈詩竟作元歎小似起手入語立格甚奇一結蘊含可思

### 秦良玉遺像

纓纓銀冑垂紅綫。櫛櫛耀日風前披。滿月粉頰揚青眉。繡旗飄翻擁長鉞。誰人結束整隊伍。知是石砭女士司。英雄自古出巾幗。投石戰場壯顏色。當年平靖奢崇明。一騎紅裝萬人敵。手持長繩入賊陳。縛賊歸來向空擲。思宗季年紛戰爭。勤王誓師萬里行。至尊一語表英武。桃花馬上請長纓。白注思陵賜詩中句後來獻賊入巴蜀齟齬不遺橫殺戮勤王兵殘勢窮蹙子喪弟死一身獨連斬六賊力已殫拔刀自刎身不辱忠勇義烈兼有之女中張許誰能續。卽今遺像餘桓桓。摧激人間壯士肝。願將效死沙場女。追配從軍古木蘭。千古奇人詩亦極力寫之。○明史謂良玉壽終於家。然先大父同時人亦似有據豈所云所聞異辭者耶。

### 梅

冰霜磨鍊後。忽放幾枝新。獨立江山峯。能開天地春。自然空色相。誰與鬪精神。野客閒相對。如逢世外人。脫盡窠臼。籠罩前人。

### 送楊曰補南還

去年春盡同爲客。此日君歸又暮春。最是客中偏送遠。況堪更送故鄉人。四層曲折一氣傳寫又脫口而出略不雕琢是唐人絕句品格。

梁

字逸民，江南崑山人。著有紅葉村詩。○逸民人與詩俱不入。時葉文敏序而傳之。卷中意味稍薄，而氣塊俱峭，翫然自選。

把酒桃花下

茅屋水聲裏，面面桃花紅。深杯獨淺酌，花落盈杯中。今日向花醉，明日枝頭空。開落固有時，何用嗟春風。

泊舟古渡

渡頭楓葉正飄零，驛外空傳舊有亭。兩岸雲封千嶂白，五更霜落一燈青。濤聲入枕愁先覺，寒氣侵人酒易醒。莫向洞庭悲木葉，恐驚瑤瑟怨湘靈。

阮旻錫

字疇生，福建同安人。

還家

盡室遯江村，乍歸未識路。卻問路旁人，爲指門前樹。癡兒各長成，有弟亦同住。病妻久臥牀，淹淹迫歲暮。獨客苦思鄉，還鄉如客寓。二親掩重泉，淒清感霜露。回首望禾江，舊廬杳無處。信宿不遑安，又復出門去。  
向於京口見無名氏詩，有萬里是鄉家是客三冬披葛夏披綿句，寫盡作客情事，讀此詩尤覺黯然。

七忠祠

遺廟淒涼落照餘，諸公抗節竟何如。可憐苦戰平都督，不及臨戎鐵尙書。風雨孤城猶黯淡，河山故國已丘墟。峨眉亭上題詩客，千載傷心論革除。

陶

徵字昭萬。江南寶應人。著有湖邊草堂舟車等集。

將進酒

白日黯黯容易過。春風玉顏當奈何。君能忘愛我和歌。重傾迭酬金叵羅。鵬鳳脂。劈麟脯。炊珠羹。流玉醑。憂來填膈不能食。何如交歡及爾汝。君不聞閉關沉酒稱達生。又不聞大呼狗寶千載名。人生不飲空獨醒。

苦雨詞

鄱江瀾瀾吹雨天。五月無禾成白田。枯槁雖具下力難。可憐來日無朝餐。辛勤終歲不得息。昨夜傳聞羽書急。君不見東鄰向壁哭未休。長男輸役中男囚。

曹舍人寓齋聞搗衣作

廣庭月白秋漫漫。主人有酒留客歡。誰家思婦罷織素。坐調清砧當夜闌。砧聲斷續露華濕。還聞門外莎雞泣。同是天涯離索情。感時最有閨中急。力盡回房淚點多。遙憐此際蹙雙蛾。西風入懷奈獨何。

贈陳藹公

往者曾讀邊令傳。云是保定陳子作。才雄法贍有根柢。菁英滿前氣旁魄。我嘗彷彿思其人。千里停雲阻河朔。今年得遇恆山陽。斗酒論文慰蕭索。憶余爲客西復東。門前車轍無一同。高曾規矩久蕪沒。後人不

識般僮工君今著書已躡尺。況復身親見兵革。一嘯一笑皆有由。豈是尋常老逢掖。莫言上策不見收。長安少年多徹侯。君才如此合貧賤。且醉醇酒吟清秋。君不見江河之勢原東流。邊令米脂令邊大受也。曾發李自成祖塋。藹公作傳

蠻觸行

秋林濕盡土花碧。蝸牛延緣不踰尺。角中兩大安如山。胡爲相尋日相戾。東帝西帝齊與秦。當年自謂英雄人。一朝黏壁竟槁死。沛公出爲漢天子。橫覽古今何非蠻觸。借齊秦以發其大凡。

陳思王墓

斜日下高樹。秋風生細塵。可憐衰草地。猶是建安人。白屋更新主。青山結故鄰。童童雙檜在。風雨各千秋。三四語爲時所稱。

題康郎湖忠臣廟壁

草昧龍爭日。風雲得武臣。乘時元赤幟。奮跡豈黃巾。羽檄綏南服。天垣動北辰。斷蛇先讖楚。逐鹿後降秦。建業王居正。洪都戰血新。旌旗迷過鳥。矢石賊潛鱗。借箸應無匹。焚舟若有神。陟危社稷重。仗節死生均。日月躔雙壁。羌戎奠九垓。君恩五等錫。士氣一朝伸。孫子圭璋在。春秋俎豆陳。白波吹浩淼。蒼瓦覆嶙峋。往事今爲烈。羈人感自真。臨流獨橫涕。蕭瑟對秋旻。視李北地作較典切。兼有骨力。此種全從杜陵得來。

趙與榘字楚材福建龍溪人。有珠谷剩草。

九日雜詠

寒食弔之推。端陽悲郢客。如何重九日。不祀陶彭澤。

董

開字隱僧。江南吳縣人。

歲杪送青來遊滇

遠遊當歲暮。爲養反離親。貧士千秋恨。依人萬里身。丹崖盤鳥道。黑水暗龍津。嗟我猶羈旅。雖筵倍愴神。

郁

植字大木。號東堂。江南太倉人。諸生。○東堂八歲應試。作五倫論。吳梅村祭酒見而奇之。既長。植研窮古學。爲王新城尙書賞識。康熙己未。以博學鴻詞薦。未應試。卒。詩體裁盛唐。不落元和。以下讀悲歌六章。可以見其生平。

烏夜啼

碧梧墜露驚秋早。羅幃轉愁難曉。乳烏啼斷井欄西。閨中一夜青絲老。只可閨中伴我愁。烏啼切莫向邊州。盧龍積裏征人在。多恐聞時也白頭。

猛虎行

猛虎突出勢恆怒。不住深山踞當路。風高月黑聞嘯聲。四野行人盡回步。一虎之猛尙可當。羣狐假竊牙爪張。豈無壯士欲手搏。出門四顧心徬徨。眈眈爾威誰養就。昔猶昏暮今白晝。瞑目從教凡獸驚。肥身那

管飢民瘦。虎兮虎兮。知懼無。灞陵亭下秋草枯。飛將猝發金僕姑。石猶飲羽況爾乎。

韓侯釣臺

王孫昔釣長淮流。釣竿一擲重瞳愁。赤龍得水上天去。鍾室酬功付刀鋸。漢家青史兩釣臺。千秋獨爲韓侯哀。何如客星早歸釣。一別東都更不來。兩釣臺。思陳矣。作者說來。偏見其新。

悲歌

男兒三十尙貧賤。土室低頭事筆硯。落魄恐遭厮養辱。苦吟畏被妻孥見。冬日不鑪夏不扇。坐穿一榻破萬卷。西行發策獻至尊。致身不受將軍薦。由來絳灌譏賈生。胡用若曹弄柔翰。齊門挾瑟嗟徒工。獨立荒郊淚如霰。

我欲歸種襄陽田。背依高山面大川。婦媿男耕自怡悅。伏龍雛鳳相周旋。不爾亦是桃源仙。桑麻雞犬別有天。誰知此樂難再得。商羊早魅迭弄權。東鄰輸租鬻小女。石壕夜呼橫索錢。西家老翁徒壁立。惟忍凍餓長安眠。

旁人勸作洛陽賈。鮮衣如雲馬如虎。大兒羽林充宿衛。小婦邯鄲善歌舞。明珠白璧家盈箱。晝攬鏹銖夜勾股。嘖嘖猗頓獨何人。卻笑黔婁徒自苦。吾曹意氣恥阿堵。揮斥黃金賤如土。安能跼蹐屠沽伍。六章相連而下。

古人篇法。起手甚健。

脫身從軍向絕域。大食烏號懸兩腋。部中不滿五千騎。百戰沙場盡辟易。尉佗繫組明光宮。樓蘭懸首長安陌。凱歌入關報天子。始信書生萬人敵。一朝坐失幕府歡。縛下都船對刀筆。衛青天幸輒有功。李廣數奇竟何益。

流沙北去弱水東。琅玕作樹珠爲宮。藐姑仙子冰雪容。導以翠節雙青童。我欲從之問丹訣。直與天地同無終。秦王漢武皆英雄。樓船浩蕩乘長風。鸞龍吹水作山立。三千嬌女沉淵中。驪山茂陵空白骨。不死之藥何時逢。設想愈幻。愈幻愈妙。

學仙學劍兩無成。爲賈爲農安足道。中心不羨黑頭公。貧賤何妨鄧禹笑。有琴恥向貴主彈。有門恥爲丞相掃。流行坎止隨所如。入世那能量柄鑿。鄴侯架上皆吾師。吾將終焉從吾好。此章總收結穴在此。○不步趨少陵七歌。而風骨神合。味自。

### 觀燈行

新年半月雨不歇。連巷春泥馬蹄沒。差池已過賞燈時。金尊玉管花空發。婁東刺史趁新晴。特促然燈照夜明。珠箔舞殘初見月。紅窗歌轉乍聞鶯。六街九陌燈光曉。海城今夜春生早。不是官衙恣宴遊。爲民預祝秋成好。對景翻教憶去年。此時聽雨正高眠。華鐙卻掩春層寂。誰道秋來更可憐。九月十月風雨惡。到處田疇盡蕭索。賣男鬻舍僅供糧。那有餘錢更行樂。聞說言官特疏求。減租詔下可無愁。不辭徹夜笙歌



涕。及此風光樂未休。樂事無多憂轉續。書生迂願何時足。乞取蟠螭玉九枝。攜來遍照流亡屋。點綴太平。忽憶去年。

愁慘波瀾層疊哀樂無端。未二語可云歌以當哭。

東顧亭林先生

驚喜相看問阿翁。少年連袂各頭童。家從十五年前別。身在三千里外同。且注蟲魚潛硯北。任教車馬過牆東。鄉關耆舊多蕭索。閱歷如公道未窮。

客曉

欹枕荒郊鳥亂啼。漸聞人語板橋西。愁邊覓句天難曉。夢裏還家路易迷。兩岸菱蘆千里鴈。五更霜月一村雞。吳儂到此腸先斷。況復高城急鼓聲。

讀史偶感

兵壓邯鄲氣欲吞。時危公子下監門。滿堂珠履三千客。朱亥從來未受恩。與毛遂定。繼同意。

助名盡室少齊肩。翻爲椒房受禍偏。萬乘不能求一女。當年最有日磳賢。霍氏功高不及金之謹密。拈出兩家爲千古鑒戒。

徐

柯字貫時。江南吳縣人。此文靖公次子。侯齋逸民弟也。始則風流跌宕。繼歸和光同塵。詩中半入溫柔鄉語。與侯齋各行其是。豈所云首陽爲拙柳下爲工耶。存詩二章。以志崖略。

早春園林感興

已典春衣盡。還驚春色來。百花南向拆。一雁北飛回。濁酒從兒醉。輕羅任婦裁。平生蕭瑟意。身世幾悲哀。

欲雪限韻

慘淡庭松色，喧啾檐雀聲。有苔封玉砌，無露到金莖。已厭浮雲重，還看颺絮輕。應知隴上者，此際輟深耕。

有奇小婦詩，中云：香能損肺，宜少。嘉漸沾花，摘莫類。一時傳誦，摘錄于此。

文 點許人，有貴介多方求之，已寫就矣。聞其人戀官職，不願堂上，即隨手裂破其狀，介如此。

呈芸齋先生

天寶開元事已陳，風塵宇內老遺民。偶談先世頻揮涕，為破家園只負薪。訓子八行文不滅，自注：忠介公家書。

冤一疏血猶新。白注：芸齋為父訟冤，血疏。衣冠古朴人誰識，認是林宗墊角巾。芸齋即忠介公家子，子佩先生也。一門忠孝，於贈答中傳寫盡之，得立言之體。

渡江

青山如故人，江水似美酒。今日重相逢，把酒對良友。

陳 珪 字比之，廣東海陽人。

冬日同友人遊南巖精舍留宿次達上上人韻

一路霜風落葉深，偶逢知己入空林。雲停似欲依禪定，鶴立居然有道心。古洞燈微涵冥色，夕陽鐘動出

寒音。十年宰相渾閒事，聊與山僧和苦吟。

陸 進 字蓋思，浙江候杭人。

題宋高宗六字碑自注。硃書傳忠廣孝之寺。

雲門野寺古禪關。片石峩峩煙靄間。一自翠華來勝地。常留宸翰紀名山。丹文不變千年色。碧蘚難侵六

字斑。堪笑花宮稱廣孝。君親當日幾時還。宋高不報父兄之讎。稱臣稱姪。其罪彌甚。難數矣。一結譏笑之中。嚴于鉄鍼。

朱爾邁字人選。浙江海寧人。○此亦王新城所賞識者。雖欠精警。而氣體自不落小家。

葛洪丹井西尋唐顧逋讀書臺舊址

陰陰澗底花落。落嶺頭柏蒼蒼。雲霧重渺渺。人家隔相傳。葛稚川燒丹此中宅。至今丹井間。紅泉漱白石。石上臺何高。栖遲合騷客。新藻灑芙蓉。英辭動金碧。千載人讀書。余也忝後席。學仙仙未成。知音懷夙昔。獨自抱琴來。慨焉終日夕。

鐵陵廟

弱冠雅負奇。矢志凌雲表。匹馬佩弓刀。出自三關道。報恩功未酬。獨立傷懷抱。歸臥南山南。荒林跡如掃。更上鐵陵關。往事尤悄悄。浮雲捲大旗。落日耀空堡。嗟哉明武軍。一往亂飛鳥。戰血鬱未消。化作山頭草。枝枝帶征魂。遺恨何時了。

韓純玉字子蓮。浙江歸安人。著有蓮廬詩。○子蓮係求仲子。求仲為湯霍林所累。不無失身之譏。子蓮終身抱憾。時時飲泣。

題李營丘風雪運糧圖

自古嘗稱蜀道難。百步九折縈巖巒。何況嚴冬深雪裏。寒氛曠靄踰千盤。前峰翠嶺轟天起。後峰連綿勢未已。猿狖不度鳥不啼。懸崖無根谷無底。峨眉劍閣雲萬重。捫參歷井摩蒼穹。蛟龍蟠拏古木偃。蠅蝮脆脆飛梁通。此時何處來徒衆。運糧千里輓輸重。僕夫股慄泥沒脛。車輪欲摧馬蹄凍。誰能畫者李營丘。秋毫細斲天爲愁。心神自與元氣合。筆力直與造化侔。營丘本屬唐宗系。邦家正值凌夷際。隆準王孫泣路隅。紆干凍雀遙飛去。天寶以降傳乾符。車駕幾度留成都。漢陰饋餉騾背負。百官始得充朝餉。蜀道之難難若此。危途數困唐天子。當時寫此非偶然。後來題者趙承旨。承旨亦是宋天潢。筆墨神妙真相當。徘徊歎賞最珍惜。似因弱宋悲殘唐。唐郊宋社久荆杞。又曾再閱滄桑矣。書畫還從世上傳。乾坤舊事隨流水。此卷經今八百年。卷中陵谷猶未遷。收藏印記亦屢易。令人對此情惘然。君不見自有書契來。陳迹悠悠皆可觀。空將哀樂感興亡。憑弔環州一抔土。嗚呼豈必王孫心。獨苦弱宋殘唐遙遙相應見畫與題畫者無限經營苦心不止筆墨之工也人君尙德不尙險意於言外見之

漢陽渡口作

漢陽窺鄂渚。夾岸走長虹。小艇雙飛燕。中流五兩風。一江分二郡。三國鬪羣雄。多少興亡事。銷沉向此中。

自注。楚江小艇一人。掉兩漿。名雙飛燕。

魏際瑞原名祥。字善伯。江西寧都人。○此叔子長兄也。魏氏兄弟工古文。韻語非其所長。伯子雖多敗闕。然時有生氣。韓侯釣臺云。曾說婦人偏隻眼。空傳霸主是重瞳。贈人云。天地有時餘爾。

我英雄無主笑曹劉可以見其氣概。

諸葛公墓

定軍山下柏蒙茸。曠古精誠在此中。三尺孤墳猶漢土。一生心事畢秋風。孫曹未滅成何世。天地無知喪此公。千載傷情惟杜宇。年年啼血樹頭紅。三題類頌兩朝開濟舉其在生時言此舉其既沒後言立論各有所主。

金山

大江東下海門寬。萬里奔流激箭湍。不信山從水底出。卻疑身在畫中看。龍窩燈火千株動。蜃氣樓臺一點寒。誰道風波不可涉。風波危處卻平安。

江頭別

白石山過紫石山。鷓鴣灘下鯉魚灘。山山連接灘灘急。遊子南還何日還。竹枝遠響。

王遵坦字太平山東益都人隨肅王平蜀以軍功得官至四川巡撫著願學齋集

雪浪灘

午枕不可竟。醒此驚湍聲。堆雪耀昏夜。殷雷喧夏晴。譬諸磊落士。所鳴恆不平。笑彼清冷潭。泯泯含微明。

朱徽字遂初江西進賢人

舟行零都道中

春日既已暮。山溪水亦長。緣殊未極。茲焉復理榜。川原驚迴鬱。觸目紛萬象。鳥啼山木暗。人語灘石響。雨外峰明滅。風前花偃仰。軸轉失來蹤。沙明得前朗。魚跳碧潭中。猿引蒼藤上。壁隙鬼神劖。石皴仙人掌。時或遇平曠。茆屋兀三兩。予本倦遊人。取次愜心賞。逢山擬便登。遇水欣長往。只此區中跡。已深霞外想。何時縱所如。悠然息塵鞅。

舒忠讜

字魯直。江西南新建人。

### 滁州遇避寇人過江

半夜頻呼起。寒風送我行。英雄消馬跡。天地感雞聲。壘破纜添戍。村空又避兵。始知班定遠。不肯作書生。

陳恭尹

字元孝。廣東順德人。著有獨漉堂詩。

### 日本刀歌

白日所出金鐵流。鐵之性剛金性柔。鑄爲寶刀能屈伸。屈以防身伸殺人。星飛電激光離合。日華四射瞳瞳濕。陰風夜半刮面來。百萬愁魂鞘中泣。中原歲歲飛白羽。世人見刀皆不顧。爲恩爲怨知是誰。寶刀何罪逢君怒。爲君晝盛威與儀。爲君夜伏魍與魎。水中有蛟貫其頤。山中有虎抉其皮。以殺止殺天下仁。寶刀所願從聖人。與藥亭作用意各別。而尊崇中國。指歸略同。但賞其能作驚人語。

### 贈余鴻客

蜀犬不識日。羣吠聲。狺狺。越人賤章甫。不以易文身。中原龍戰二十載。萬事反覆如朝昏。我行驚懼伏草莽。舉國大笑爲愚人。何來年少金陵子。肯道相思滿人耳。三年覓我二樵間。一夕逢君五羊市。傾山倒海見胸臆。白日照耀肝腸裏。羈貧無酒留君歡。對坐江樓飢不起。是時積雨江上晴。丹楓亂落寒蟬鳴。長風駕浪作邱壑。蜃樓海市相崢嶸。趙佗朽骨爲黃土。陸賈詩書亦何補。朝臺空有漢名家。浩歎今人不如古。今人古人間容髮。舉足之分邈燕越。眼前得喪等雲煙。身後是非懸日月。怪君茂齡懷抱奇。嚴君風義兼能詩。曾窺一二每心折。安得天馬無龍駒。荒城氣黑落日短。強爲吾子停斯須。如君意氣復何道。所願故心終不渝。

柏舟行爲區母陳太君賦

柏舟兩鬢猶可儀。陶嬰黃鵠曾雙飛。夫人爲婦已頭白。眼中未識君光輝。自言生長大丈夫。經史胸襟炳如炬。父母有命兒有心。縱不言承已心許。心期頡頏同一林。天教殊絕同辰參。人生意氣貴一諾。妾寧負天不負心。妾父有男妾有姊。君家大夫只一子。有妻於俗得孤立。無妻爲殤終已矣。素車白馬入君門。繇來爲義非爲恩。身安分命甘若齋。半生衣枕無啼痕。當年十五今五十。嗣子成立皆有孫。嗚呼。男兒陷胸絕脰死容易。就義從容人所畏。青閨冉冉盛年徂。寸心一矢終不渝。千金之劍贈墓樹。至今談者猶區區。何況贈以千金軀。乃知未仕報韓者。古今所以爲丈夫。負天不負心。天指母氏。本共妾母也。天只句。區大夫止一子。無妻不立後。則後絕矣。此陳太君能見。

大義處詩中  
曲曲傳出

邊草

勿論榮與悴。今古恨無窮。雪散燒痕上。青歸戰血中。天長垂大漠。地遠後東風。獨有明妃冢。年年似漢宮。  
青歸戰血中。五字驚人。

秋戍

漢皇猶自將。率土敢言勞。其命惟良馬。餘生託寶刀。侵霜秋柝冷。占氣夜天高。未見功成日。還家已二毛。

蜀中

子規啼罷客天涯。蜀道如天古所嗟。諸葛威靈存八陣。漢朝終始在三巴。通牛峽路連雲棧。如馬瞿塘走浪花。擬酌昔賢魚水地。海棠開遍野人家。  
王漢王於巴蜀漢中。漢於此興。後主不能守蜀。而漢亡矣。四語可與論古。

鄴中

山河百戰鼎終分。歎息漳南日暮雲。亂世奸雄空復爾。一家詞賦最憐君。銅臺未散吹笙伎。石馬先傳出水文。七十二墳秋草遍。更無人表漢將軍。  
表揚才華。說奪姦魄。論最平允。

隋宮

穀洛通淮日夜流。渚荷宮樹不曾秋。十年士女河邊骨。一笑君王鏡裏頭。月下虹蜺生水殿。天中絲管在



迷樓繁華往事邗溝外。風起楊花無那愁。

虎邱題壁

虎跡蒼茫霸業沉。古時山色尙陰陰。半樓月影千家笛。萬里天涯一夜砧。南國干戈征士淚。西風刀剪美人心。市中亦有吹簫客。乞食吳門秋又深。極熱題。須一洗。窠臼此爲得之。

送姜山上人遊南岳

送師西去重低徊。會上衡山絕頂來。夏帝碑蕪蟲篆徧。楚天峯斷雁行迴。燈前鬼芋穿沙出。霽後僧門鑿雪開。正是到時三二月。上方明月下方雷。奇景。尋奇句寫出。

發舟寄湛用啮鍾裴仙湛天石

扶胥古渡水淒淒。雨後移舟望轉迷。數口寄居秋草外。一身爲客楚雲西。家無兄弟依朋友。地夾河山畏鼓聲。知己片言應不負。亂離妻女藉提攜。如面訴友朋宛轉。關生情文並至。

讀秦紀

謗聲易弭怨難除。秦法雖嚴亦甚疎。夜半橋邊呼孺子。人間猶有未燒書。

董道權字秦雄。浙江鄞縣人。○秦雉詩丁於言情。居出不窮。有長袖善舞之態。

雪中答李杲堂

鄱陵孝廉重然諾。約我今秋醉桑落。先人有友官并州。我欲從之客雁丘。高堂有母缺甘旨。負米何辭數千里。杲堂李子憂我閉門飢欲死。告以遠行爲色喜。酌我黃金壘。贈我青銅錢。低徊不忍別。此別須經年。袖君之錢醉我酒。城東城北頻回首。歸來兒女候柴門。笑指瓶中不盈斗。牽衣問我欲何之。今年豐熟仍苦飢。耶未出門共耶語。耶既出門啼向誰。示兒袖中錢。故人佐行李。移與易米薪。且以救妻子。量米數薪堪作數。日食買舟無資行不得。他日仍登李子堂。李子爲我作歌聲。蒼涼曳履依然守蓬華。得酒且與傾壺觴。昨夜雪花如掌大。草閣嚴寒只僵臥。午餘日色照西窗。起把君詩讀幾過。窗前冰雪消有時。故人顏色長相思。友人贈錢爲遠行資。乃歸易薪米。仍守蓬華。貧上實有此苦也。仍復登友人堂賦詩飲酒。絕無羞澀。猶見古人交道。

王麟友同宿舍舍志感

廣陵城中夜聲柝。廣陵城頭啼烏鵲。爾我相逢語正繁。僮僕無情睡先著。微風忽起搖燈光。輕寒稍覺侵衣裳。鼓聲坎坎下三四。解衣滅燭眠匡牀。與君展轉各無寐。細數年來不得志。爲惜天涯此日身。轉憶先人舊時事。君家曾祖大司空。清名文譽聞江東。神光兩朝焚諫草。燕齊百郡銘河功。聞訃朝廷倍惆悵。特命春官子祭葬。卮酒分出天府漿。墓道築就東園匠。此時萬國來車書。至尊別殿夢華胥。潼關烽火起倉卒。延秋龍鬪爭歛歔。若翁司空家孫子。自拜國恩心國恥。策馬請監丞相軍。守城遂同丞相死。此時君作懷中兒。何處尋來馬革屍。今踰二十善詞賦。蓼我開卷徒傷悲。吾翁若翁交最好。吾翁賢書年獨早。七篇

屢下南宮第一裘。敝盡長安道。負囊簪筆越王臺。角弓鐵騎吳山來。白眼世上誰共語。散髮江湖祇自哀。  
閉門著易忘暮年。把酒讀史呼蒼天。嗟我三十尙失意。山高著述何時傳。若翁遊魂歸未得。吾翁買土葬  
無力。相逢此地喜欲狂。相看今夜愁如織。披衣起坐聞荒雞。檣槍在天明月低。客舍相遭。追述累世交誼。忽悲忽喜。百感茫茫。自是  
意動神隨之候。

任元祥

字王谷。江南宜興人。諸生。○王谷與陳其年善。時其年著聲藝林。王谷規其詩。有才無情。以倉卒取辦爲才好。何李雲問。而不師杜老。持論如此。不獨詩品之高。其直諫從可知矣。

寄侯朝宗

雪苑春陰度玉珂。大梁公子倚彫戈。市無朱亥經過少。客有於期忼慨多。落日千家翻白羽。桃花三月走  
黃河。風流江左遙相憶。潦倒尊前有放歌。可作羽聲讀。

柳

字長在。四川遂寧人。

送施又黃還吳門

親老遊何遠。長安羨爾歸。西風悲落葉。征馬戀斜暉。詞賦無今古。煙霞少是非。淵明三徑菊。留待護柴扉。

夏熙臣

字無易。湖廣孝感人。

施州衛寄所親

環衛皆君長。東南盡笮邛。流官乘小駟。蠻婦織花寶。刀劍生睡背。衣冠列附庸。不煩司馬檄。尺土亦王封。

蔣 洙字 澤來。江南吳縣人。著有三徑草堂稿。文蕭序之。今並散佚。錄扇頭所書一篇。

登岱

天門千丈立崔嵬。鐵削雙峯一徑開。山界魯齊盤地軸。禪隆秦漢剩仙臺。黃河北繞青丘出。碧海東依紫塞回。欲倩盧敖九節杖。晴披闔闔望蓬萊。

吳祖命字 鄴。松江人。

詠史

天祿高然太乙藜。玉堂東畔石渠西。君王讀罷賢臣頌。偏遣王褒訪碧雞。譏不能用賢也。咏史詩。自應以議論行之。

卷八

姚文焱字 彥昭。江南桐城人。著有楚遊詩。

赤壁

天空木落石崔嵬。懷古憑軒倦眼開。山勢欲奔吞浪住。江光不斷抱城來。英雄氣盡三分業。詞客名高兩賦才。只有文章傳勝地。簫聲鶴夢摠塵埃。

吳 綺字 蘭次。江南江都人。由選貢生官湖州知府。著有林蕙堂集。○蘭次守湖州。擒治豪猾。喜賓客。四方名流。適從賦詩遊。無虛日。卒以是去官。梅村贈詩云。官如殘夢短。客比亂山多。可

以想其  
風趣矣。

程益言邀飲虎邱酒樓

新晴春色滿漁汀。小憇黃鸞畫獎停。七里水環花市綠。一樓山向酒人青。綺羅堆裏埋神劍。簫鼓聲中老客星。一曲高歌情不淺。吳姬莫惜倒銀瓶。三四語寫山塘風景如畫。

贈趙尊客

閩客浮家柳水湄。孤踪不許俗人知。春衣典盡綠沽酒。晨突無煙獨愛詩。晞髮未忘文信國。論心長憶鄭當時。何來忽作思鄉曲。擷采幽香絕妙詞。

見人扇頭是友沂絕句愴然和之

歌版當年出絳紗。綠腰紅袖盡鉛華。只今便面春風在。曾向章臺拂柳花。

入署

平明初下紫宸班。錦署無營晝掩關。閒拂案牘思往事。一杯涼雪祭椒山。兵部有椒山。題名。故祭之。

友人納姬戲爲催粧姬汪姓南人也

蛺蝶輕羅押蒜金。燈前小立倚瑤琴。桃花潭水兒家住。只問郎情深不深。

題畫

怪石頽雲勢不平。西風捲出大江聲。漁郎醉臥蘆花裏。笑指何人觸浪行。

黃

字仙裳。江南泰州人。著有悠然堂集。○仙裳負氣。慷慨。人以俗語俗事相翫。輒設罵之。羣目爲狂生。

江村春日

門前芳草路。春到有誰過。曙鳥喧寒樾。條風動綠波。性迂求世少。親健得天多。莫訝將強仕。猶然隱澗阿。

經落帆亭。是癸巳春與陳澹仙先生別處。

故交十載散浮萍。橋李風煙此再經。今日獨齋磨鏡具。當時相送落帆亭。東門蟻酒春猶綠。南浦絲楊晚更青。只有寢園生宿草。鷓鴣啼處不堪聽。

婁東修復前觀察馮留仙先生祠宇

憶昔驚心丙子年。誰將隻手獨扶天。舉朝半醉烏程酒。名士拚沉白馬淵。黨禍清時公又死。奸謀用後鼎俱遷。寧知宗社丘墟日。廟食東南肅几筵。明思宗朝烏程溫體仁當國。戕虐善類。小人多附比之。社之所以屋也。三四爲記實語。

梁谿舟宿聞吳歌

雞唱煙中亂槳鳴。夢回酒醒未天明。江南風景彫殘後。纔聽吳歌第一聲。

宗元鼎

字定九。江南揚州人。著有芙蓉齋集。○定九愛潔。不減倪高士。爲詩最重風調。而性情因之以出。非漫然語也。集中七言絕句。尤近中晚唐人。

早秋

我行初出郭，新月似蛾眉。幾夕望舒圓，今復蟾兔虧。匪獨此朝夕，百歲亦如斯。懷情不能寐，徘徊向中墀。側聞草蟲鳴，仰望繁星垂。人言秋漏長，已覺衡漢移。千念未夜息，萬感與朝期。長卿恆有疾，子雲終何爲。引領還躑躅，淚濕衣裳縑。

題郊居

茶竈聲清響竹廊，小亭新構面橫塘。漁夫晚唱煙生浦，桑婦遲歸月滿筐。一嶺山花燒杜宇，滿池春雨浴鴛鴦。籬邊犬吠何人過，不是詩僧是酒狂。

冬日過甘泉驛

記得當年來古驛，馬鞭帶雪繫樓前。雙柑香濺佳人手，半臂寒添酒客肩。忽見荒隄摧暮草，空傷衰樹沒寒煙。風塵滿目深惆悵，卻望誰家寄醉眠。記得忽見上下半篇自成章法雙柑一聯漁洋謂似才調集中語

百尺樓

素轡翩翩月一鉤，凌雲風致想高樓。江南歌舞尋常事，便遣曹彬下蔣州。連下章用意遺詞神似玉溪絕句

吳音曲

璧月庭花夜夜重，隋兵已斷曲阿衝。麗華膝上能多記，偏忘牀前告急封。

留鄒訐士

新開蘭蕙正芳菲。初到鱒魚入饌肥。最好流光是三月。如何拋卻渡江歸。

潘

高字孟升。江南金壇人。著有南村集。○南村詩。古淡生新。絕無雕飾。而自然合度。金壇詩人。無出其右者。○漁洋詩話。謂陳其年與予書云。有潘高者。貧而工詩。久別無可賣者。止此一物。

奉獻潘有奕。食一絕云。黃鴉穀殼雨。陳云。今讀其稿。格高者甚多。此篇止風調可聽。恐非上乘。

初春有述

我生無他長。所賦惟種樹。樹中尤愛梅。爲其能守素。守素有同心。相將老巖穴。花時犯清霜。坐到將殘月。家園與未足。尋梅過太湖。梅花如白雲。茫茫路欲無。入山不忍盡。下山元獨宿。鐘清何處寺。花隱誰家屋。願言寄吾友。一枝折寒林。微物何足貢。將此歲寒心。能守素。守此歲寒心也。一篇大旨如此。

送友人之中州有懷同社并陳子其年

臨觴送君發。正值榴花時。雨過風蕭然。空山浪遲遲。行行君所經。冉冉予所歷。若宿伊陽村。爲望嵩山月。致我平生友。寄我一行書。相看成契闊。鬢髮復何如。陳子未相識。相思亦已久。爲我一問之。知有南村否。歸雲帶雁飛。清霜點客衣。旦晚有題字。應報溪南扉。

憶幼子

少年會有役。辛苦何足言。四十今過二。向後多衰年。撥棄悠悠情。當從予所便。夜分偶感觸。顧影心悁悁。憶我去冬時。種麥來溪田。小兒纔五歲。叱叱揚耕鞭。隨我至溪畔。背我弄溪泉。日暮徐來歸。持鉏趨我前。



今春忽假館。僻近西山偏。牽衣頻送我。正傍溪田邊。溪水亦活活。溪麥亦芊芊。自從別家來。歲月如流遷。麥今已可刈。兒今誰共憐。我意欲反權。遇事苦迍邐。懷鄉方竚立。東望惟雲煙。慈愛至情委曲傳出無心學陶去陶公未遠

晚上焦山絕頂至暮歸宿山莊

初日江荒荒。曉煙不可罷。稍行見青螺。漸次辨蘭若。人行穿鶻巢。路窄盤石罅。逾時攀險絕。早已驚衰謝。樹古巖就穿。樓高雲許藉。一盡巔崖趣。旋從別徑下。落木響蕭騷。寒潮勢奔瀉。欲歸路非遠。問渡風稍借。可憐江上月。先我在茅舍。酌酒勸影形。嗒然坐清夜。此首又近李願常建。○本朝五言古。李杲堂每首刻峭。潘南村每首清真。求參立者。或難其人。

古意

跨馬塞北地。百戰封一侯。釣魚江南天。一竿占十洲。此事孰不知。大白爲我浮。醉起唱銅斗。此樂君知不。能在此樂散人勝萬戶侯矣。

留別

水落溪田出。霜清下種時。煙中送人早。雨外到村遲。松隔誰家屋。花明是處籬。君今荷蓀者。吾亦在東菑。

寄梵川諸友

柳暗溪南路。柴門第幾灣。人隨春水遠。鳥帶夕陽還。綠過孤村雨。青浮隔縣山。徘徊芳草意。不盡暮雲閒。

雜感

陰山沙磧捲雲飛，戰罷秋風咽鼓鼙。隴上空歸都護馬，城南盡哭羽林妻。蕭關明月悲笳動，遼海孤煙雜部齊。遠戍議添新介冑，不知獵騎過安西。

### 秦淮曉渡

潮長波平岸鳥啼，月滿街一聲孤櫂響。殘夢落清淮，金陵詩社諸名流或在賦秦淮曉渡，爭勝者多長篇。出者金壇虞東臯云。累幅南邨曰：我年老才竭，只二十字也。出示衆人，皆

### 春感

江水悠悠泛畫橈，東風何處不魂銷。春歸萬里無消息，又過垂楊舊板橋。

### 寒食

黃鶉穀穀雨疎疎，燕麥風輕上鯨魚。記得去年寒食節，全家上冢泊船初。

憚日初字仲升江  
南武進人

### 觀王石谷畫山水圖歌

翠川王郎年正少，放筆往往稱神妙。靈想寂與造化通，幽襟獨寫溪山照。看君得意時，意若旁無人。抽毫欲使羣峯奔，躊躇顧盼久不下。素練忽破青山痕，誰翦羅浮煙。驚落華陰碧，勢偃研北松。欲墮壁上石，冉冉嵐氣蒸。轉目無留迹，營丘洪谷不可攀。人間久矣無青山，此時窺圖發清賞。高興半落雲沙間，何處覓

丹梯。何方種。瑤草煙霞四壁。吾將老。援琴待掃十丈綃。坐我雲邊弄仙島。

方膏茂字敦四江  
南桐城人

歸家

此身拚永別。那意得生還。征騎才門外。喧聲已戶間。心舍他日淚。眼認去時顏。嚙臂知非夢。今朝真入關。

喧聲已戶間。卽少陵鄰人滿牆頭。意工於體化。

張宸字青瑤江  
南華亭人官部郎

楚中秋思

日落長沙楓樹紅。斷猿啼處暮雲空。可知昨夜鄉關夢。身在寒煙萬點中。

路鶴徵字湘舞江  
南華亭人

籠中鸚鵡

縱有雲霄志。其如鍛羽何。語言徒自巧。文采累人多。隴坂關河杳。雕籠歲月過。翠衿渾短盡。愁絕少陵歌。

文采累人。一篇主見。補正平後。柳柳州劉連州皆其人也。故君子有取於夷白。

范超字同叔江  
南上海人

雪灘釣叟歌

雪灘釣叟人不識，持竿日坐灘頭石。渭水遭逢事有無，英雄老作江湖客。問爾垂綸定幾年，笑而不答鬚飄然。知君原乏求魚志，擊楫還吟秋水篇。垂虹橋門七十二，君家恰在橋邊住。葑屋斜開白板扉，釣船橫繫枯楊樹。日落沙頭增暮寒，江天風雪正漫漫。朝來凍合無魚釣，好脫簑衣當酒錢。此爲吳江顧茂倫作。

柴紹炳字虎臣，浙江仁和人。○西泠十子詩選。虎臣與毛稚黃爲主。憫詩教陵夷，而齟齬論次，以期力追淵雅也。虎臣詩，營構精堅，時嫌過密，特取其清疎淡蕩。

### 酬毘陵劉慶雲湖上見贈

劉生纔把臂，幾載客錢塘。一見如相識，重遊卽故鄉。春陰桑葉白，日暖柳花香。未遯湖山興，高歌那斷腸。

桑葉非白，柳花無香。然古語云：杏花露，桑葉白。太白云：風吹柳花滿店香。詩人引用，皆有所本。

### 喜陸大景宣歸河渚

征途幾歲竭歸來，庾信江南重可哀。春雨草連村市沒，曉風花傍戰場開。我思賣藥仍無地，君定垂綸何處臺。總是他鄉成浪跡，故人相見且銜盃。

沈謙字去矜，浙江仁和人。著有東江集。○朱竹垞云：去矜少喜溫李，後乃循漢魏之規模，得初盛之風致，其意貞而不濫，其聲和而不流。

### 引聲歌

外極莽蒼，內保精粹。至人不言，四時咸備。理不出身，道不在智。形體塊然，神明所寄。虛心實腹，抱道守真。大化迴薄，與仙者鄰。運幹圓象，敷匝廣輪。陰陽不害，庶得平均。可參子欲無言章及老子守其環中等意。

樵歌行自注。徂望自號西山樵夫。嘗以漁父詞贈子。故有此答。

西山樵夫方壯年。手持樵斧西山邊。朝向西山石上坐。暮向西山雲際眠。行人過者問樵夫。願君共坐語。斯須美髯如戟好。身手虎狼不顧千金軀。深林杳杳白日落。請君且去住城郭。豐貂錦衣不識寒。肥肉美酒供大嚼。暫時俯仰誰復嗤。恐隨霜露填溝壑。樵夫不答自微吟。東江漁者知我心。

送人之山東

君去遊齊魯。誰憐泣路隅。沙深埋馬足。風利斷人鬚。鼓楫河流隘。瞻雲嶽色孤。蘭陵多美酒。愁絕更須沽。

晚眺

川原望不極。孤客自登臺。落日大荒遠。平沙秋雨來。青門生事渺。白石壯心哀。歸思西風後。空憐作賦才。

送友人北上

嗟君此行役。把酒一沉吟。驅馬河冰滑。聽雞夜雨深。鼓鼙孤客淚。書札故人心。念母歸應早。天涯弗滯淫。

虞黃昊字景明。浙江石門人。

楊柳枝辭

楊花如雪撲征衣。馬上征夫苦憶歸。曾向曲中回首望。而今真在路旁飛。清。清淺。自足。風神。此辭體也。

陸圻字麗京。浙江錢塘人。○漁洋詩話。謂麗京晚年遠遊不歸。或云在嶺南為僧。圻名今龍。而朱竹垞太史。謂其入武當為道士。終莫能定也。總之不知所終云。

七夕有感

萬里晴雲澹素秋。海天東望更生愁。黃姑鵲通斜漢。明月嬋娟照戍樓。剖核誰當來阿母。吹笙何路問浮丘。可憐攜手闌干淚。空擬歸來尙黑頭。

與歌者陳郎

落日橫江老白蘋。同鄉停問一相親。未嫌李尉翻新曲。偏喜何戡是舊人。玉管漫吹秋月白。紅牙曾按綺筵新。坐中恐有傷心客。莫唱伊涼水調頻。

送朱生之秣陵

華館張燈酒共斟。清霜朔雪盡陰陰。上方請劍高名著。廣柳容人俠氣深。醉後難忘公瑾曲。愁來獨抱蔡邕琴。秦淮渡口花爭發。莫負當年桃葉吟。應是俠士而為直臣者。

毛先舒字稚黃浙江仁和人。有東苑詩鈔。漁洋詩話。余喜毛稚黃西施絕句云。別有深恩酬不得。對君歌舞背君啼。此意未經前人道過。

孔北海融述志

炎炎當路客。奕奕朱門開。雄雞無三號。冠蓋紛沓來。志士大所營。漂漂窮無依。結根在累世。安能灼餘輝。歷觀古俊民。功成道何微。子牙尙陰謀。管仲器小哉。人生履國步。周道自我夷。猛虎扼其項。何況狐與狸。此身勤君父。安得慕夷齊。曲士矜一節。度外寧所希。寧爲白玉碎。不爲長伏雌。北海目中。直無曹瞞。經營國難。不慕夷齊。其素願然。

也。寧玉碎而不為瓦全，故卒被禍。擬古詩，須設身處地為之。

裁衣曲

翦征衣，親手作。君身長短何須度，肥瘦定然不如昨。新衣為君裁，舊淚為君落。還將銅斗細熨灼，莫使衣

上沾猩紅。君見淚痕不肯著。思路音節近接青邱，遠接文昌仲初。

張

丹一名綱生，字祖望，浙江錢塘人，有從野堂詩集。○此西陵十子中嬌嬌者，向共推其七律，而五古生辣結轉，終以比體擅長。

白竹村

路盤白竹村，崎嶇探窮谷。居人八九家，林杪構破屋。下惟四柱立，亭亭不附木。仰視如鳥巢，夕暝梯雲宿。樓動晚風吹，萬竿如戛玉。已防虎豹害，復懼麋鹿觸。我行多彷徨，不敢岐路哭。從者俱飢色，清潭聊手掬。

吾語勿苦飢，餐松毛羽足。寫竹屋荒陋如見。

涿州城

曉霜不在地，微白生牛背。遙望涿鹿城，隆隆沙磧內。控縲走其下，壁立皆土塊。此地古范陽，甲兵天下最。側耳聞啼飢，傷心自我輩。野狼遇人嗥，蒼鷹攫雉碎。生涯底如此，浩歎茲行邁。天下之險，可使有飢民耶。誰謂山塹人，不留心經國。

晏城

小小古晏城，西對華不注。昔之晉卻克，逐馬匝此處。我行實已懶，解鞍歇薄暮。鷓鴣嘯其羣，老烏守枯樹。

不見古人迹。斷碑委樵路。手摸苔蘚痕。字句讀未誤。平仲之采地。緬然起思慕。奈何千載後。蕪沒如野戍。相望有遠山。恐是齊朝附。

登城西南隅次毛馳黃韻

野闊天高楓葉丹。鳳凰城下倚樓看。苔深玉馬秋逾靜。露澀銅駝曉未乾。南浦雲屯千騎合。西陵木落萬家寒。愁來鼓角霜前動。莫聽征鴻去渺漫。

陸嘉淑字冰修。浙江海寧人。

燕城感舊

花影鶯聲句偶傳。無端真得玉人憐。劉郎前度身猶在。杜牧三生事惘然。銀燭夜闌分險韻。畫欄春半響么絃。玉鈞斜外傷魂處。落盡桃花叫杜鵑。

郭襄圖字阜旭。浙江平湖人。

贈鮑子韶卽送別

看君心事欲凌雲。客裏悲歌日易曛。每笑成名皆豎子。翻因長揖重將軍。焦桐未盡留知己。白鳳時吞只賣文。憶向五羊同叱石。燕臺相見又離羣。

顧萬祺字庶其。江南吳江人。諸生。



鬪雞坡

紅粉宮中小隊齊。花痕凝碧草萋萋。一從孫武歸山後。不教三軍教鬪雞。武備不修意借鬪雞想出可云濟世巧心

盧元昌

詞多愁苦之旨由生平遭際使然而頌法常在少踐故憂傷感憤不知其然而然也上海陳生龍岩爲余述其梗概如此

哭李在湄

汝書黏在壁。三載字依然。薄宦嗟無祿。投荒竟各天。老魂霑旅雪。客夢叫孤鸞。誤汝真升斗。泉臺恨肯捐。  
薄宦天涯客。頻年幾箇回。挑燈搜鬼錄。把酒話泉臺。後死青山在。餘生白髮催。羊城李少府。丹旆早歸來。  
第一章哭少府此章痛逝者而行自念也。

北塘晚棹

悠悠北塘棹。落日轉蓬科。留滯無安土。東南病把戈。江寒魚罟靜。月上虎蹤多。去去勿復道。蒼生可奈何。  
第五語經所云三星在圍也。

登吳六益藻野閣次韻

凭欄極望思蒼茫。南北關山鴈幾行。萬里故人偏海角。十年兄弟一匡牀。欲謀土室真成狷。便哭窮途未是狂。愛爾灌園能樂志。樓前長種百株桑。

羣忠祠

徐海樓船捲土來。角聲吹落暮雲哀。將軍臥鼓空城閉。國士褰旗戰壘開。五尺汪童能破賊。三千瓦氏浪銜枚。自注。明世廟徵瓦氏兵禦倭。甚暴。先朝祠宇還香火。蕭瑟寒鴉夕景催。此死倭寇之亂者。

哭箕兒

舉目伶仃欲斷魂。汝生惟此藐孤存。翻教衰祖為嚴父。休道無兒幸有孫。白首未拋苦海累。黃昏孰問寢門溫。牀頭零落殘書卷。幾度青燈屋漏痕。

胡渭生 字騰明。浙江德清人。

吳山觀潮

扶桑東極水雲昏。溟漲連天入海門。白鷺千羣沙際影。青螺數點雪中痕。石當羅刹聲偏走。風折西陵勢益奔。徒倚胥祠下望。鷗夷信有未招魂。白鷺千羣。用枚乘語。意青螺。句即蘇詩所云。越山渾在浪花中也。

吳 攸 字修齡。江南崑山人。○修齡著正錢鏡。又著圍爐詩話。擯斥諸家所為詩。摹倣西崑。然重重襲積。類祭而未歸自然。與平日議論不相關照。所謂貴人斯無難者也。存其佳者二章。以識

大概

秦

質子妖姬貨可居。六王未畢已邱墟。鞭橋東去無靈藥。驂乘西歸有鮑魚。黃犬淚中慚廢立。白蛇醉裏報

驅除當時早爲秦非計。牧地爲封食有餘。

蜀漢

季世唐虞只此時。泗亭天壤哲人違。三交城下波聲急。五丈原頭日色微。西國無煙生火井。東鄰有女落蠟磯。不關鍾鄧能緣險。黃皓譙周盡識幾。落蠟磯。落字未妥。

譚吉瑄字舟石。浙江嘉興人。

弔戰場

祈連山下草寂寥。少人煙。魂魄千年後。還思渡酒泉。言故鬼猶不忘歸也。前人以可憐無定河邊骨。猶是春閨夢裏人。爲善作苦語。此篇正復相似。

朱克生字國楨。江南寶應人。太學生。著有秋厓集。○王漁洋贈詩云。海內風塵調未孤。故人才筆妙珠湖。卽此可以想其詩品。

送陳子壽往河南

匹馬遊梁出帝鄉。贈鞭重集酒罇旁。那堪旅舍逢離別。正值家園作戰場。汴水月明沙雁過。薊門霜動夜

砧涼。傷心去住同搖落。不獨悲秋淚滿裳。分寫河南薊北。而未以一語總承格律甚細。

俞南史字無殊。江南吳江人。諸生。○無殊山人安期字羨長。之子。羨長以博雅勝無殊。出以清空。父子各擅長也。

過顧茂倫村居

境以居人重。情因遇故深。酌泉偏愛淡。看竹共分陰。草木山中歷。桑麻世外心。閒吟忘永夜。明月照披襟。

黃九河字天濟江  
南泰州人

北上於袁浦發家書

丈夫志四方。不受兒女羈。苟懷萬里志。勞動何足辭。昨發海陵城。今宿淮水湄。附書於送徒。援筆中心悲。親亡兩弟弱。支戶惟中閨。水旱歲頻仍。全家常苦飢。官租宜早辦。西疇勤耘耔。幼弟學易荒。肅恭承明師。回首望螺山。先壘草離離。遠行戀所生。貧賤無歸期。苟能行直道。何懼路險巇。長安多親舊。音驛日夜馳。紙短苦意長。挑燈重封題。欠伸啓篷窗。月落村雞啼。直寫八行中語。歸到戀所生。行直道。卽所云明發不寐。戀猶可行也。

王孫晉字左公。江  
南寶應人

南閩

久客欲歸去。翻愁行路難。極天圍萬嶺。平地落千灘。水立驚蛟鬪。風腥哭虎殘。悲歌烽火夕。流落恨儒冠。  
韓 昂字經正。直隸宛平人。著有天樵子集。○朱太史竹垞序云。石耕終身不娶。比之牧犢子。五言清穩。自足名家。予轉取其七言。以其情韻纏綿。尤足動人也。

夜

出門寒輝看向圓。清宵白雲多在天。歸人已絕四鄰靜。老樹葉隕風淒然。門前卽是寒溪路。坦步徐吟過古渡。長橋立久人不知。明月相隨自來去。

九日登雞鳴山

聞道東籬菊已黃。無因移向酒尊旁。西風忽起野煙暮。落葉亂飛山樹蒼。雁帶寒聲歸渚急。江涵秋水與天長。浮雲遮盡登高眼。不許愁人望故鄉。

雨中送春

綠草疎籬映水濱。清溪寂寂四無鄰。一簾細雨仍飛燕。幾日殘花又送春。多病翻愁今夜酒。傷心如別故鄉人。明年寄跡知何處。早向天涯慰苦辛。第六語非古之傷心人不能道。

王邦畿字說作廣東番禺人。賈生。

春郊

閉門日以久。出郭尚鳴鶯。爲愛清溪色。春風百草生。雲低滄海樹。潮上夕陽城。何處山中叟。猶聞伐木聲。錢劉遺韻

過易水

地入幽州白日沉。寒雲莽莽水陰陰。亦知七首無成事。只重荆軻一片心。劍術之疎。中心之義。盡於十四字中矣。綱目書荆軻爲盜。未爲允平。

梅 磊字杓司。江南宣城人。著有響山齋集。

秋日

秔稻朝初熟。荷花晚更香。螢飛過竹暗。牛飯就松涼。斯世多充隱。吾徒半醒狂。愛從田父飲。雜坐亦何妨。

王漁洋見田家飯牛。中有所感。因賦牛飯就松涼句。

錢曾字遵王。江南常熟人。

蝶

曲廊迴處正斜曛。弄影隨風自作羣。曾恃粉衣欺艷雪。幾緣香夢惹行雲。斜穿簾幕深深見。飛過池塘故故分。送得南園花草盡。正教愁殺杜司勛。

吳物榮字慎庵。江南吳縣人。諸生。著有錦峯檄稿。

山居

世事山居盡。衰年嬾更加。鳥啼方夢覺。酒熟正梅花。天地容雙鬢。漁樵共一家。溪邊聊晚眺。倚杖數歸鴉。  
三語方字。四語正字。不鍊之鍊。是爲詩眼。

卓爾堪字子任。江南江都人。○子任系靖難忠臣諱敬之後。代傳清白。壯歲南征。闔道爲右軍前鋒。又督輯勝國逸民詩成集。文武並嫻。遠近爭高其行。

源口

旌旗源口出。萬馬度沙頭。山月開昏路。烽煙警素秋。前林園已破。斷壑血能流。何日銷征伐。春原看牧牛。

黃垆字子厚。山東即墨人。康熙癸卯舉人。著有夕霏亭詩。

清詩別裁 一卷八

一百七十一

短歌行

龍蟠於泥。蛇其肆之。虎處於柙。爪牙安施。委巷之犬。吠聲如豹。廩倉之鼠。口厭梁稻。太行居後。孟門居前。僉夫之心。君子畏焉。方寸之中。乃有五嶽。磊砢嶽崎。五丁焉鑿。精衛填海。愚公移山。爲之在人。成之在天。送岷公周邑侯南歸

君從西郊來。旌旆光如電。父老遮道左。爭欲識君面。君從西郊歸。雪壓荒邱樹。獨有春風發。送君千里路。

嚴我斯

字就思。浙江歸安人。康熙甲辰。賜進士。第一。官翰林學士。著有尺五堂詩刪。

十峯草堂歌爲錢礎日作

九龍之山環九峯。一峯一態如一龍。興雲出雨氣磅礴。鱗甲欲動凌蒼空。別有一峯伏而起。神奇天矯爲龍尾。世人咫尺不知名。古來畸士都如此。中有草堂繞煙蘿。峯峯迴薄青嵯峨。左圖右史安樂窩。猿啼鶴唳山之阿。草堂主人抱龍德。或潛或見人不識。時時掉臂弄雲霞。往往歌聲出金石。曠懷雅好遊名山。往來齊魯盡躋攀。有時夜半登日觀。雙騎白鹿青雲間。去年把臂歷山麓。清詩萬首酒百斛。今年款段走長安。不使緇塵澆素服。手持尺幅字琳琅。乞我題詩寄草堂。子本風塵落拓者。青鞋布鞵思徜徉。安得投簪尋泛宅。五湖之曲煙光白。與君拄杖聽鳴泉。夜向松窗讀周易。一起神來。以下便一筆掃去。

聞砧曲

長安八月秋風起。長安門巷秋如水。閨中思婦罷鳴箏。一夜傷心千萬里。前年蕩子去從軍。消息關山據不聞。黃龍塞上愁雲斷。丹鳳城邊落葉紛。平沙獵獵吹枯草。碣石霜飛塞信早。鐵衣銀燭苦思家。紅粉空房愁遠道。烏啼啞啞風淒淒。日暮寒砧到處迷。玉筍暗隨聲斷續。涼蟾故逐影高低。青漆樓頭雁初度。天寒夢斷金微路。龍堆戰士幾人還。馬革遊魂竟何處。城西一帶素車歸。白骨沙場半是非。昨夜深閨猶記憶。開箱還擣舊征衣。

周

弘字子重。江南無錫人。康熙甲辰。賜進士第三。入官侍讀學士。

己未二月二日午門聽宣岳州大捷遇雪恭紀

荆南奏凱達神京。曉關天闔瑞雪明。朱鷺鏡歌翻郢曲。玉龍銀甲灑春城。貂裘尙憶軍前賜。鵝鴨曾喧夜半聲。自此江湖空戰壘。豐年有象課深耕。奏捷遇雪。語語合寫。

湖南諸路大捷和寶坻杜相國韻

覆巢殘孽剩遺雛。坦腹緋衣合識符。士行高牙麋子國。岳侯奇捷洞庭湖。烽煙一夜天兵掃。湯火頻年我后蘇。橘渚楓洲初戰定。關山片月笛中孤。

曹

禾字頌嘉。江南江陰人。康熙甲辰進士。己未召試博學鴻詞。官至國子祭酒。○余識其孫全倫。清門零落矣。旣全倫旋沒。訪其詩不能多得。爲之慨然。

秋夜述懷



空林葉撼。野犬聲狺。徬徨忽四顧。中夜感古人。鴻濛詎不樂。烏用施經綸。才賢既當權。造化辭苦辛。雷雨亦待治。雲物非空陳。自有濟世功。千古勞其身。牽犢者誰子。高蹈遺斯民。君子出而用世。則造化以得也。千古聖賢心。事昭然若揭。

送友人還金陵

屑瑟秋風送客裝。蕭條木落更神傷。滿天欲雪尊虛酒。昨夜初寒鴈叫霜。馬足遠衝黃葉路。吟聲徐入白鷗鄉。江南景物關情甚。煙雨秦淮夢裏長。

勞之辨字升。浙江石門人。康熙甲辰進士。官至副都御史。著有靜觀堂詩。

眺玄武湖歌

雞鳴十廟衰草多。誌公遺塔高嵯峨。遠望大江千里之雪浪。近俯晴湖萬頃之煙波。湖形北向稱玄武。錦繡樓船鬪歌舞。結綺臨春跡已空。惟有澄泓一片無。今古聞說龍蟠王氣真。徐常偉伐鬪麒麟。共球受日歸天府。戶册登餘藏水濱。周遭沆瀣中臺樹。淺瀾游魚通港汊。仁民愛物本相兼。苦於淵者爵無赦。自注。中禁人遊玩。免葵燕麥搖春風。細柳新蒲發故叢。鴛瓦已銷金碧外。漁歌時起荻蘆中。自古盛衰如轉燭。

趙士麟字玉峯。雲南河陽人。康熙甲辰進士。官至吏部侍郎。有德易以興無德易以亡也。

過安莊至鎮寧

帶館輕裘上假坡。棲霞尙近鬱嵯峨。名通上國由莊嶠。威鎮諸侯自伏波。溪谷至今多瘴癘。人煙到處雜藤蘿。爲欣氣候如秋杪。華蓋橋西試一過。

黔陽懷古

羅施聲教阻遐方。漢置牂牁達夜郎。天入炎荒時苦雨。途經冷驛夜無霜。馬鞍觀側藏雲塢。銅鼓山頭祀竹王。千古猶思丞相澤。祠堂松柏自蒼蒼。

盛符升

字珍示。江南崑山人。康熙甲辰進士。官御史。著有誠齋詩集。侍御少。夏考功。擊仲遊。與別有車在。非溢分語。

同阮亭先生遙和李侍郎讀水經注憶洞庭韻

聞說巴陵倚洞庭。君山如畫見圖經。岷峨雪盡寒潭碧。雲夢波連湖草青。九派微茫看楚澤。數峯彷彿擁湘靈。知君回首曾遊處。遠思蕭然入杳冥。

中秋岱頂卽事

身入雲端雲下垂。風雷南去日西馳。青霓斷續斜陽外。碧海澄鮮子夜時。天柱獨晴依上界。冰輪乍滿半秋期。茫茫俯視皆塵霧。一片空明對玉池。

南征

太白秋明井鬼旁，兵占早已在炎荒。  
養成歲月營三窟，嶠負西南擅一方。  
莫遣金沙留蜀漢，豈容清浪接湖湘。  
由來制勝資全策，銅柱依然緬水陽。

時尙逆有連結吳逆之勢，頌聯慮及之，非尋常經生家語。

冬日渡彭蠡過廬山下

幾經滙浦惜幽尋，重向宮亭望遠岑。  
雲臥石門思北澗，花開蓮社憶東林。  
三人一笑誰賓主，五老千秋自古今。  
惆悵吾衷勞夢想，幾人遊跡未銷沉。

劉梁嵩，字王少，江南江都人，康熙甲辰進士。

天險閣

旋折初驚大壑雷，凌空復上劇崔嵬。  
白雲無際疑天盡，翠巘何年倚劍開。  
一路水從汾曲合，千層山抱鴈門迴。  
中原地勢經西折，眺覽重增庾信哀。